



State room 088



100



۷۱
البرق



Tak rasm 088





۱۰۰۱۴

اصطلاحات ادبیہ

محرری

معلم ناجی

صاحب و ناشری

خزینہ فنون غزنہ سی مدیری وعصر کتب خانہ سی صاحب

ق . فائق

معارف نظارت جلیلہ سنک رخصتیلہ طبع اولتشد

صاحب کتب خانہ ق . فائق مہریلہ مہور اولیان نسخہ لہر ساخہ
وسراپا یا کلش اولوب طابعی وبایی مسؤل طوتیلہ جقدر

استانبول

(آ. آ. صادوریان) شرکت مرتبہ مطبعہ سی — باب عالی
جادہ سندہ نومرو ۵۲

۱۳۰۷



افاده مخصوصه

اجراى اقتدارمك قات قات فوقنده اولديغنى معترف
بولنديغم "لسانزايچون بر اصطلاحات ادبيه قاموسى
ياز مقى" فكري آره صيره ذهنى اشغال ايدر دى .
بوطاتلى خيال بعضاً اودرجه لرده محرّك شوق اولور .
دى كه كوكلنى موقتاً اولسون آووتقى ايچون اويولده
بر آزيازى يازمغه مجبوريت حس ايدر دم . يازاردم
يازاردم بكنمزددم . كاغلرلى ييرتار آتاردم . بوخيالى
برسوز دكادر . واقعدر . عينيله نقل ايدىورم . برخيلى
زمان كچدى . اوفكر ينه ذهنه اوغرا مقدن كرى
قالمازدى . بروقت اولدى كه يازديغم پارچه لرى محو
ايتديكه پشيمان اولدم . امكارمه آجيدم . "زواللى يازيلرم!
سز قابل تصحيح اولمق مزيتندن ده مى محروم ايدىكز؟"
ديمكه باشلادم . نهايت تلافى مافات ايچون تكرار بر طاقم
پارچه لر يازمق لازم كلدى . ميدان بولدقجه يازمتده



مردم معلم ناجى

دوام ایتدم . خیلی شی بیریکدی . تکرار کوزدن کجیر .
 مکه کلیور . همان هپسنی آرقداشلرینک یانه کوندره .
 جکم کلیور . آنلری تهلهکنه دن ، کندمی ندامتدن حفظ
 ایچون برچاره دوشوندم . « طبع و نشر » ی بولدم .
 (اصطلاحات ادبیه) نامیله میدان چیقمهغه باشلایان
 بوبندلر ادبیات ترکیه نك - فن اولمق حیثیتیه - کافه
 لراز منی بریره جمع ایتک کبی بیوجک بر مقصده
 یازیلیور . ایستدیکم صورتده یازه بیاسدم مقصد
 حصوله کله جک . نه فائده که بنم ایچون ایستدیکم
 صورتده یازه بیلیمک محال دینیله جک درجه ده کوج !
 اقتدارم همتمله متناسب اولملی ایدی . . . هر حالده
 بویله شیلری یازمق یازماقندن اولادر اعتقادده بو .
 اندیغم ایچون عجزم بنی یاسه دوشوره میور . سیم
 تزیاید ایتدکجه عجزم تناقص ایدیور صامیورم . بو کوزل
 بر تسلیدر . و ماتوفیقی الاله .

معلم ناجی

فی ۳ حزیران سنه ۱۳۰۵

اخطار

(اصطلاحات ادبیه) — عنوانندن دخی آ کلاشیله جعی اوزره =
 بین الادبا اصطلاح اوله رق مستعمل اولان کله لرله ترکیلری جامع اوله جقدر .
 یوکا آثار کترانه مدن برچوق مثال درج ایدیشم :

کهن خرقة خویش پیراستن
 به از جامه عاریت خواستن

قول حکیمانه سنی تقدیر ایتک ایستمدیکمدندر . یوقسه (آثار کترانه م)
 دیدیکم شیلرک حقیقه برر اثر کتر اولدینی تحت اعترافده در .
 بو اصطلاحاته دائر ویردیکم ایضاحات (ادبیات ترکیه) نك شدیکی
 حالته واستقبانه کوره در . اوتهدن بری عرب ویا فرس طرز ادبسنی
 عیناً قبول ایتک فکرینه اشتراک ایدنلردن دکلم . بو مسلکی بکنمیلر
 ایده جکم خطالری عفو ایتکه تنزل ییورمازلر صافیرم . شونکله متسلی
 اولیورم که هم مسلکم اولان اصحاب انصافک مظهر عفو ی اوله جتم محققدن .

— ❦ —

محمد ناجی

اصغر خیری

صمصامی ایلدجه تسلیل [۰]

تسلیم سیوف ایدردی اعدا

تاریخ دیور که بی محابا

براردوی برار ایتدی تنکیل

میدانه کیروب بلا تردد

دیرمش اودلیر مرتضی شان

اولمکدن اولور میم هراسان

اولمک ایچون ایلدم تولد

(بی محابا) هم « تاریخ دیور که » یه هم ده « براردوی برار ایتدی تنکیل » ه قید اوله بیلیر . ایکی احتماله کوره بیت « تاریخ بی محابا دیور که : براردوی برار تنکیل ایتدی » و یا « تاریخ دیور که : براردوی برار بی محابا تنکیل ایتدی » مفهومی کوستر .

کذلک (بلا تردد) هم « میدانه کیروب » ه هم ده « دیرمش او دلیر مرتضی شان » ه قید اوله بیلیر . ایکی احتماله کوره بیت « او دلیر مرتضی شان بلا تردد میدانه کیروب دیرمش » و یا « او دلیر مرتضی شان میدانه کیروب بلا تردد دیرمش » مضموننده بولور .

سحر حلالک صحتی ایچون احتماللرک ایکسینه کوره ده معنالک صحیح اولمسی کافیدر . احتماللردن برینک دیکرینده مرجع کورنمسی مقصده خلل ویرمز .

[۰] (صمصامه) عمروک قلیجیدر . (ذوالفقار) دن صکره اشهر سیوف عد اولور .

اصطلاحات ادبیه

سحر حلال

سحر حلال — بیت آره سنده هم کلمات سابقه نك تمه سی هم ده کلمات لاحقه نك مقدمه سی عداولنه بیله جک صورتده برلفظ و یا ترکیب ایراد ایتمکدر .

کوردن اولمش پرکواکب آسمان

خالق اجرامی تبجیل ایلدم

طولدی کوکلم نور ایله بی اختیار

سوره (والنجم) ی ترتیل ایلدم

قطعه سنده واقع (بی اختیار) تعبیری هم « طولدی کوکلم نور ایله » جمله سنه تمه هم ده « سوره والنجمی ترتیل ایلدم » کلامنه مقدمه اعتبار ایدیله بیله جکندن سحر حلال قیلندن عداولنور . برنجی احتماله کوره بیت « کوکلم بی اختیار نور ایله طولدی » سوره والنجمی ترتیل ایلدم — ایکنجی احتماله کوره « کوکلم نور ایله طولدی بی اختیار سوره والنجمی ترتیل ایلدم » مألنده اولور .

مشاهیر شمعان عربدن (عمرو بن معدی کرب) وصفنده اولان آشغیکی قطعه لرده کوره جکمز (بی محابا) و (بلا تردد) تعبیرلری دخی یوقاریکی (بی اختیار) کیدر :

بو صنعت اولدقچه قرین لافات ایسه ده عانت عنوانیه
متناسب کورینه جک بر اهمیت حائز دکدر . بالاده کی مثالرده
بولنشی تصادفیدر . بالالتزام اجرایی اختیار اولنه جق کلفته
دکیز .

(سحر حلال) تمیزی - بر ذات بی وفایه خطاباً یازلمش
اولان قطعه آتیده اولدینی کی - (کلام بدیع) مقامنده دخی
ایراد اولنور :

قصیده م عجزی عرض ایلمشدی
دریغا صورمدک بر کوره حالم
شوصوک مصراعم اولسون سوك خطیم
خرام اولسون سکا سحر حلام

—○—○—○—

استخدام

استخدام - بر لفظك دلالت ایتدیکی ایکی معنایی معاً
اراده ایله هر برینی مناسب اولان جهته صرف ایتدکر .
قطعه آتیده (آچلدی) فعلی بواسلوب اوزره ایراد اولنمشدر :

بهار ایردی آچلدی سودیکم هم فصل دی هم کل [۱]
بری صحن کستاندن بری صحن کستانده

چیتوب برلکده کازاری تماشا ایتسهک اولمازی
کل آنده بلبل آنده جمله آذر بهر آنده [۲]

[۱] «آچل ای فصل دی سن کستانلردن آبلدون کل - ندیم»

[۲] «می آنده دلبر آنده جمله یاران منما آنده - وجدی»


(آچلق) مصدری هم (تباعد) هم ده (شکفتن) معناسنه
کلدیکی جهته قطعه ده کی (آچلدی) فعلندن «تباعد ایتدی»
«شکفته اولدی» معنایی معاً قصد اولنهرق معنای اول مناسبی
اولان (فصل دی) ه ، معنای ثانی كذلك مناسبی اولان (کل) ه
صرف ایلمشدر . شو حالده بیتدن «سودیکم ! موسم بهارک
حاولیه فصل شتا صحن کستاندن تبعاعد ایتدی . کل ایسه صحن
کستانده شکفته اولدی» مآلی استخراج اولنور . بو استفاده
بعض ادبا (صرف الخزانة) نامنی ویرمشلردر .

ادبیات عربیه کتابلرنده تعریف اولندیغی اوزره «ایکی
معنایی اولان بر لفظ ایله اول امرده معنایینک برینی مراد
ایندوب بعده او لفظه راجع اولان ضمیر ایله دیگر معنایی قصد
ایتمک و یا او لفظه راجع اولان ایکی ضمیردن بریله بر معنایی
دیگریله ده دیگر معنایی اراده ایتک» دن عبارت بولنان استخدامک
ادبیات ترکیده اجرایی مغایرت شیوه لسان ایجاب طبعیسنجه
هان هیچ یاقیشیق آلامقده اولدینی کی صورت اجراسنده کی
تکلفه نظراً فہمی تصعب ایدہ جکی دخی آشکار بولندیغندن
بو تعریفه مطابق اولان استخدامک ادبیات ترکیه یه متعلق
محسناندن عد اولنماسی لازم کلیر .

بز (استخدام) دیدیکمز وقت بالاده کوستریلن «بر لفظک
دلالت ایتدیکی ایکی معنایی معاً اراده ایله هر برینی مناسب اولان
جهته صرف ایتک» مفهومی قصد ایدرز .

استخدامك بو درلوسی (استخدام المضمير) عنوانه مقابل
ویریلن (استخدام المظهر) نامیه ادبیات عربیده دخی موجوددر .
یوقاریده افاده اولندیغی اوزره (استخدام مضمیر) ویا (استخدام
ضمیر) دیزیلن صنعت ادبیات ترکیده معتبر اولدمیه جغند مبنی
کیفیت بر نوده منحصر قاله جغندن بز آ کا ساده جه (استخدام)
دیگله اکتفا ایلرز .

استخدام کثیر الاجرا بر صنعت اولماقده برابر حسن
اجراسی حالنده لطافت بخش کلام اولور .



حسن تعلیل

حسن تعلیل — بر اعتبار لطیفه مستند اوله رق بر خصوص

ایچون علت مناسبه در میان ایتکدر .

حسن تعلیلده در میان اولنده جق علتک حقیقی اولماسی یعنی
نفس الامر مطابق بولنامسی شرطدر . حقیق اولورسه
تعلیل عادی دیگ اوله رق محسناتدن صایله میه جغندن حسن
تعلیل تحقق ایتمز . مثلاً اوغلنی حقیقه تأدیپ ایچون تکدیر ایدن
بر پدرك « اوغلنی تأدیپ ایچون تکدیر ایتدم » قولنده حسن تعلیل
بولنده ماز .

کیرلندی کلستانده یشیل یاپراق آردینه
رنك عذار کزدن اولوب شرمسار کل

یتنده ایسه متعقددر . چونکه کلک یشیل یاپراق آردینه کیرلنیشی

ایچون در میان اولنان علت — که مخاطبك رنك رخسارینی
کوره رنك کندی رنكنك آ کا نسبتله لطافتسز کورینه جگنی
آ کلادیغندن شرمسار اولمیدر — حقیقی دکلدر . شاعر مخاطبك
رنك رخساری کلک رنكزدن دها لطیف اولدیغنی افاده مقصیده
بویله بر ادعاده بولنیور . كذلك :

ایتدیك كون ای ملك خورشید رخسارك عیان
اولدی شرمندن پر یلر چشم مردمند نهران

یتنده پر یلرک کوزدن نهران اولشاری ایچون در میان اولنان علت
— که مخاطبك بر کون میدانه چیه رق پرتو نشار جال اولسی
اوزرینه مالک اولدقاری حسنك آ کا نسبتله هیچ منزله سنده
قاله جغنی فهم ایله شرمنده اولمیدر — غیر حقیقیدر .

بالفرض سایه سنده پرورده اولدیغنی وطنندن آریله رق دیار
دیگره کیتکه مجبور ایدلش بر بی چاره هر آدیم آتیشنده الم
درونیسنك تزاید ایتدیگنی حس ایله ایده یولده کیدرکن
— موسم بهار اولدیغنی حالده — هر هانکی جهته عطف نظر
ایلسه او جهتی ککولی کبی حزنه مستغرق بولور سنامه
اولجه پیدا اولمش اولان بر بولوتدن او آرهلق یاغور دوکلمکه
باشلار بتون دنیایی محزونیت ایچنده کورمکه اولان زواللی
یولجی کندیزی کبی الم زده اولمیانلرک انشراح قلب ایله تماشا
ایده بیله جگلی اولطیفه سمایه به توجیه نگاه ایدنجه دیرکه :

اوده اولمش وطن جدا سیار
نه حزین آغلا یور شو ابر بهار

کندیسنک صنایع بدیعیه دوشونمکه وقتی اولمدیغدن بو بیتده
او صنعتلردن هانکیسی موجود اولدیغنی بلکه ده بیلز فقط بزلر
- که له الحمد آسوده خاطرز - دقت ایتدیکمز حالده بیتک حسن
تعلیل ایچون بر مثال اوله بیله جکنی کوررز: قائل بهار بولودینک
پک حزین بولدیغنی آغلاییشنی آنک ده کندی کبی وطنندن آیرلمش
آواره لردن اولدیغنه حل ایندیور. «شوبولوت نیچون آغلا یور؟»
دینلسه «وطنندن آیرلدیغنی ایچون!» دیه جک. حال بوکه ابر بهار
- وطنی ارض ایسه - وطنندن آیرلمش، فقط قائل کبی متأثر
اولمامش. دیمک که بو علت ده حقیقی دکل.

بعض ادبا بو صنعتی (حسن توجیه) نامیه یاد ایدرلر.
تعریفنده (علت) ی (وجه) ه تحویل ایله «بر اعتبار لطیفه
مستند اوله رق بر خصوص ایچون وجه مناسب در میان ایتمکدر»
دیرلر.

حسن تعلیل و یا حسن توجیه اک خوش آینده صنایعدن
معدوددر. بونکله برابر اصحاب ظرافته کوره اجرا سنده صعوبت
یوقدر. اکثراً طبیعی اوله رق کلیر. بوجهته محاورات ظرفا دخی
آنکله زینتیاب اولمقدن خالی قالماز. مثال اوله رق بر فقره ایراد
ایده لم:

اصطلاحپردازی سونلردن بر ذات محترم بر آقسام بعض

بندکاتی قوناغنه دعوت ایدر. برخیلی مصاحبت جریان ایتدکدن
صکره بونلردن مسنجه بر ظریف اصول ایله قالقار، اوطور مقده
اولدقلری اوطه نك اتصالده کی تنفس اوطه سنه چکیلیر. اولدن
یاشنده قاعد بولنان رفیقی ده آرقه سی صیره اورایه کیدر. یاریم ساعته
یقین زمان کچر. صاحب دعوت بر آره لق «بونلر نره ده قالدیلر؟»
دیه قیام ایله آغیر آغیر کیده رک تنفس اوطه سندن ایچری کیرر.
اواشاده ظریف ایکی ثانیه اول جیبندن دوشه رک اوزرنده لامبه
یا مقده بولنان قونصولک آلتنه طوغری تکرلنش اولان بر آلتونی
آرامقله مشغول بولنور. صاحب دعوت کیرر کیرمز دیرکه:
«نیچون اوله خیده قامت اولدیکز؟» ظریف در حال شو جوابی
ویرر: «تکرار خاک پایکزه رومال عبودیت اولمق ایچون!»

تحفی شوراسیدرکه ظریف بو حسن تعلیلی ایراد ایله افندیسنی
محظوظ ایتدیکی صیره ده رفیقی ده «افندم! جیبندن بر آلتون
دوشدی ده...» حقیقتدن دم اورر. کویا که بویله یرلرده
حسن تعلیه مقابل تعلیل حقیقینک نه درجه لرده صوغق
دوشه جکنی اثبات ایتمک ایستر.

بالاده کی مثاللرده کورلدیکی وجه ایله حسن تعلیل دائماً
بر حکم قطعی صورتنده اجرا اولنور آند بوضورتک مغایری
اولان ظنه دلالت ایده بیله جک لفظ بولنماز حسن تعلیل طرزنده،

شبه حسن
تعلیل

فقط ظنه مستند اوله رق ایراد اولنان تعلیلات (شبه حسن
تعلیل) عنوانیه حسن تعلیلدن آریلیر مثلا :

بارش باران مصادف دوشندی هجران شامنه
اولدی صاندم حالمه رحم ایلوب کریان سحاب

یقتنده مندرج «سحابک آغلامسی بنم شام هجرانده کی حالمه
ترچندندر» مضمونی حسن تعلیل قییلندن ایسه آره یه کیرن
(صاندم) فعلی افاده نك ظنه مستند اولدیغنی تعیین ایلدیکنندن بوکا
(شبه حسن تعلیل) دینلک لازم کلیر



استلاف

استلاف — یش نوعدر :

- لفظك معنى ايله استلافی.
- لفظك وزن ايله استلافی.
- لفظك لفظ ايله استلافی.
- معنائك وزن ايله استلافی.
- معنائك معنى ايله استلافی.

لفظك معنى ايله
استلاف

لفظك معنى ايله استلافی — عبارده افاده اولدیجق معنایه
موافق دوشمیدجك الفاظ بولنماقله تحقق ایدر

لفظك معنى ايله استلافی حتمده برفکر حاصل ایدلک ایچون
الفاظك سمعه تأثیر ایتک جهتیله اولان احوالی نظر دقتیه
آقلیدر (جلادت، صدمه، غضنفر، چکا چاک، رخشان،

کلبانك) کبی بعض الفاظ سمعه قوتلی کلیر. بونلره (الفاظ جزله):
حائر اولدقلری کیفیتیه ده (جزالت) تعبیر اولنور. (تبسم،
جزء، قم، زلف، کل، ناز) کبی بعض الفاظ ایسدقولاغنه خفیف
طوقنور. بونلره (الفاظ رقیقه)، حائر اولدقلری کیفیتیه ده
(رقت) نامی ویریلیر.

طبیعی کرك الفاظ جزله، کرك الفاظ رقیقه استعمالنه سوق
ایدن شی مقتضای مقامدر. مثلا براردو قوماندانی عسکره
خطاباً ایراد ایدیه چکی نطق الفاظ جزله دن تشکیل ایتکه چالیشیر،
چونکه برمعسکر نازکانه اداره کلام ایدیه چک یردکلدر بالعکس
برعاشق کوکلنی جذب ایتکه چالشیغنی معشوقه سنه الفاظ رقیقه
ایله سوز سويلك ایستر، زیرا سمع دلبر کلمات شدیدیه نك هجومه
تاب آور اوله ماز.

عبارده لردء الفاظ جزله ایله الفاظ رقیقه مختلط بولنقی
ضروری اولدیغنه کوره اوزونجه بر مقاله ویا منظومده نك صرف
الفاظ جزله ویا صرف الفاظ رقیقه ایله ترتیبی متعسر اولدیغنی
قابل انکار دکلدر بو حالده دقت اولنه جق جهت الفاظ جزله
مقامنده الفاظ رقیقه و بالعکس الفاظ رقیقه موقعنده الفاظ جزله
ایراد ایدیه مک خصوصندن عبارت اولمق لازم کلیر بر سخنورک
مهارتی فرصتی فوت ایتیدرک هر لفظی یرنده ایراد ایتلک مسئله.
سندء کوریلور مقصد سوزك هیئت عومیه سنده جزالت ویا
رقت کوسترمکدر بعض الفاظك نابجمل اولدق ایرادنن، مطلوب

اولان جزالت و یا رقت مختل اوله بیله جکی کبی بعضاً جزالت رفته و یا رقت جزالتیه مبدل ده اوله بیلیر بوضورتیه کلام متکلم مقصودینه مخالف بر نتیجه حاصل ایتکه مستعد بولنور بینلرنده فرق جزئی بولنان الفاظک تبادل بیله جزالت ورقتیه اجرای تأثیر ایلر مثلاً نفعینک بر قصیده سنده واقع :

چالندی بام فلکده نقاره دولت
پر ایتدی دبدبه مرده کوش ایامی

ییتنده (دبدبه) یه بدل (زمرمه) کتیر لسه سوزک جزالتیه انکسار کلیر کذلک آثار کترانه مدن :

زلفنه ویردجه نسیم اهتراز
اوستنه تترر دل ناز کترم

ییتنده (ناز کترم) یرنده (غمرورم) دینلسه سوزک رقتی منکسر اولور

لفظنک معنی ایله ائتلافی نه قدر یولنده اولورسه سوز اودرجه مکمل اولور حتی بینلرنده تقارب و یا مترادف بولنان ایکی لفظدن مقامه انسب اولان ایراد ایدلرسه کلام - ائتلاف جهتیله - نقیصه دار عد اولنور ایکی محرر طرفندن بر فقره یازلسه، بینلرنده کی فرق متقارب و یا مترادف اولان ایکی لفظدن بری برنده، دیکری دیکرنده بولنقدن عبارت اولسه آره لرنده ائتلاف جهتیله تفاوت بولنقدن ایجاب ایدر هانکیسی انسب اولان لفظی حاوی ایسه رحجان آنده قالیر بورالرنی بینلر قابیلدرکه

ادبیات تامنه « لفظه باقماز ، معنایه باقیلیر » دیمکده معنی اولدیغی میلسونلر ؟ کچلرده بر مناسبتله :

بر سائحه نك اولسی حقیله میجل
اولقله اولور سبك ومؤداسی مکمل

دیمش ایدک . بو بابده :

سوزمیدر اول که چپ و راست دوشه مضمونی
نیجه معنای درستن بوزه بر لفظ سقیم

دیمش اولان نفعی ایله متفقز . ائتلاف جهته التفات ایتک ایستینلر استغنا لرنده اصرار ایده طورسونلر . بز لفظه ده ، معنایه ده لایق اولدیغی قدر اهمیت ویره رک صحیحاً ادبیاتدن معدود اوله بیله جک اثرلر وجوده کتیرمکه چالیشهلم .

سوزک هیئت عمومیه سنده کور یله جک جزالت و یا رقتک منشأی معنادن عبارت اولان فکر در . بر فکر میدانیه حقیقه جفی وقت حالنه مناسب کسوه ایستر . اوده لفظدر . بر کوزل نه قدر اویغون لباس کیرسه حسنی اودرجه رونق بولور . هنر آکا هانکی لباسک اک زیاده یاقیشه جفنی بیلکدر . تز بیناتنک بر جهته نقصان قالسه آرزو اولنان کمال رونق حصوله کلمز . فکر اولور : کسوه سی متناسب اولدیغی ایچون درجه استعدادینک فوقنده پارلاق کورینور . ینه فکر اولور : کسوه سنده تناسب اولماق جهتیله مستعد اولدیغی مرتبه نظر ربا کورنمز . « قدمایه پیرو اولهلم ! » دیمک خیالمنزدن بیله کچمز . مقصدمز « بر فکرک

حق نه ایسه او ویرملی! « دیکدر قابل ترین اولان بر فکری
نیچون ترین ایتمه ملی؟

جزاته مثال:

— مناجات —

وقت غروب حلول ایتش. آرتق شهریار شعشه بار نهار [۰]
کردونه ظفر شعارندن کمال عظمت و وقار ایله ایدور. وجه رخشانی
انظار دن نهان ایدن سحابه تلپان آسمانده بر اقدینی ممدود و زرانندود
ایزلی محافظه ایتکله برابر انعکاسات ارغوانی رنگ ایله آفاق مستغرق
انوار ایلور. کره قر ایسه قبه فیروزه قام ایچنده معلق بر فلکوس زرین
کی افنده جلوه نما اولور. بر تولطینی چنزار اوزرینه بی تابانه دوشدیکی
حالده پرده جهانپوش لیل طاغ باشلرینی اورتهرک سطح صحرایه طوغری
میل ایدیور.

بوساعت طبیعتک حلول ایتکده اولان کیجه ایله تباعد ایلمکده
بولنان کوندوز بیننده اکتساب شوق جدید و خالق لیل و نهاره طوغری
رفع روی امید ایدرک برلسان بلیغ ایله قدرت فاطره سنه قارشى متحیرانه
عرض تعظیبات مقدسه ایلدیکی ساعتدر.

کبریا کاه رحمت پناهندن آهنگ عمومی کائناتی ایشتمکده اولان خلا
البته بنم عظمتته قارشى جمله دن زیاده حیران و نام طمکیرینی آ مکقدم جمله
ایله یکزبان اولان ادراک عاجز مک زمره سنی ده ایشیدر. تبجیلات بی نهایت
سبکا ای ذاتک و ماسواسنک اصل اقدسی اولان وجود واجب! سن که بر
نظرله ابعاد نامتناهی مظاهر آثار قدرتکله مالا مال ایدرسین، خالفسین،
مرئی عوالمسین، روح کائناتسین الهی!

بویله بیک نام ایله یاد اولندیفک، هیچ برسیله ده بحق تعریف اولنه.

[۰] کونشدن کنایه.

مدیفک حالده سکا جدا ایمان ایدنلردنم. ای حسن اتم واحسان اعظم
صاحبی! بویمان دخی سکا تقدیمه شایان عد اوله حق پرشی دکلدور...
[لاماریندن ترجمه]

دیگر:

— فورتنه —

افنده عظمتی، هیبتی ایکی سحاب ظلماتی کوریورم. کیتدکجه
تکائف ایدیور. تکائف ایتدکجه باران دهشت یاغدیوریور. بر نقطه ده
طورمیور. آن بآن یوکسلیور. یاییلیور بیویور. کوك یوزینی قاپلايور.
اوزاقدن اوزاغه شدتلی برکوك کورلنسی ایشیدیورم. کره نسیمی
طالغه لاندیریور. سطوح میاهی لرزه ناک ایدیور. شودرین وادینک
ایچنده نه قدر یاپراق کوریورسم جمله سی لرزشده! بویدن بویه بر
سیلابه رعشه در آقوب کیدیور!

سلاسل جبال کدورتبخش اولان آوازه هول انکیذر رعدی ایستدیکی
کی چکدرک اوزادوب کوتوریور. جهان ایکله یور. بوکورتانی بی متعاقب
اورته لنی مدهش بر سکوت استیلا ایدیور. بر یوزی خشیت و حیرت
ایچنده ظهور عاقبت کاره منتظر بولنیور.

باقکز! عظیم طاغیر، جسم قایالر بردن بره قویو رنگ خاکستریده
بر پرده جهانپوشه بوزندی. کیتدکجه بسط اجنه ایتش اولان اوقوجه
بولوتلر بولتری کوزدن نهان ایلدی.

آره لق آره لق خطوط برقیه بولوتلری شرحه شرحه ایدیور.
صاعقه آفاق پرطنین ایتکده اولان صیحه لرله بارلدايه بارلدايه بولوتلرک
آره سندن قایوب کیدیور.

کیجه پک مظلدر. کیتدکجه توسیع دائرة تنویر ایتکده اولان
شیمشکر چاقدقجه بویله ظلمای بلاهن کوندوزلر ایجاد ایدیور. کیجه
بر آنده کوندوز اولور. ینه بر آنده کوندوز کیجه کسلیور.

غرب تاریکدن فیلامعده اولان ریاح شدیده ییلدیرم کبی صحرادن
کچرکن چیلدرمشجه سینه دونوب طولاشمه باشلایه رق یوللر اوزرنده
موجود ایزلری نابید ایلدیکی ائزاده هوایه قالدردینی ریک سیاه ایله قاریشیق
موحش برقاصیرقه تشکیل ایدیور. یکی بره ره بولوت میدان کترین
بوگردباد مدهش دوران بقیه ضیای برقی ده انظاردن ستر ایلپور.

نواقیس ولوله پرداز اصوات خاشه ته سیله پریشان اهالی بی برسیل
عظیم کبی عبادتخانه لره طوغری روان ایدیور.

یاروب العالمین! زیر قدم عزتکده متجمع اولان شوغلکزده قوللریکه
برکره نظر بیور! برسال کاملک مکافات مساعیسنی سندن ایستیورلر!

هیها! آتشین آسماندن یاغمقده بولنان کرات منجمده ذاتا یرلره
سرملش اولان باشاقلری ازوب محو ایدیور. رعد وروزکار بولوتلری
یاروب یرتیور.

ز الی چمتجی کش ، الدن کینمش اولان تارلاسنک حالتی یأس
وحیرتله تاشا ایلپور. بودامیه نیک دهنستندن بوزلمش قالمش اولان
چوجقلری قوجافنه آلمش ، مشهانه بغرینه باصیور. ییلدیرم ینه آتشلر
صاحبور. آوازه هولناک ایله دوشیور. صاعقه زده اولان یوکسک
طاغلر دن توتولولات عظیمه ایله قوملر ، طاشلر ، قایالر ایندرمکده اولان
سیلر منبت تارلالری چیکنه یوب کچور...

[سن لامبردن ترجمه]

دیگر:

— نعت شریف —

باشلار ایمان اتمکه برنیر عرفان
هر لحظه افولن کوزه دز شیر طبعان
اعداسنک آلاقلنی ایتدکجه توالی
ایلر اوضیا کسندر آفاق تعالی

برق اوردی جالندن اوامی یتیمک
اک شعله لی فیضی خداوند حکیمک

بردرس ادب ویردی که اصحاب ذکایه
حیرت ویرر آثاری فحول حکمایه

برنور میندرکه بوتابشکه انوار
برمثلنی اولسون ایده من تا ابد اظهار

هم صورتی هم سیرتی اولغله مکمل
شایسته کورلمشدر آکا پایه اول

فخر ایتلیسن ای شرف نامتناهی
زیرا سکا مظهردر اومحسوب آسمی

دیگر:

— صلاح الدین ابوبنی به —

شایسته تقدیسسنین ای مهرد قدر زور
ایتدک اوقضا اردولرین رجسته مجبور

ملتجه نصل ایتیمه نامکه تعظیم
اعدا دخی ایتشددر ایدر فضلکی تسلیم

تیغکه قازاندک ابدی شعله برنام
ملت سکا دیر حشره قدر حامی اسلام

علویت فطریه ده انگشت نما سین
بکزر روشک حیدره برشانی فتاسین

دیگر:

— تزلزل —

تکلیفی و یروب جنونی آلمش
 دریا یننه اضطرابه طالمش
 اولمش کجه رله سکون زمانی
 هر طالعیه سی بر جنون جهانی
 اتمش هیجانله سطح دریا
 بیک وادی هولناک پیدا
 اولمده در آن بآن سرافراز
 هر موج عظیم دهشت انداز
 صیدر مه ده روزگار برفن
 هر طالعیه بر قبا کور بوکدن
 بر آبریمه قارلی طاغ کسلمش
 هر موج کف نثار مدهش
 آرا میرای ناظر و ندر
 چوق باقه محرک الجنوندر
 قومشمی نه در قیامت ابواه
 تسیر ایدیور جبال الله [۰]
 اولنده هزار طور سیار
 یکدیگره پشدار و دمدار
 ساحل کورینوری قورقوسندن
 کیزلندی بو طالع اردوسندن

[۰] «وسیرت الجبال» آیت کریمه نه تلمیحدر.

ای باد! کسلمه امتداد ایت
 آاز کلدی بوقوت اشتداد ایت
 صوک شدقی طورمه ایله ابراز
 قارشیکده وارایشته بر سر انداز
 دریا! بنی ایله بر تماشا
 سندن ایده جگهی یم تخاشا
 بر طامله کوزمده اک بیوک موج
 ویر من بکا قورقوبوله بیک فوج
 بازیجه باصره مدر امواج
 مغلوب متاندر افواج
 یک کوچی وداع دهر فانی
 اولشمی حیات جاودانی
 افتا ایله روح قورقودلار
 طوفان ایله نوح قورقودلار

ورقته مثال:

— چیچکلرم —

سوعلی چیچکلر! نه طور یورسکیز؟ بر آن اول آچیلکیز! یک
 اختیارم. بر نفس اول آچیلدیغکیزی کورمک ایسترم. همان شکفته اولکیز که
 لطافتکیز صباحی پر تبسم ایشون، بوی لطیفکیز آقشامی تعطیر ایلسون.
 آچیلکیز فردایه قاله جق اولور ایسه بنجه یک کجکمش اولور.
 اختیارلره کوره هر نفس نفس واپسین صاییلیر. نه ییلیرسکیز! بوکون
 ستری ایتسامه تشویق ایدن شوکونش یارین بلکه بنم تاپوتم اوزرینه
 پرتو انداز اولور!

چیچکله! بزم کی سزده بلادن آزاده اوله مازسکر. مضر حیوانچقلر
اوزرکزه اوششورلر. شدتلی روزکارلر اسر. دهانهلر اولور! بن که
بونجه سنه یاشامش بریرجهان دیدیم، آجلمه دن صولش نه قدر غنجه کوردیم!
قورقیکز، سزی قوباریم. برسالخورده دکلیم؟ سزدن کوزله
بردمت یاپوب ده هانکی دلبره تقدیم ایده بیلیم؟

نظریات بی فائده ایله پک یورلدم. زیر سایه کزده اولقی اوزره آماده
ایدیله جک صوک خوابکامه چکلمه ده آرتق خواب جاویده طلسم!
دنیا به وداع ایده جکم ساعت بوراده، یلانکرده حلول ایدر ایسه
مخطره شباب اولان رواج لطیفه کز بی اوساعتده دخی نغمه پرداز عشق
ایده بیله جکدر... [برائزه دن ترجمه]

دیگر:

— زواللی قیز —

ایچنده هیچ برکوزل رؤیا کورلمک احتمالی اولیان شومنحوس اویقودق
اویانیر اویاناز طاغ باشنه چیقهرق کونشک ایلمک شعاعلری قارشیلادم.
هنوز اویقودن اویانمش بریاورو قوشجغز تازه چیچک آچمش بر
آغاجک اوزرنده حزین حزین اوتیوردی. اوزمان بزم کوزلرم یاش
ایله طولش ایدی.

آه! نیچون واللدهم یوق؟ یووه سی آغاجک دالی اورتنه سنده آهسته
آهسته ساللانمقده اولان شوقوشجغز کی نیچون بختیار اوله میورم؟

بر یوزنده هیچ برشی بزم دکلدیر. بشیکم بیله بو قدر. بی چاره
والده سی طرفندن کویمیزک معبدی اوکنده کی طاشک اوزرینه براقلمش
زواللی بر قیزجغزم!

آنامدن بابامدن آیری دوشدم. اوقشایشلرنده کی لذتی بیلیم. کوی
چوجغلری بکا هم شیره دیمزلر. یونلرک اویونلرینه ده قاتیلیم.

کیفلی چفتجی بی کولکه لکنک آلتنده اوطورمه هیچ چاغیرماز.
یانوب چیتردامقده اولان آصمه دالیرینک قارشیسنده چوجغلرینی قوجاغنه
آلهرق اوپوب اوقشادیغنی اوزاقدن سیر ایدرم.

نه یاپیم؟ آغلايه آغلايه معبد طوغری روان اولورم. دنیا ده
بزم ایچون قاپوسی آجیق بولنه بیلیر بریر وار ایسه اوراسیدر. دنیا
المیرینی اوزرنده چکمکه باشلادیم طاشه کوزلری دیکرم. بی براقدیغی
زمان والده مک سرپمش اولدیغنی خیال ایتدیکم کوز یاشلرینک اثرلرینی
آزارم. بعض کره ده تنها منارلغه طوغری قوشارم. بکا منارلرک
هپسی بر کورینور. بی چاره قیزجغزک یر اوستنده آناسی باباسی اولدیغی
کی یر آلتنده ده یوقدر!

اون دوت بهار موسمی کجدی که بی ترک ایتش اولان آغوشدن
جدا اولهرق آغلا یورم. والده جکم! کل کل! بی براقدیغک طاشک
اوزرنده سنی بکلیورم... [صومه دن ترجمه]

دیگر:

— صوک تشیده —

بکزه درکن دامن طاوس قدسی باله
اش طوتارکن قامتن نورسته طوبی دالنه

ورد فردوس برین دیرکن عذار آلنه
آز کوررکن نور اسود نامنی فرخالنه

نقطه امید دل تعبیر ایدرکن خالنه
ذاتنک عالمده ویرمنکن وجود امثالنه

دون کیجه جانانی بکزدیم باقنجه حالنه
جان بلب بر عاشقک امید استقبالنه

دیگر:

- آوجی -

قوشلرم! مزده آوجیکز کیدیور
 کوردی بر باشقه آو شتاب ایدیور
 برکن یوق تباعد ایتدی کیدن
 شمدی آهنگه باشلاک یکیدن
 قالدی شمدیلک محل حذر
 ویرکز مشربجه بر قونسر
 ویردی مهلت زمانه بر مقدار
 اوتک اطراف اوتدیرک تکرار
 لکن اول ظالم طبع پرور
 بورالردن یارین ایدرسه کذر

موصکز قوشجفرلرم موصکز

لفظک وزن ایله ائتلافی — « ایرادی انسب اولان لفظدن
 ایله ائتلافی عدول ایله آکا بدل لفظ دیگر ایراد ایدیلک » و « تقدیم
 وتأخیرده طبع سلیم تعیین ایله جکی حدک خارجنه چیقلیق »
 صورتلرینک انتفاسیه تحقق ایدر.

ایرادی انسب اولان لفظدن عدول ایله آکا بدل لفظ
 دیگر ایراد ایدیلر و یا تقدیم و تأخیرده طبع سلیم تعیین
 ایدهاجکی حدک خارجنه چیقیلر ایسه لفظ وزن ایله ائتلاف
 ایتمهش اولور. ایکنجی صورت برنوع (ضعف تألیف) دیمک

اولدینندن نظمی برنجی صورتدن زیاده معیوب کوسترر.
 بر نظمک متبول اولمسی ایچون بو صورتلردن برینک
 وجودی کافیدر. ایکیسنی جامع اولور ایسه بالطبع بتون بتون
 مردود اولمسی لازم کلیر. ثابته:

کلیر بانک سناک الله خاک مرده غمدن
 الندن سقی کلچر رنه تک پمانه دوشدک

ییتنده انسب اولان (شهید) بدل (مرده) کتیر استندن،
 نائی قدیمک:

خاطرده ذوق دله صفا تنده یوق مجال
 ارباب غم ایرشه ده نوروزه نیلون

ییتنده دخی (مجال یوق) موقعنده (یوق مجال) دینلستندن
 ائتلافه خلل کلشدر. راعب پاشامک:

کورسه اغیر ایله جاناسنی بزم شراب
 عاشقک باغری کبابه تب غیرتله دوزر

ییتنده ایرادی انسب اولان (آتش) بدل (تب) کتیرملکله
 برابر « عاشقک باغری تب غیرتله کبابه دوزر » جمله سی وزنه قونلق
 ایچون تقدیم و تأخیر حدینک خارجنه چیقلدیغندن ایکی صورتله ده
 ائتلاف مفقوددر. تصویر دیکرله: عدم ائتلاف سبیلرینک
 ایکیسی ده موجوددر. بو حال ایله ییتنده (بزم، شراب، باغر،
 کباب، دوزر) لفظلرینک اجتماعدن حصوله کلن (مراعات نظیر)
 صنعتک نه قدر اهمیتسز قاله جفی ایضا حدن مستغیدر.

لفظك وزن
ایله کال استلافی

لفظك وزن ایله کال استلافی نظمك نثر دن فرق اولنمید جق
صورتده کلفتسز اولمسيله حصوله کلیر. بویولده اولان نظمك
نثر دن فرقی یالکز موزونیت اولور. حتی نثر صورتده یازیلده جق
اولسه اوزان ایله الفتی اولیان طبیعت نظم اولدیغنی حس ایده مز
ایشته اصل نظم طبیعی بودر. اک لطیف شعر لر بودر لو نظم لر
ایچنده بولنور. اک کوزل فکر لر بوا سولده منظوم اولمق ایچون
حسرت چکر. محفوظ مز اولان نمونه لر دن بعضی لر نی کوستره لم :

مصارع

یارب بو آفرین نه توکنمز خزینه در !
بونشته نك صوکی البته سر کرانلندر
کنارک دلبری نازکده اولسه نازنین اولناز
مناسبتله اولان افترا نه مشکل ایمش !
حرف رجا ز بزم ایله آشنا دکل
الله صافلاسون، بونی حساد ایشتمسون !
تقلید زاغ کبک خرامانی کولدر
آدمه جبه و دستار کرامتی ویرر ؟
کنج استغنا کی برکوشه راحت می وار ؟
کل موسمیدر دفتر و دیوانه باقلماز
همم شهبازی آلقاقلرده پرواز ایتدی
وقت شادی ده کلیر موسم محنت ده یکر
شیخ غالب

فیض ازلی مرید کلهداره می مخصوص ؟
عاشقک حال دل زار نی اقه بیلیر
خاییده سخن مرید سخندانه یاقه ییز
تزه کل یار اغیدر باد سحر دن اینجیر
واعظک نارجهنم دیدیکی فرقت ایمش !
جان مرغی آرمیده دکلدر رمیده در
آب وهوا اولنجه بر خاک کن نه بتمز ؟
مجریدر که باران مبتلای عید قرباندر
بازارده کالای معارف صاتیلیری ؟
فصل بهار مرغ خوش آرازی سویلدر
چشم مستک نیجه کویالری خاموش ایلم
بوباغک غنجه رعنا سی محتاج بهار اولناز
بو بزمک باده نوشی مست اولور اما خراب اربلاز
هزار احباب اولان اهل تلوندن وفا کنر
مروغند اولان ناکامی دشمنه کام آلماز
عالم فانیده رسم زندگانی بویله در
ارباب دله ثقت نادانی نه بلادر !
آشنایه آشنا بیگانه یه بیگانه یز
انسان کامل اولنجه سعی ایله آدم اول
ابن انجار شیخ رضا
اصولی
خیالی
واصف اندرونی
فطنت
شیخ الاسلام بهایی
راغب پاشا
جوری
باقی

افندی! کنج بکه خدمت ایلدک کوچ ایش
 ایل عید اکبر ایلدی بن ماتم ایلدم
 روز کارک اوکنه دوشین آدم یوریلور
 ثابت
 حلیمکرای
 باقی

ابیات

اظهار کین شعار دل زارمن دکل
 اغیار ایله جدال بزم کارمن دکل
 نه قصر دلکش کاشن نه صحن باغ آراز
 شوتکننده همان گوشه فراغ آراز
 نابی
 راغب پاشا

دنیا بی بر صفایه ویرن رند بی نوا
 کمتر متاع ذوقی دنیا به ویرمه مش
 جوری

غنا ی قلبه سبب دولت قناعت ایش
 جهانده جای فرح گوشه فراغت ایش
 فطنت

میان لاله محنتده چاره سز قالدق
 بر آرز مساعده روز کاره محتاجز
 ثابت

محیط دائره عشقندن خروج محال
 نه چاره قبضه تقدیر کرد کارده یز
 عونی بک

مجر بان امورک کلامی کر چک ایش
 یالان دیدکری دنیا بی بویله بیلدز ایدم
 »

بن سنک آب حیات لبکک تشنه سی ی
 طالب چشمه حیوان ایهسم انسان دکلم

اصحاب طبیعت کوره کمال ائتلافی حاوی بر مصراع، بر بیت
 نظم ایتیمک او قدر کوچ بر شی دکدر. فقط بو طبیعتلکده بش
 بیتلی بر غزل سویلک حقیقه مشکدر. اکثریا بویله طبیعی اوله رقی
 سویلنیلن سوز وزنه کلز. وزنه کلن سوز بویله طبیعی اولماز.
 ذهنزده کمال ائتلافی حاوی اوچ درت بیتدن متشکل بر منظومه
 آرادق. مشارالیه عونی بکک بر نشیده سندن اولان ابیات آتیه بی
 بوله بیلدک:

— سوز —

سوز کالبد قدر بی آدمه جاندر
 سوز واسطه رابطه عالمیاندر
 سوز بر نفس سازج بی ونکدر اما
 بر همزن صورتکده کون و مکانددر
 یارب بونه حالت بونه تأثیرکه بر سوز
 رونق شکن معرکه سیف و سنانددر
 یارب بونه قدرت که سرایای ممالک
 فرمانبر شمشیر جهانگیر زبانددر

بر نظمک بوقیلدن عد اولنسی دور اصلاح ادبیات دینلکه
 استحقاق کویسترن زمانمزده تجویز ایدله مکده اولان مسامحتدن
 سالم بونفسنه متوققدر. یالکز ترتیب الفاضله اولان طبیعتک
 کفایت ایتمز. مثلاً باقینک ضروب امثال عثمانیه صیره سنه
 کچمش اولان:

کورم آینه دوران نه صورت کوستر

عصرای ترتیب الفاظ جهتیه نثر کی اولدینی حالد (کورم) بزجه تجویز اولنده میه جق برامالیه شامل اولدیغندن ینه بزجه نظم طبیعی مثالرندن عد اولنده ماز.

— استطراد —

بومصرع زمانزده سویلنمش اولسه (کورم) ه بدل (باقدم) دینیلیدی. باقی معاصرلرندن نوعینک کذلک ضروب امثال عثمانیه صیره سنه کچمش اولان و باقینک مصرعی کی امالیه اولدیغندن بزجده نظم طبیعی مثالرندن معدود بولنان :

بروجه ناظرز کورم حق نه کوستر

عصرای ده بومدعای اثبات ایدر شواهد دندر

(انتهی)

زمانزده تجویز ایدلمکده اولان مسامحاته کلنجه : بونلر

طبیعیات موانعندن معدود دکدر . بالاده کوسترین

کنارک دلبری نازک ده اولسه نازنین اولماز

مصرعی بری (دلبری) ده ، دیکری (اولسه) ده اولمق اوزره ایکی امالیه شامل اولدینی حالد طبیعیلکدن چیقیش . ایلان .

فیض ازلی مراد کلهداره می مخصوص ؟

آب وهوا اولنجه بر خاکدن نه بیتمز ؟

بو باغک غنجه ره ناسی محتاج بهار اولماز

کی مصرع اولرده کی اماله لرده بویه در . (اماله) مجتده ایضاحات ویریه جکدر .

بعض اسباب وارد که سلیقه شاعرانه بی (نظم طبیعی) دیدیمکز بوضورتدن عدوله مجبور ایدر . نثر کی یازلمغه مستعد اولان بر نظم تقید می تأخیری یازدیرر . بوحالد طبیعیات ایکنجی صورتده بولنور . نثر کی یازلمش اولسه طبیعیکه رعایت ایدله مش اولور . (تقدیم — تأخیر) مجتده ایضاحات ویریه جکدر . لفظنک لفظ ایله ائتلافی — آره لرند انسیاق کلام جهتیه اناک زیاده مناسبت اولان لفظلرک اجتماعیه تحقق ایدر .

لفظک لف
ایله ائتلاف

آشایکی پارچه لرده (ییلدیریم) و (تیمور) ایله (سپر صا - عقه) نک ، (قولومب) ایله (کوکرچین) ک ، (نوح) ایله (طوفان) ک ائتلافی او یولده در :

لکن ییلدیریم اقلیم عثمانی بی جولاننه مساعد بولدیغندن اطرافنده اولان حصار انحصاری دورمکده و خارق عاده بعض اطوارینک صدماتی اساس اداره یه خلل ویرمکده ایکن تیمور مشهور بر سپر صاعقه کی طریق استیلاسنه دیکلمشدر .

[دور استیلا]

فی الحقیقه مشهور قریستوف قولومب سفینه نوحدن طوبراق تحریرنه کیدن کوکرچین کی برشدلی طوفان اعتراض آره سندن چیقهرق آمریقایی کشف ایله عالم انسانیتنه ینه بو عالم ایچنده بر جهان دیگر الحاق ایتکه طنوزنجی عصرده موفق اولمش ایدی .

[جزی]

شیخ غالب بیت آئیده (یا قوت) ایله (الماس) ی پارلاق بر
صورتده تألیف ایتشدیر :

یا قوت کی شراب انکور
الماس کی پیاله نور

بالفرض :

یا قوت کی شراب انکور
آئیده کی پیاله نور

یا خود :

تسلیم کی شراب انکور
الماس کی پیاله نور

معنائک وزن دینلسه او پارلاقلق قالماز .

ایله ائتلافی معنائک وزن ایله ائتلافی -- فکرک جریان طبیعیدن حقیقه
مسيله تحقق ایدر .

ثابتک شوبیتی بوائتلافدن محرومدیر :

کنار حوضده مهتابه قارشی سینده چاک اولمق
ایدوب عکسیله حوضی معدن سیاب لب بر لب

«کنار حوضده مهتابه قارشی سینده چاک اولمق» خصوصتک
تصورتده «عکسیله حوضی لب بر لب معدن سیاب ایتک» کیفیت
تقدیمی طبیعی اولدیفنده کوره «کنار حوضده مهتابه قارشی سینده
چاک اولوب عکسیله حوضی لب بر لب معدن سیاب ایتک»
دینلک لازم کلیرکن وزنک تضییقه «عکسیله حوضی لب بر لب»

معدن سیاب ایدوب کنار حوضده مهتابه قارشی سینده چاک
اولمق «دینلشدیر» .

معنائک معنی ایله ائتلافی — بر خصوصتک دیگر ایکی
خصوصدن هر برینه مقارنتی ممکن ایکن بونلرک مناسب ویا
انسب اولاننده مقارن اولمسیله تحقق ایدر .
مثال :

جهان برتازه رونق بولدی برروح مصوره
عجبی تازه لنسه داستان ماه کنعانی

جهان اولدی مسلم برجهان آرا شهنشاهه
پرایتدی نهرواقی غلغل کوس جهانبانی
[نفی]

ایکنجی مصراعلر یکدیگرک یرینه کچیریلرک بیتلر :

جهان برتازه رونق بولدی برروح مصوره
پرایتدی نهرواقی غلغل کوس جهانبانی

جهان اولدی مسلم برجهان آرا شهنشاهه
عجبی تازه لنسه داستان ماه کنعانی

صورتده قونلسه ائتلاف خلپذیر اولور : چونکه «جهان برروح
مصوره تازه بررونق بولمق» جهتیله «ماه کنعانی داستانک
تازه لنسی» — «جهان برجهان آرا شهنشاهه مسلم اولمق» مناسبتیله ده
«کوس جهانبانی غلغلک نهرواقی پرایتسی» انسبدر .
کذلک شاعر مشار الیهک :

شکوه بخت و اقبالیه نزنده شهنشاهی
کمال عدل و انصافیه پاینده جهانبنی

بیتی :

شکوه بخت و اقبالیه پاینده جهانبنی
کمال عدل و انصافیه نزنده شهنشاهی

شکلنه افراغ اولنسه ینه اوقییلدن برعدم ائتلاف پیدا اولور .

—==—

حشو — اساساً ایکی نوعدر :

— حشو مفسد .

— حشو غیر مفسد .

حشو مفسد

حشو مفسد — افاده سی مقصود اولان فکری اخلال
ایدن حشودر .

حشوک بو درلوسی معنایه طوقونه جنی جهتله لفظ غلبه .
لکندن عبارت قالماز ، اساس مقصدی خراب ایدر . سوز
آره سنده حشو مفسد ایرادی متکلمک ها نکی فکری ترویج
ایتمک ایستدیکنی بیلدیکنه حکم ایتدیره بیله جک بر بیوک نقیصه
اولدیغندن اساتنه آثارنده پک نادر بولنور . بولنانلرده اک بیوک
آدملرک بیله مخرطه عجز بشر اولان تأثیراتندن قورتانغه مقتدر
اوله مدقلری غفلته حل اولنور . نفعینک نصوح پاشا مکتوبی
وصفنده کی قصیده سنک مطلعی اولان :

نه نامه در بوکه حسن بیان عنوانی
ایدر کشاده دل و طبع مستمندانی

بیتمند واقع (عنوان) لفظی حشو مفسد عد اولنه بیلیر . چونکه
شاعرك مقصدی نامه نك هیئت عومیه سنی مدح اولمق لازم
کلدیکی حالده (حسن بیان) ك (عنوان) . تخصیصی سائر
جهتترینک حسن بیان مزیتندن عاری اولدیغنی ایهام ایدیور .
فی الواقع آلت طرفنده :

نه نامه در بوکه کیف رحیق مضمونی
ویرر ملاحظه بر نشاط روحانی

دینله رك کیفیت تعمیم ایدیور سده بر کره اوواهمه ذهنه کمش
بولنیور . بوندن باشقه بر مکتوبك عنواننده حسن بیان تصور
ایتمکده بر آرز غریب کورینور . حقیقت حال شاعرك «نه نامه در
بوکه حسن بیانی» دیه جک ایکن وزن و قافییه نك سوقیه «نه نامه در
بوکه حسن بیان عنوانی» دیه که لزوم کورمش اولمندن عبارتدر .
حتی مصراع ثانیه «ایدر کشاده دل مستمندانی» ویا «ایدر
کشاده طبع مستمندانی» دیه کافای اولدیغنی حالده ایکیسندن برینی
حشو غیر مفسد عد ایتدیره جک صورتده (دل) ایله (طبع) ی
جمع ایتمیسه اکال وزنه مجبور بولمسنندندر .

نسخه صحیح نك (حسن بیان عنوانی) دکل ، عطف ایله
(حسن بیان و عنوانی) اولمسنه احتمال و یرمک نفعینک طرز
انشادنن تماثل ایتمک دیه ک اوله جنی آیر یجه نظر دفته عرض
اولنور .

(مولدين) عنوانيله ياد اولنان بلغاي عربك اك مشهور -
لرندن اولان (ابوالطيب) ك «دنياده موت اولمىدى شجاعتك ،
سحاوتك، صبرك مزىنى قالمازدى» [*] قولندهكى (سحاوت) حشو
مفسد عد اولندرق دىنلش كه :

— واقعا دنياده موت اولمىدىنى تقديرده مزىتى قالماق
خصوصى شجاعت ايله صبره كوره طوغرىدر . چونكه اولمىه جكنى
يقيناً بيلن بر آدم نرهيه اولسه هجوم ايتمكدن صاقماز . كذلك
عاقبت نائل سلامت اوله جغنده شبهه ايتن بر كيمسه اوغرا دىنى
شدائده قولالمىله صبر ايدر . شو حالده كرك شجاعته ، كرك صبره
مزيت ويرن شى حلول موت احتمالى اولمش اولور . اما سحاوته
نسبتله بو وجه صحيح دكلدر . زيرا اولمىه جك بر آدمك ايلريده
لازم اولور ملاحظه سيله بدل مالدن توقى ايتمى طبعى كوزينور .
بوصورته سحاوته مزيت ويرن شى حلول موت احتمالى دكل ،
بالعكس دنياده خلود حالى اولمق لازم كلير .

شاعرك (سحاوت) دن مرادى (بدل نفس) اولديغى ادعا
ايله تاويله قالقيشانلره شويله جواب ويرلمشدر .
— اورته ده موت اولمىجه بدل نفسك مغناسى اهلاك

[*] «ولا فضل فيها للشجاعة والندى — وصبرا لفتى لولاء شعوب»
يبتك ما ليدر . بزه قالسه بوراده (فتى) لفظك ده حشو غير مفسد
اولديغنه قائل اولدوق (والصبر) دىنلى ايدى دير ايدك .

شاندن اولان شيلردن احتراز ايتمكدن عبارت قالمق ضرورىدر .
«وايسه شجاعتك عينيدر»
(ابن جنى) نك بو بابده درميان ايتديكى قول مقبول شو
عالمدهدر :

— دنياده خلود ايله برابر عسردن يسره ، شدتدن رخايه
انتقال انسانه مدارتسلى اولور . بناء عليه سحاوتك بيوك بر مزيتى
قالماز .

ديك ايتيوركه :

— دنياده خاودى فرض اولنان كيمسه نك بدل مال ايتديكى
صورته دوچار اوله جنى ضرورت عالمده جارى اولان قانون
ميدل مقتضايجه بر زمان صكره مبدل رفاهيت اوله بيلير . او آدم
ايسته بو جهتي تفكرله تسلى بولور . «شمديك كرفتار ضرورت
اولدم . فقط مادام كه بنم اچون اولوم يوقدر ، ايلريده البته نائل
رفاهيت اولورم» دير . بوصورته بدل مال خصوصنده او قدر
صعوبت قالميه جغندن سحاوته بيوك بر مزيت ده قالماز . بناء عليه
ابوالطيبك قولندهكى (سحاوت) لفظى حشو مفسد اولماش
اولور .

حشو غير مفسد

حشو غير مفسد — اوج نوعدر .

— حشو قبيح ،

— حشو مليح .

— حشو متوسط .

حشوقیج

حشوقیج — زائد محض اولدیفندن سوزه چرکینلک ویرن
حشودر *

حشوک بو نوعی هر نعلسه اسکی ادبامزك چوغنه کوزله
کورغش • اثرلرینک هانکی یاراغی آچلسه برقاج حشوقیجه
تصادف اولنه بیلیر • هله (تردیف مترادف) و (عطف تفسیری)
دینیلن وللرده ایراد اولمشلری پک چوق بولنور •
برقاج مثال :

الی هذا الآن منتظم سلك شهور و سنین اولان ایام محمدت آثاری
عد (وشمار) وهرمائه کامله سن برقرن اولاق اوزره اعتبار ویراعه
براعتله ثبت ایدوب بیرایه دست اشتهار ایتسلردر.

[نیمه تاریخی]

ملکه مرحمت واحسان موجب جمال مظاهر سلطانی ومأل متخلفان
اخلاق رحمان منتهی سعادت جاودانی اوله جنی بی ریب (وکان) در.
[عاصم تاریخی]

بوقیر جانینک خصم جانی اولوب بی سبب (وعلت) ناولک عزله
واهانته آماج واسباب آسایش (وراحت) می تراج ایلدی •
[اولجی زاده منشأقی]

«یوق اگر ایلچی بکک امریله ایسه نعل لساندر؟ بزده بونک
ترضیه سنی ایسترو» کبی دیریجه سوزلرله بایاغی ایلچی و ترجانی
سوجلاندرمق ممکن ایکن مرهم (ومقصود) باشقه اولدیفندن...
[عاکف پاشا تبصره سی]

اوقاریس نام دختر ناهید اخترک آغوشنه امانت وبعد زمان بوکارم
ابتدارینه اظهار پشیمانی (وندامت) ایلدی •

[تله ماقی ترجمه سی]

عقد رشك (وحسد) یوق دل بی باکده
اولسه نظم سلیسمده عجیبی تعقید

نقی

سنی مدح ایتسون یانیلسون اهل دل ودانش
که انواع مکارمله وجودک فرد (ویکتا) در

»

لسانم تر جان سر غیب الغیب لاهوتی
کتابم نسخه دیوان پر مضمون (ومعنا) در

»

امسا که پرده داراق ایلر تغافل
وضع غروری شرم (وحیا) صورتنده در

نابی

کوستر سرکشته حال وادی وحشت هنوز
کرد باد دشت (وصحرا) روح مجنونی بکا

نائلی قدیم

عدویه عرضه قلوب دستبرد کراری
آکلدی غزوه خیر قدر بوفتح (وکشاد)

ثابت

حرفکیر اوله ظرافت صامه
سوزکه کذب (ودروغ) ی قائمه

سنبلزاده وهبی

نفعینک قابل تنظیر اولمیان قصائد بلیغندن معدود بولنان
(ایلر) قصیده سنک شو خاتمه سنه بر کره عطف نظر تنقید
ایده لم :

تا جلوه که رایتی خسرو انجم
که مملکت خاور و که باختر ایلر

منصور ایده هر پرده خدا رایت بختن
تا خسرو سیاره فلکده سفر ایلر

طرز افاده به نظر مقصد ایکیدن خالی اوله ماز : یا «کونش»

گاه مشرقده ، گاه مغربده رایت نما اولدقچه خدا رایت بختی
هر یرده منصور ایده ! « و یا » کونش فلکده سفر ایتدقچه
خدا رایت بختی هر یرده منصور ایده ! « دیمکدن عبارت او اور .
برنجی صورته کوره :

تا خسرو سیاره فلکده سفر ایلر [۰]

مصراعی کاملاً - ایکنجی صورته کوره ایسه :

تا جلوه که رایتی خسرو انجم
که مملکت خاورو که باختر ایلر

بیتی طاقیله حشو قبیح رنکنده کورینور :

دینیه بیلیر که :

- شاعرک مرادی « کونش گاه مشرقده ، گاه مغربده
جلوه کر وفلکده سفر بر اولدقچه . . . » دیمکدر . بو حالده
مصراعک و یا بیتک حشو اولسی محذوری بر طرف اولور
جواباً دینیلیر که :

- بو صورت بالفرض قبول اولنسه مصراعک تأخیری
خصوصی باشقدهجه بر اعتراضی دعوت ایدر . « شویله اولدقچه
بویله اولسون ! » دیه دعایی بیتیردکن صکره تکرار بر « تو -
قیتیه » ایراد ایتک قانون بلاغتک هانکی قاعده سنه تطبیق اولنه
بیلیر ؟ نفی بو قصیده یی انشاد ایدرکن :

[۰] کونش حقنده « فلکده سفر ایلر » دینیلوب دینیه میه جکی
بومبجه تعلق ایدر مسائلدن دکلدر .

منصور ایده هر یرده خدا رایت بختی
مصراعنه کلدیکی صیرده اولجه :

تا جلوه که رایتی خسرو انجم
که مملکت خاورو که باختر ایلر

دیمش اولدینک فرقنه وارمیان بر ذات « نه مدتجه ؟ » دیده صور -
مامش که آنفاً ایراد ایلدیکی توقیتیدی تکرار یوللو :

تا خسرو سیاره فلکده سفر ایلر

دیمکه مجبور اولمش بولسون ! مصراعک تقدیمنه امکان بولنه رق
بیتلر :

تا جلوه که رایتی خسرو انجم
که مملکت خاورو که باختر ایلر

تا خسرو سیاره فلکده سفر ایلر
منصور ایده هر یرده خدا رایت بختی

صورته قونلشده افاده نک کسب ایده جکی طرز عجیبیدن قطع
نظر (خسرو سیاره) تعیری اورته ده حشو قبیح اولمق اوزره
قالیر : طوغر بستی سونیلیم : اویله سوزلر تاویلات اضطراریه
قییلندندر . نفعینک وجداننه مراجعت اولنسه ظن ایدرزه که « تا
خسرو سیاره فلکده سفر ایلر » مصراعنی یر طولدرمق ایچون
یازدیغنی کتم اتمز »

مشارالیهک سائر بعض قصائدینک خاتمه لری دخی بویله
بی لزوم کلماتی حاوی اولدیغنی ارباب تبعه کوره محتاج اثبات دکلدر .

حشوقیچ نثرده ائچ کورینور . بونک بر نمونه سنی کورمک
ایچون کیف ماتفق آچدیغمز (تاج التواریخ) ک شوپارچه سنه
باقلم :

بیرون حصارده اولان سپاه ظفر پناهک دست امدادی درون
حصنه کیرن مجاهدلردن کوتاه اتمکله اول دلاورلرک جمله سی شهید و حیات
دنیا تمتعندن ناامید اولدینی معروض درگاه فلک اشتباه اولدقده درون
اشفاق نمونلری حر حیت ایله سوزان و آبش غضبلی قروران اولوب
شمیر عدو التاملرین نیام انتقامدن اخراج و دست کرم پیوستلری ایله
کروه لجاج اعمارینی تازاج ایدوب ساقی تیغ آبدار ایله بالذات نیجه
دیو سیرته هادم اللذات حمین ایچریدیلر و نیجه دشمن زشت اهرمن
سرشتی تیغ بی دریغلرندن کچیردیلر .

بر بختیار که شهید اولور ، البته حیات دنیا تمتعندن ناامید
اولور . بوضورتده (اول دلاورلرک جمله سی شهید) دینلدکدن
صکره (و حیات دنیا تمتعندن ناامید) دینلک ایچون نه لزوم قالیر ؟
« ساقی تیغ آبدار ایله بالذات نیجه دیو سیرته هادم اللذات
حمین ایچریدیلر » عباره سیله « و نیجه دشمن زشت اهرمن سرشتی
تیغ بی دریغلرندن کچیردیلر » فقره سی بیننده مأله نه فرق واردر ؟
فضولینک مشهور شکایتنامه سندن اولان سطور آتیدی ده
کوزدن کچیره بیلیرز :

طغوز افلا که استغنا ایدرکن اوقافدن طغوز آخه وظیفه قناعت
قیلوب عرض آلدیم و برات ایچون درگاه عالیناهه ارسل ایدوب مترصد
اولدم . مدت ترصد منقضی اولدقده و ایام انتظار سر انجام بولدقده
مبشرلرکه مزده تشریف بشارت یتوردیلر ، بکا مثال میمون و برات هایوفی
کتوردیلر . حلیه معارف ایله آراسته و زیور عرفان ایله پیراسته .

(مدت ترصد منقضی اولمق) ایله (ایام انتظار سر انجام
بولمق) باشقه باشقه شیلر میدر ؟

(حلیه معارف ایله آراسته و زیور عرفان ایله پیراسته) دینیه .
جکنه (حلیه معارف و عرفان ایله -- یاخود -- زیور معارف و
عرفان ایله آراسته -- ویا -- پیراسته) دینسه کفایت ایتزمی ایدی ؟
حشوقیچک نثرده باشلیجه منشأی « طمطراقی لفظ غلبه لکنده
آرامق » فکر سقیمدر . (اطراف و جوانب -- اعتراف و اقرار --
الحاح و ابرام -- اوقات و احیان -- بدیهی و آشکار -- بیع
و فروخت -- جنک و حرب -- جهل و نادانی -- حرص و آرز --
خوف و هراس -- زیب و زینت -- سهل و آسان -- شاد و خرم
-- صلح و آشتی -- عهد و پیمان -- قتل و اعدام -- قد و قامت --
-- لایق و جدیر -- محو و نابود -- مخفی و نهان -- مدح و ستایش
-- مسکن و مأوی -- معمور و آبادان -- ناله و فریاد -- نصیح و پند
-- وقت و زمان -- یأس و نومیدی -- یغما و غارت) کبی بر طاقم
ایکیز تعیرات هپ او منشأدن تولد ائمه شیلردر . مکتوبنده (غموم
و هموم) تعیرینی استعمال ایدن برکاتبه « غموم یتشیمورمی ؟ هموم
نه لازم ! » دینسه نه دیر ؟ بویله تعیرلرک (دکندریا -- دلی دیوانه)
کبی تعیرلردن فرق وار ایسه دیه جکمز یوق .

بودرلو تعیراتک اک فنالری (محو و پریشان -- استیصال
واضرار) کبی برنجیلری ایکنجیلرندن بتون بتون مغنی اولانلریدر .
سجع یا معنی داعیه سی بالاده کوستریان فکرک تفرعاتندندر .

ویسی کبی، ترکیبی کبی منشیلرمز سکر کله ایله افاده اولنده جق بر معنایه بر سجع خاطری ایچون سکر دها علاوه ایدر لر مش!
نظمده ایسه حشو قبیح ینه اوفکر ایله برابر اکال وزن،
تزوج مصراع کبی خصوصاً نشت ایدر . نفی :

بوله دیوان هایونی کمال رونق
آرنه کوندن کونه کیتدجه شکوه و شانی

بیتنده (کوندن کونه) تعبیرندن صکره معنایه وجودینه قطعاً
لزوم کورلیه جکی محتاج ایضاح اولیان (کیتدجه) کله سیله اکال
وزن ایتمش . شیخ غالب کذلک اکال وزن ایچون :

غوغایه اکر دوشرسه تدبیر
ایشته قلم ایشته تیغ و شمشیر

بیتنه بر (تیغ) صوقشدر مش . [*] ینه مشار الیه :

کامی اوقونوردی خیر آباد
نابی اولنوردی خیر ایله یاد

حقا که عجیب بر اثر در
اربابی یاننده معتبر در

[*] سید وهینک :

آدم اودر صکه ایتیه تغییر وضعی
اتبال و بخت کندینه یار اولمش اولماش

بیتنده کی (بخت) ایله سنبلزاده وهینک :

عم و غم بر یازیلیر املاده
فرق بر نقطه در آنحق ساده

بیتنده کی (ساده) دخی بوقیلدندر .

دیدکدن صکره نابینک بو اثری اختیار لنده یازمش اولدیغنی
سویلک ایستیه رک :

هنکام هرمدده سویلمشدر

دیمش . افاده سی مقصود اولان معنایی تمامیه حاوی بولنان بو
مصراع یالکز بر اقامق ایچون بر مصراع دها سویلمک لازم کلتجه
معنی جهتیه آنک عینی اولمق اوزره .

پیر اولدینی دمدده سویلمشدر

دیتکدن باشقه چاره بولمامش . (مجموعه مع) ده ملاحظه آتیه
در میان ایدمش ایدی :
شیخ غالبک :

هنکام هرمدده سویلمشدر

پیر اولدینی دمدده سویلمشدر [*]

بیتی هم تکرار لفظی بی، هم ده تکرار معنوی بی مشتملدر . بونده کی تکرار
لفظی (اعاده ردیف) قاعده سنه مستند ایسه ده تکرار معنوی - صانیرزه -
هیچ بر فائده یه مبتنی دکلدرد . چونکه (هنکام هرمدده) دیدکدن صکره
برده (پیر اولدینی دمدده) دیمکه لزوم یوقدر . (پیر اولدینی دمدده) نک
(هنکام هرمدده) بی تفسیر یولو ایراد اولدینی ادعا ایدیه جک اولورسه
دیتدیرکه :

— تفسیرده قاعده مفسرک مفسردن مستغنی ویا بالعکس مفسرک مفسردن

[*] مشار الیهک :

واری هله سویلمدک سوز

قلمشنی مکر دینامدک سوز

بیتی ده یوکا بکزد . مصراع لری یکمالدر .

معنی اولمامسیدر. اولورسه ایکیسندن برینه لزوم قالماز. ظنزه کوره بوراده (هنکام هرم) (پیر اولدینی دم) ایله تفسیره محتاج دکلدور. **بناء علیه** تعبیر ثانی (تطویل) قیلندن اولور. سزک ادعا کزه کوره محتاج ایسه او حالده دخی (پیر اولدینی دم) دینیلنجه (هنکام هرم) لزومسز قالیر. **بناء علیه** بوکرده تعبیر اول تطویل قیلندن اولور. معنایه بدئلرنده قطع فرق اولیان بوتعبیرلردن یا لکزیری شیخک مرهمی افادهیه کافی ایدی. [انتهی]

منقح شعر سونیک کوچ. مثلاً بر فکر اولور که اوچ مصراع ایله بلا نقصان افاده اولنه بیلیر. حال بوکه شاعر آنی ایکی بیتلی بر قطعهیه درج ایتک ایستر. اساس فکردن خارج اوله رق سویلنیه جک مصراعی نه صورتده تشکیل ایتلی که حشو **هایع و یا حشو متوسط** عد اولنه بیلسون؟

نثرده بویله مشکلات اولدیغندن حشو قییمندن عاری بر صورتده یازلمسی بالنسبه قولای اولدینی حالده اسکی نثرلرده ینه اسکی نظم لردن زیاده حشو قییم کوریلور. سببی ساحه نثرک وسعتیدر. «یازه جغم شیده المدن کلدیکی قدر صنایع پردازلحق کوستره جکم». خصوصیه سیمسز هیچ بر فقره یازمامغه غیرت ایده جکم» قرار قطعیه قلمی اننه آلان بر نثر مقتدر نه لر یازماز؟

اوللری بر شاعر ماهرده عینیه بو فکرده بولنوردی. فقط دائرة نظمک محدودیتی ایستدیکی کبی اکنه بویله اجاله خامه ایتکه بالطبع مساعد بولنمازدی. **بناء علیه** مکلف صورتده سویلنیش بر شعرینه او یولده یازلمش بر نثره نسبتله اهور اولوردی.

مثلاً ناپینک بر تذکره سیله بر غزلی یان یانه کتیرلسه غزلک تذکرهیه نسبتله ساده قالدینی کوریاور. ایشته تکلفات منشیانه دینیلن شیئک نه دیمک اولدینی او زمان آکلاشیلیر. نرکسینک شیخ الاسلام یحیی افندی وصفنده کی قصیده سندن اولان شو نظمی کورلسون:

اله آل نرکسیا جام صفا پیایی
چونکه کوردک بودم خرم بهجت زایی
کچ اوطور مصطفیٰ عشرته جشیدانه
کچ ایدوب طرف کلاه سر استغنائی
منت اللهه که ایردک بوزمان طربه
شکر مولایه که کوردک بودم زیبایی
بارک الله زهی موسم عیش ابدی
لوحش الله خوشا وقت قدح پیایی
اول کریم ابن کریم افضل افضل زاده
جد بجد ایلدی احیا اثر آبابی
ذاتنه بجمع بحرین دیسم ارزانی
آنده فتوی ایل جمع ابتد خدا تقوایی

برده آنی تعقیب ایدن شو نثرینه باقلسون:

حبذا دولت عظمای عالم و آدم که خامه حل مشکلات ملل و امم اول
معلا جناب خجسته قدمک کف کریم عطای کهر پاشنه مسلم و خلعت
مذهب مذهب کریبان و مطلا دامن حضرت امام اعظم اول یکانه عرب و عجم

وخلال عویصات علوم وحکم حضرت تریزك نسیج زرین تارده قلم خجسته
رقی ایلہ مطرز و معلمدر.

بو نثرک او نظمی یازان قلمک اثری اولدیغنه انسان کوچ
اینانه بیایر . هیچ شبهه یوقدر که مرحوم او نظمی ده بو نثر قدر کلفتلی
یازمق ایتمشدر ، قصیده نك بالضروره اویله ساده بر شی اولمسنه
تأسف ایتمشدر .

نظمده تتابع اضافاتک اوچدن ، هله درتدن زیاده سنه نادراً
تصادف ایلمکده اولمسی ده اوزانک مساعده سزلکنندن دکلکی ؟
اسکی ویکی بعض محرراتده کورلدیکی وجه ایلہ (ایسه ده)
تعبیریلہ ائثالنی متعاقب کتیریلن ادات استدراک دخی حشوک بو
نوعندن معدود در .

مثال :

بعضاً مقدم اوله رق ایراد اولندیغی غیر مستر ایسه ده (لکن)
قلیل ونادر دره [مطول ترجمه سی]
دیگر :

شمدی به قدر علم تفسیر و منطق ودها فنون سائر به دائر خیلی کتب
ورسائل طبع ونشر اولمش و حتی الآن کرک در سعادت و کرک محالک
محروسة شاهانه نك جامعارنده اوقوت مقده و اوقود لمقده بولمش ایسه ده
(لکن) بودفعه علم کلامدن اولوب [ترجمان حقیقت]

(مجموعه معلم) ده بیان اولندیغی اوزره او تعبیرلر دن صکره
ادات استدراک کتیریلہ من . مثلاً « پک کوزل دکل ایسه ده چرکیزده »

دکلدر « دینیلیر . » پک کوزل دکل ایسه ده فقط چرکین ده دکلدر «
دینیلہ من . » ادات استدراک کتیریلہ جک ایسه عبارہ « پک کوزل
دکلدر ، فقط چرکین ده دکلدر » صورتنه قونلق لازم کلیر .
ادات تعلیل اولان (دن) ی متعاقب کتیریلہ جک (بناءً علیه ،
بنابرین) کبی تعبیرات تعلیلیه ده بوقیلدن اولور . مثلاً « یاننده
قلم بولمندیغندن بناءً علیه یازی یازمدی » دینیلہ من . یا « بناءً
علیه) سز اوله رق « یاننده قلم بولمندیغندن یازی یازمدی » دینیلیر
یاخود عبارہ « یاننده قلم بولمندی ، بناءً علیه یازی یازمدی »
شکلنه قونیلور .

حشو ملیح — سوزه کوزلک ویرن حشودر .
شیخ غالبک !

ارواح که تحفه خدادار
خاک ره شاه انبیادر

نعت شریفنده اصل مقصد « ارواح خاک ره شاه انبیادر »
دیمکدن عبارت اولدیغی حالده ایراد ایدیلن « که تحفه خدادار »
ترکیب توصیفی حشو ملیح عد اولنور . [*]
عونی بکک :

احبا شیوة یغماده مبهوت ایلر اعدایی
خدا کوستر مسون آثار اضمحلال بریرده

[ه] « الله که موجد جهاندر — بیک درلو نقابدن عیاندر »
یتلمه کی « که موجد جهاندر » ترکیبی ده بونک نظیر یدر .

بیتنک مصراع ثانیه‌ی تشکیل ایدن جمله دعائیه ده بویه در .
اصل مقصد برنجی مصراع ایله افاده اولمش بتمشدر .
برقاچ مثال دها :

طبیعتک بوتایشی اهل دانش وینشی صحیحاً وجده کتیر برحالت
ایدی . مکر بوطاغک اتکاری سراپا یابان چیلکلی ایمش . معیت عاجزیده
بولان یوز بوقدر آدم برقاچ ساعت چیلک دوشیروب یدیلر . بللی بیله
اولدی . آقشام قوناق یرینه یتشمک اوزره بولاطیف چیلکلی (طوره)
ترک ایله ایلری حرکت مجبور اولدق .
مکتوبک اوزونلغته تشکر ایدرم .
[جودت پاشا]

بروز من بغیر از سایه من نیست یار من
ولی اوهم ندارد طاقت شبهای تار من

بیتنک تصویر ایتدیکی لیلی تنه‌ایده (کواکمی یاننده بوله‌ماز ایکن) یگا
یار اولدی .
[کمال]

حتی باقسه‌ک آ ! او قوجه سید بیله اثرینه یالکز تعریفات دیمش .
تعریفات علوم دیمه‌مش . حاصلی (برادر !) بزسقراط کی بر حکیم ،
روسو کی بر ادیب اوله بیلیرز . فقط ابن سینا کی ، سید کی ، ابن کمال
کی ، هومبولد کی بر عالم کچنمکه قالدیشیرسه ق حد منری بیله‌مش
اولورز .
[کذا]

(افندی !) طعن ایدنک عقلی واری مجنونه
کروه اهل هوا ایچره بری بیک دلی وار واغب پاشا
وار ایسه برهنزک (عرض ایله) اثبات ایله
اوله‌ماز محض مباهات بو دعوایه دلیل
سنی شایسته کوروب ایلدی (تأیید ایله) حق
ید اقبالکه تسایم زمام دولت منیفه

حشومتوسط — سوزه کوزلک ویرمدیکی کبی چرکینلک ده
ویرمین حشودر .

برقاچ مثال :

اندلسده اولان ملوک امویه اون یدی نفر (کیمسه) اولوب نسبلری
کنارده تحریر اولدینی وجه اوزره در .

[صحائف الاخبار ترجمه سی]

اکثر شبان (سکان) آستانه‌نک حالی خیلی زماندر فقدان تربیتدن
ناشی اعجوبه جهان وعدم فرق شین و شان ایله حرکتلری مطابق لعب
صیان اولدینی . . .
[شانی زاده تاریخی]

اوقوندجه بوشعر داپنیرم بزم عالمده

ایدر زنده روان عرفی مرحوم (ومغفور) ی نفعی

(ینه) هرنامرامک زیور دست و سری شمعی

کل افشان ساغر جدر در افشان تاج دارادر صبری شاکر

زمان عیدش وشادیدر دم اقبال دوراندر

فلک هپ ایتدیکی اوضاعه شمعی (یک) پشیماندر ریاضی

اولیان حل الهمی یه قرین ایلیه من

(دل پر عقده ایله) کشف مزایای سخن سنبلزاده وهی

ای سر افراز جهان کیم نظر مکرمتک

زمره اهل دلی (قدر ایله) ذی شان ایلر جوری

جوری بیت آئیده حشو قبیح ایله حشومتوسطی جمع
ایتمشدر :

بذل واحسان (کف) دست کریمی هر بار
ایر بارانی (غم) رشک ایله کریان ایلر

فن عروض اصطلاحاتندن اولان (حشو) (عروض) مجتهد
کوستریله جکدر .

اخطار

عنوانندن دخی آکلاشیله جغی اوزره (حشو) دیدیکمز شی
هر حالده اصل مقصوددن خارج بولنور ؛ بر صورتده که آرمدن
چیقاریله جق اولسه اساس افادهیه قطعاً خلل کمز؛ طی اولندیغی
تقدیرده بیانی مقصود اولان فکره هر نه صورتله اولور سه
اولسون ایراث نقصان ایدم جک شیئه هیچ بر وجه ایله حشو
دینیه مز .

مثلاً «افندی کوله رک کلدی» عباره سنده (کوله رک) تعیری
حشو عد اولنه ماز . چونکه متکلم ، افندینک ساده جه کلدیکنی
دکل ، نه حالده کلدیکنی اخبار ایتمک ایستمشدر . او تعیری طی ایله جک
اولسه مقصد اخلاص ایدلمش اولور . بوسوز «افندی کدرلی
اولدیغنی سزدرمه مک ایچون کوله رک کلدی» صورتده سویلیله جک
اولسه متکلمک مرادی افندینک نه ایچون کوله رک کلدیکنی بیان
ایتمک اوله چیغندن «کدرلی اولدیغنی سزدرمه مک ایچون» ترکیبی ده
حشو اولمقدن مصون بولنور . زیرا آرمدن چیقاریله جق اولسه
کذلک مقصده خلل کلیر . سائر مقدمات کلام ده بونلره قیاس اولنسون .
(انتهی)

بواخطار حشویاتندن عد اولنسون ! دینیه بیلیرکه :

سوزی لزومی قدر سویلیدیر . زیاده سی حشو اولور . بسوز
سویلیه جک اولدیغمز وقت شو اویچ مسئله یی نظر دقته آلمش
بولتملی یز که نصل سویلیک لازم کله جکنی بیله مم : نره ده ، کیمه ، نه
ایچون سویلیه جکز ؟

بالاده کی مثالرده کوردیکمز قیدلردن هر بری لزوم سز اوله .
بیلیر . «افندی کلدیمی ؟» سؤالنه — کیش ایسه — منقح جواب
«کلدی» در . «کوله رک کلدی» دکلدر . اخبار ورودک بوجده ایله
تقییدی بر سبب تحتنده اولدیغی صورتده (کوله رک) حشو اولمش
اولور . حتی حشو مفسدده اولسی ممکندر : یانکرده بولنان محترم
برذاته افندینک بر خصوصدن طولانی مکدر اوله رق کله جکنی
خبر ویرمش اولسه کز ، دیرکن بریسی کلوب افندینک کوله رک
کلدیکنی سزه اخبار ایلسه (کوله رک) قیدینی ناجا کورمز میسکز ؟
کذلک اوزاته افندینک بر موفقیت حسیله مسروراً کله جکنی
سویلیش بولسه کز ، خبرده «افندینک کدرلی اولدیغنی سزدرمه مک
ایچون کوله رک کلدیکنی» خبر ویرسه (کدرلی اولدیغنی سزدرمه مک
ایچون) قیدینی پک فنا بولماز میسکز ؟
جوباً دینیلیرکه :

(حشو) دیدیکمز شی اساس فکره نظراً زائد کورینن لفظ
ویا الفاظدن عبارتندر . بر آدم فکری نه ایسه آنی سویلر . ایشته
حشو بو سویلیشده بولنور . خارجه تعلق یوقدر . افندینک
کوله رک کلمسندن عبارت اولان بر فکر «افندی کوله رک کلدی»

صورتند افاده اولنور سه حشوسز بر سوز سويلنمش اولور .
اما خارجه (كولهرك) قیدی بوزوم كوريله جك ايمش . بوجهت
آنك حشو اولسنی ایجاب ایتز . حشو مسئله سنده خارجدن
قطع نظرله یالکز فکرة باقه جغز . سرك دیدیکز بحث دیگر درکه
مباحث ادبیه نك اكمملرندن اولان (مقتضای حال) مبحثه تعلق
ایدر . اوراده ایضاحات ویريله جکدر .

شوراسنی ده اخطار ایدلم که كرك شیوه لسانه ، كرك سائر
بعض اعتبارانه عائد اولان مکرراته حشو نظریله باقیله ماز . (تکریر)
مبحثنده ایضاحات ویريله جکدر .



تجاهل عارف — تجاهل عارف — انسانك بوسوزی بر نكته یه مبنی حقیقت

حالی بیلیورمش کبی سويلسیدر .

بوکا ساده جه (تجاهل) دیه بيله جکمز کبی (تجاهل عارفانه) دخی
دیه بیلیرز . بعض بیانیون بواسلوبك قرآن کریمده دخی وارد
اولسنه نظراً (تجاهل) تعیری شایان استحسان کوره میدرك آکا
بدل (معلومك لنکته غیر معلوم مساقنه سوقی) عنوانی اختیار
ایتمشله ایسه ده بو عنوان کلفتلی اولدیغندن قبول عامه یه مظهر
اوله نامشدر .

فی الحقیقه کلام الله نسبتله (تجاهل) تعیرینك استعمال اولنماسی
مقتضای کمال تأدب عد اولنور ایسه ده (تجاهل) تعیری موجود

ایکن کلام بشر حقنده دخی ذکر اولسان عنوانك استعمالنه
مجبوریت کوريله مز (تجاهل) یاخود (تجاهل عارف) ویا (تجاهل
عارفانه) تعیری (معلومك لنکته غیر معلوم مساقنه سوقی)
عنوانندن دها واضح اولمقله برابر کلام بشره کوره بو عنوانك
اوتعیرلره بدل استعمالی برکلفت بیهوده اختیارندن عبارت قالیر .
اسلم اولان صورت کلام الله حقنده تبجیلاً بو عنوانك ، کلام بشر
حقنده ده تسهیلاً اوتعیرلردن بریک استعمالیدر . (تجاهل عارفانه)
تعیری (تجاهل) تعیرندن اولی کوریاور . (تجاهل عارف) تعیری
ایسه ایکسینده ترجیح اولنور .

تجاهل عارف پك لطیف براسلوبدر . فقط عنوانندن دخی
آکلاشیله جفی اوزره بویولده سوز سوبيله جك آدم حقیقه عارف
اولمق لازم کلیر . بویله اولماز ایسه آکا (تجاهل عارف) دکل ،
(تعارف جاهل) دیمك مناسب اولور . [*]

تعارف جاهل ایچون برمثال آرانیر ایسه شایان توبینخ اولان
برشخصه توبینخ صورتنده «نه یاپیورسکز؟» دین برآدمه اوشخصك
«شکر ، ای یز سز نه یاپیورسکز؟» یوللو جواب ویرمسی تصور
اولنسون .

شیخ غالبك :

كل عارف اول كه معرفت اولسون تجاهلك

سوزی تجاهل عارفك بر تعریف عارفانه سیدر .

[۵] (تعارف) کله سی بوراده عارفك طاسلامق معناسنده قوللانلدی .

تجاهل عارفده تشییط، توبیخ، تحیر، تدله، [*] مدحده مبالغه،
ذمده مبالغه کبی نکته‌لر اعتبار اولنور
تشیطه مثال :

خلفای عباسیه دن منصور وفات ایدن عمجه‌سی قیزی دفن اولنق
اوزره آماده ایدیلن قبرك كنارینه كلارك جنازه‌ك ورودینه انتظارا کمال
حزن ایله قعود ایتدیکی ائشاده مشاهیر طرفای عربدن شاعر ابودلامه
حضورنده بولنیوردی. آلدینی امر اوزرینه اوده بر طرفه اوطوردی.
خليفة قبری کوستره رك دیدی که :

— یا ابادلامه ! بوراسی ایچون نه حاضرلادك ؟

شاعر شوجوانی ویردی :

— خليفة‌ك عمجه‌سی قیزی !

بوجواب منصوری کولکه مجبور ایتشدر .

قتره‌ك روشنندن اكلشلدینی وجه‌ایله خلیفدنك «بوراسی
ایچون نه حاضرلادك ؟» دیمکدن مقصدی «عاقبت ترك حیات ایله
قبره کیردیك زمان ایشکه یارایه جق اعمال صالحه‌ك وارمی ؟»
دیمك اولدینی شاعر جه معلوم بولندیغی حالده مشارالیه تشییط
قصیدیه تجاهل ایدهرك بالاده کی جوابی ویرمشدر .
توبیخه مثال :

اصحاب ثروتدن ساده دل بر بك افندی بعض ار باب هوانك
اخطارات كمشعورانه سنه قاپیلارق، یتشمش اولان کریمه‌سنی اورو پا
مادمازلری طرزنده تربیه ایتك مراقنه دوشمش ایدی. برمریبه‌غریبه
جلب ایدلدی. قیزغزه برآز پیانو وسائر اؤکره دلدی.

[ه] مدهوشی عشق .

اوزاقدن اوزاغه اقر باسندن اولان یکریمی یکریمی ایکی یاشلرنده بر
کنج جواریدن بریتك جاذبه سنه طوتلمش اولدیغندن آره صیره بك
افندیك قوناغنه کلیردی . هرکلیشده متعلمه‌ك ترقیات واقعه‌سنه دائر
پدرندن برخیلی ایضاحات ایشیدردی . اوصانمش ایدی . یوايضاحاتك
آره‌سنه «سسی بك کوزلدر» جمله‌سی ده قاریشیردی . غالباً بك افندی
کریمه خانمی بوکنججه تزویج ایتك تصورنده بولنیوردی . کنجك فکری
ایسه باشقه یرده ایدی .

برآقشام کنج ینه قوناغنه کلش ایدی . بك افندیك تنسی اوزرینه
کریمه خانم پیانو آهنگیله بر شرقی سویلیدی . کنج بالطبع هم پیانوالیشی
هم شرقی سویلیشی تحسین ایلدی . پدر زیاده‌سیله ممنون اولدی . حال بوکه
کریمه‌ك چالغی چالسی بك مبتدیجه اولدینی کبی صداسی ده سولیه جك
صورتده بك اینجه ایدی .

باشقه برکون کنج آقشام اوستی ینه قوناغنه کلدی . بك افندی ایله
بانچه‌یه چیقیدیلر . کومس قارشیدن کورینیوردی . قاریشیق برسس
ایشیدلکه باشلادی . بك افندی یاننده بولنان کنجك یوزینه باقارق
دیدی که :

— اونه ؟

کنج برآز دیکلهدکن صکره ساده دلانه شوجوانی ویردی :

— بك ای آکلایه‌مدم افندم ! کومسه سکسار کیرمش اولمی !

کریمه خانمك پیانو چاله رق شرقی سویلکده اولدیغنی کنج
بك کوزل فرق ایتش ایدی . بك افندی بی توبیخ ایچون تجاهلده
بولندی .

تحیره مثال :

برباشقه بدیعه کوستر هر دم عشق
حقیه کیم اولمش کیم اولور محرم عشق

که کلشن اولورسین دله کاهی کاخن
جنتی جهنم میسین ای عالم عشق

عالم عشقک جنت ویا جهنم اولمدینی معلوم ایکن اظهار
حیرت یولنده تجاهل ایدلمشدر •
تدلله متال :

مرحبا ای طرب آباد حرین و خالی
برزمان اولمش ایدک یار ایله سنده همد
اونه خوش دم، نه قدر نشوولی بر عالم ایدی
عجا عودت ایدرمی اوزمان خرم

دیگر :

سن نصل کل طاقندک ای کلبن
رخ رنگین یار صولمش ایکن
یوقسه اول نونهالک اولمدیمی
سکا حال حزینی حزن افکن

بوایکی مثالده مخاطب اولان (طرب آباد) ایله (کلبن) ک
حقیقتده قابل خطاب اولمالریله برابر یکمیش زمانک عودت
ایتمیه جکی ورخ رنگین یارک صولمسندن کلبنک متأثر اولدرق کل
آچامسی لازم کلیه جکی معلوم ایکن ایدیلن تجاهل اظهار مدهو •
شیء غرام مقصدینه مستنددر •
مجنون عامرینک :

بالله سویلیک بکا ای آهوان دشت
سزدنمی یوقسه نوع بهردنمی سودیکم

دیه ترجمه ایدیه بیلن :

تالله یا طیبات القاع قلن لنا
لیلای منکن ام لیلی من البشر

بیتنده کی تجاهل ده بوقبیلدن عد اولنه بیلیر • مجنون لیلای آهودن
فرق ایتیه جک قدر دیوانه دکل ایدی •
مدحده مبالغهیه مثال :

آقیور نور، کوردیکم دره دن
آب واشجاری برق برق اولمش
زیر و بالاسی نوره غرق اولمش
وادیء این اولسون کورین

بومیدر وادیء شریف طوی
اونمایش کیمک تجلاسی
بوایه نرده شمدی موساسی
یادکسه نه در اونور هدی

توصیف اولسان دره یی — که (نصیین) جوارنده در —
مدحده مبالغه مقصدیه بونک جناب کلیم اللهه تجلیء الهی واقع
اولان وادیء مقدس اولوب اولمدیغنده تردد کوستریایور •
تفعینک ادرنه شهرینی تعریف ضمننده سلطان احمدی توصیف
ایدن قصیده سندن اولان شو بیتلرده دخی تجاهلک بودرلوسی
کوریلیور :

ادرنه شهریمی بو یا کلشن مأوامیدر
آنده قصر پادشاهی جنت اعلامیدر
بیت معمور فلکیمی اول قضاذه اول سرای
یازمینی جنت اولمش کعبه علیامیدر

جویلری دور ایدن طرف چترارین یاخود
مائی پروازایله قطع اولمش یشیل خارامیدر
سبز و خرم بر فضای هرکنار جویبار
یامیان جوده عکس کنبد خضرامیدر
حفظ ایچون یاخود وجود پادشاهی جویلر
پاسبان کنج دولت اولمش اژدرهامیدر

بو بیتلرده شمدیکی طرز نظمه مخالف مسامحدر واردر •
مع مافیه ینه او قصیده نك ینه بو صنعتی مشتمل بولنان شو قطعه سی
هروجه ایله غرادر :

دائما بویله مفرحی بو جای دلکشا
هرزمان آب و هوای بویله روح افزامیدر
یه قسه شمدی ایلین آب و هواسن تربیت
آفتاب دولت شاه جهان آرامیدر

عونی بکک حضرت مولانا وقبه خضرا وصفده کی قصیده
شریفه سندن اولان ابیات آتیه ایه بو مجتده اک عالی مثالردن
عد اولنور :

بارگاه آسمانی قبه خضرامیدر
یا فضای لامکنده چتر اوادنامیدر
شش جهتن روز و شب کروبیان ایلر طواف
مسجد اقصامیدر یا کعبه علیامیدر
ساحه سنده روشنا قندیللری برقی اوران
یا نجوم آسمان عالم معنامیدر

باشقه بر عالمی ایجاد ایلمش صنع ازل
یا معنی خوابگاه حضرت ملامیدر
قابلا دی ارض و سمایی فیضی اماحق بیلیر
خضر فرخ پیمی روح الله جانبخشامیدر

فضولی یه مخصوص اولان شیء لطیفك اك بالا نمونه لرندن
بولنان :

ماه نودر یوقسه سن قیلدقده سیر آسمان
قالدیروب پارماق کتیرمش آسمان ایمان سکا

نعت عالیسی ده بواسلوب اوزره آسمان پیرای ادب اولمشدر •
ذمده مبالغه یه مثال :

ای خسته لره چاره بولان می مجید
درد دله چاره بنم فوتمیدر
بالله قاپودن کیرنجه اولدم نومید
دوقتوری کلن یا ملک الموتمیدر

زواللی خسته دوقتوری ذمده مبالغه مقصدیه متجاهلانه
سویلنیور •



تکلم صامت — متکلم کندی و فات ایتمش فرض تکلم صامت
ایده رک اووجه ایله سوز سویلنمیدر •
بویولده سویلنیلن سوز (کلام الصامت) تعبیر اولنور •
مثال :

روح مزار شاعر

اولدی جان هم بزم جانان دیکله هم صوصون جهان
 کوش جانم دیکله سون آرام جانم سویلسون
 برزمان بن سویلدم کیم بیلدی؟ بوندن بویله ده
 کوکلك حالن ییتلمش خانم سویلسون
 مشهدم محشر کسلمش، بنده یوق سوزدن اثر
 قصه رنگینمی خون روانم سویلسون
 بن نهان اولدیمسه آثارم نهان اولماز طور
 شاعمی اخلافه صیت جاودانم سویلسون
 برزمان اولسون بکا لوح مزارم ترجمان
 بن یوردلدم سویلمکدن ترجمانم سویلسون

دیگر

مشهدمدن شوق کویکله رواندر قان هنوز
 کورمدی تیغک بنم کعبده بر قربان هنوز
 بر شهید دغروشانم که کوش جانم
 روح یحیادن کلیر آواز استحسان هنوز

دیگر:

خون جوشان شهادت ایچره بن غلطان ایکن
 سن ایدردک خنده، قان آغلاردی شمشیرک سنک

فضولینک تکلم صامت مثالرندن اولان یت آتسی مشرب
 رندانه بی نه قدر تهییج ایدر:

بن خود اولدم ای ترامدن اولان ساغر مدام
 رندلر بزم کزوب بر بر یتور بندن نیاز [۰]

[۰] (یتور) ایصال ایت دیمکدر.

آدنه لی حق بک افندینک شو مطاعی ده بو اسلوب اوزره
 سویلینلن سوزلرک اک مؤثرلرندن عد اولنور:

بر شهید حکمة الروح بنی یاد ایلک
 دوستر! روح شهید حکمتی شاد ایلک

هر حالده نوحات مأیوسانه جمله سندن معدود اولان (تکلم
 صامت) ایله اشتغال طبعه ملال کتیره جکندن مخیله نک بونکله
 اشغالی مناسب کورلمز ایسه ده شوراسی ده اعتراف اولنمیدر که
 بعض احوالده انسان طبعه ذاتاً کلمش اولان ملالی تعدیل ایچون
 کندینه مخصوص بر لوح مزار یازمغه مجبور اوله بیلیر. نه ده
 طاتلی یازیلیر!

بو طرز حزین (تکلم روح) عنوانیله ده یاد اولنور. او حالده
 سوزه (کلام الروح) دینیلیر.



قائیه — هم لفظ هم معنی یا خود یالکز لفظ و یا یالکز معنی
 حسیله مختلف اولدقلری حالده مصراعلرک یا خود بیتلرک
 اواخرنده و یا بونلرک اواخری منزله سنده بولنان یرلرده —
 تلفظده استقلال مشروط اولماق و آشغیده تعداد اولنه حق
 جرون و حرکاتدن عبارت اولمق اوزره — تکرر ایدن شیئک
 مجموعیدر.

بو تعریف خیلی مغلق کورندیکی ایچون حاوی اولدیغی قیوده.

دائر ایضاحات آتیدنك اعطاسنه لزوم کور سیورز :

بونده کی « هم لفظ هم معنی یا خود یالکز لفظ و یا یالکز معنی حسیه مختلف اولدقلری حالد « قیدی کوسترکه مثلاً بر مطالعه قافیه دار عد اولنه جق ایکی کله هم لفظ هم معنی حسیه یکدیگرک عینی اوله ساز . چونکه اولیه اولدینی تقدیرده مقصد غائب ایدلمش اولور . یعنی قافیه تحقق ایتز . از جمله عاکف پاشانک :

کوکل هر دلبرک مفتونی اولماز خیلی سرکشدر
ولی اول غمزه سی فتانی بیلیمز سین نه دلکشدر

مطلعی — (کش) لرك كرك لفظ ، كرك معنی حسیه بر برندن فرقی اولدینی ایچون — قافیه سز عد اولنور . دیمك اولیورکه قافیه دار عد اولنه جق لفظلر بیننده البته اختلاف بولنه جقدر . ایسته بو اختلاف اوچ درلو اولور :

۱ — هم لفظ هم معنی حسیه اختلاف .

۲ — یالکز لفظ حسیه اختلاف .

۳ — یالکز معنی حسیه اختلاف .

هم لفظ هم معنی حسیه اختلافه مثال :

رفتارینه دقت ایت نه موزون
شاعر بوکا اولسونی مفتون

بو بیتده قافیه دار اولان (موزون) و (مفتون) کلهلری بیننده هم لفظ هم معنی حسیه اختلاف واردر . یعنی (موزون) (مفتون) لفظاً عینی اولدینی کی معنی دخی عینی دکدر . اکثر قوافی بو اسلوب اوزره واقع اولور .

یالکز لفظ حسیه اختلافه مثال :

سوزکله دائماً رطب اللسانم
سوزکدن قالمسون خالی زبانم

بو بیتده قافیه دار اولان (لسان) و (زبان) کلهلری بری عربی ، حیکری فارسی اولمق اوزره دلیل معناسنه اولدیغندن بینلرنده اختلاف لفظ جهته منحصر قالیر . بو اسلوب اوزره یاپیلان قافیه لر پک ده سولمز . چونکه طبیعت ایکنجی قافیه ده معنای دیگر آرامغه میالدر .

یالکز معنی حسیه اختلافه مثال :

واری بر جاریه ده بویله بها
ممکن اولماز بوکا تقدیر بها

بو بیتده (بها) لرك برنجیسی عربی اوله رق حسن ، ایکنجیسی فارسی اوله رق قیمت دیمك اولدیغندن بینلرنده یالکز معنی حسیه اختلاف بولنور .

زهار دریجه قالمسون باز
در آجی صیده کلمسون باز

بیتی ده — بری (آجیق) ، دیکری (طوغان) معناسنه ایکی (باز) ی حاوی اولدینی ایچون — بوقیلدندر . بو اسلوب اوزره یاپیله جق قوافی صنایعدن معدود اوله جغندن کلفتی اولماق شرطیه مقبول اولور .

« مصراعلرك » قیدی تعریفه مطالع و مشویات قوافیسی
داخل ایتکدر . بوقید اولسه مثلاً فضولینك :

غیره ایلر بی سبب بیک التفات اول نوش لب
التفات ایتمز بکا مطلق نه در یلم سبب

مطلعه آثار کترانه مدن :

باق صنعتنه نه عالم آوا
باق قدرته نه حیرت افزا
باق ملکنه وامی انتهای
باق ذهنه صیغاری کبریایی

مشوینک قافیهلری تعریفدن خارج قالیردی .

« یاخود بیتلرک » قیدی تعریفی غزللرک ، قصیدهلرک ، رباعیلرک
مطلعلرندن ماعدا بیتلریله قطعهلرک ایساتنه شامل قیلقدنه در .
بو قید اولسه مثلاً فضولینک بالاده کی مطلعدن صکره کلن :

جوری کوکلدر چکن کوزدر کورن رخساریکی
الله الله کام آلان کیمدر چکن کیمدر تعب

بیتله نفعینک بر قصیده سنده کی :

آفرین ای علم افراخته سردار دلیر
صفدر قلعه کشا صف شکن کشور کیر

مطلعی تعقیب ایدن :

فتح خیر اوله ایله ایلمه مشدر کیمسه
زور بازو ایله بر بویه حصار ی تسخیر

بیتنک و آثار کترانه مدن :

پک باقه عبا پوش تن کترمه
باق چشم خردله فکر جانپورمه

جعفر کی چوقی دو الجناحین اولسه
مستظهرم اللهم پیغمبرمه

رباعیسنک بیت نایسیله :

ایستم اسمک کی ذاتکده ده
معنی علویت اولسون منجلی
شمیدن نفس ایت شوپندی قلبکه
ساده اسمک اولسون اوغلم علی

قطعه سنک قافیهلرینه تعریفک شمولی اولمازدی .

« و یا بونلرک اواخری منزله سنده بولنان یرلرده » قیدی
گنیدیلرینی ردیف تعقیب ایدن قافیهلرک تعریفه دخولی ایچوندی .
مثلاً :

التفات ایلر الیهونه کاهی کوزلرک
بن دخی آنلردنم کورسون الیهی کوزلرک

مطلعه باقدیغمزده مصراعلرک آخرلرنده (کوزلرک) ی کوررز .
اگر تعریف ذکر اولنان قیدی حاوی بولنسه قافیه ی بونلرده
آرامه من لازم کلیردی . حال بوکه قافیه بونلرده دکل ، بونلرک
تعقیب ایتدیکی (کاهی) ایله (الهی) ده در . (کوزلرک) ردیفدر .
(کاهی) ایله (الهی) حقیقتده بومصراعلرک آخری دکل ایسه ده
قافیه یه نظراً آخری منزله سنده در .

« تلفظه استقلالی مشروط اولماق اوزره » قیدی تعریفدن
ردیفی اخراج ایدر . چونکه یوقاریده کورلیدیکی اوزره قافیه
بولوق احتمالی اولمیان ردیف دائماً تلفظه مستقل اولور .

« آشاییده تعداد اولنه جق و حرکاتدن عبارت اولمق
اوزره » قیدی (لزوم مایلزم) یا خود (اعنات) و یا (قافیه مقیده)
دینیان صنعتی اجرا یولنده التزام اولنان حروف و حرکاتدن
احترازه مبتنیدر . مثلاً :

یکسان نظر مده صیف و سرما
اندوه ایسه اسم بی مسما

شوریده نشوۂ شبام

اولمازسه ده باغ نزهت افزا
فکرم یتیشیر بکا طربزا

مستغنی نغمه ربام

نظمنده (سرما) ایله (مسما) ده کی (م) لر ، (شباب) ایله (رباب)
ده کی برنجی (ب) لر ، (نزهت افزا) ایله (طربزا) ده کی (ز) لر التزام
اولنمده قافیه خلل کلزدی . از جمله آنک آت طرفی اولان
شوپار چده (خنده) ایله (سخنده) دن ماعدا یرلرده اعناته رعایت
اولنماش ایکن قافیه مختل اولماشدر :

کوکلمده صفا دهنده خنده
ممزوج ایکی خنده بر سخنده

یا نمده اوکل بدن خزامان

بر تازه بهار وارکه بنده
یوق بیکده بری آنک چنده

بیهوده نه فخر ایدر کاستان

« تکراریدن » قیدی دخی تکرر سر قافیه متحقق اوله میجه جقق
کوسترر . (فرد) یا خود (مفرد) تعبیر اولنان :

یوری دریا دل اولوب ایله تحمل یوقسه
روزگارک اوکنه دوشمین آدم یوریلور

کبی غیر مصرع بیتلرده قافیه یوقدر .

شمدی یوقاریده « آشاییده تعداد اولنه جق » دیدیکمز
حروف و حرکاتک نه لردن عبارت اولدیغنی کوره لم :
قول مشهوره کوره حروف قافیه طقوزدر :

حروف قافیه

- روی .
- ناسیس .
- دخیل .
- ردف .
- قید .
- وصل .
- خروج .
- مزیده .
- نأره .

روی — قافیه نک حرف اصلی اخیری اولان و یا حرف
اصلی اخیری منزله سنده بولنان حرفدر .

بر حرفک قافیه ده حرف اصلی اخیر منزله سنده بولنمی ایکی
صورتله اوله بیلیر : یا تکلفسز اوله رق حرف اصلی اخیر
منزله سنده بولنور یا خود تکلفله او منزله ده بولندیر یلور . تکلفله
او منزله ده بولندیر یله جق حرف ایسه کله نک یا وسطنه و یا
آخرینه کلیر .

شو افاده نك نتیجه سنده نظراً رویده درت احتمال اولمش
اولور .

۱- حرف اصلی «خیر» اولق.

۲- تکلفسز اوله رق حرف اصلی «خیر» منزله سنده بولنش حرف اولق.

۳- تکلفله وسط کلمه ده حرف اصلی «خیر» منزله سنده بولندیرلش حرف اولق.

۴- تکلفله آخر کلمه ده حرف اصلی «خیر» منزله سنده بولندیرلش حرف اولق.

بو احتمالاتی امثله ایله ایضاح ایلمه لم :

روینك حرف اصلی «خیر» اولسنه مثال :

کورد کی بودامکده آزاد
بردامك اسیری صید و صیاد

بو بیتده حرف اصلی «خیر» اولان روی (د) حرفیدر .

طبعده کی ذوق و شوق تام ایت
مفتون خرامکم خرام ایت

بیتده ایسه (م) حرفیدر .

روینك تکلفسز اوله رق حرف اصلی «خیر» منزله سنده
بولنش حرف اولسنه مثال :

مژگانی که نیم جنبش ایلم
بیک چند بلا نمایش ایلم
شیخ غالب

بو بیتده (جنبش) ایله (نمایش) ده کی (ش) لر حرف
اصلی اولدقلری حالده تکلفسز اوله رق حرف اصلی «خیر»

منزله سنده بولنشلردر . حقیقتده (جنبش) ده حرف اصلی

«خیر» (ب) اولدینی کی (نمایش) ده ده (ی) در .

بویله اولان حرفه «غیر مشهور ترکیب» دینیلیرکه برکله

ایله برلکده استعمالی کثیر اولق جهتیه نفس کلمه دن کی کورینور .

تعبیر دیکرله : سطحی برنظر آنی کلمه نك حروف اصلیه سندن

ظن ایدر . حال بوکه دکلدیر .

بودرلو حرفلر یکقافیه اولان قیصه منظومه لرده بردفعه دن

زیاده روی یا یئلاملیدر . قصیده کی یکقافیه اولان اوزون

منظومه لرده یا یئلق لازم کلیر سه باری یکدیگره تقرین ایلمیه رك

یدی بیت فاصله ایله کتیرلملیدر . هر حالده یا یئلامسی اولادر .

(جویا ، زیبا) کی صفت مشبهه لرده بویله در . مثلاً بر بیتك

برنجی مصراعی (جویا) ، ایکنجیسی (زیبا) ایله نهایت بولسه

قافیه تحقق ایتمز . یعنی بیت قافیه سز عد اولنور . مع مافیه بولردن

برنجیسی (جویا) ، ایکنجیسی (بویا) اولسه قافیه متحقق اولور .

چونکه ایکیسنده ده حرف اصلی «خیر» (ی) در . بوندن

طولاییدرکه ضیاپاشانك :

ظن ایتمه که آرمایش ایتمش
اهل هنره نمایش ایتمش

بیتی شیخ غالبك بالاده کی بیتنه قیاس اولنه ماز .

روینك تکلفله وسط کلمه ده حرف اصلی «خیر» منزله سنده

بولندیرلش حرف اولسنه مثال :

دیدیلر : موسم سرما ده چیقارمی اودن
هوس سید ایله هیچ اولیان آدم کودن

بوییتک برنجی مصراعنده روی (او) ك حرف اصلی
اخیر اولان واوی اعتبار اولندیفی صورتده ایکنجی مصراعنده
(بون) دیمك اولان (کودن) واوی حرف اصلی^۱ اخیر
منزله سنده بولندیرلمش اولور .

روینك تكلغله آخر کلمه ده حرف اصلی^۲ اخیر منزله سنده
بولندیرلمش حرف اولسنه مثال :

افتخار ایلر بونکه که بز
مستفیض مأثر عربز

بوییتک برنجی مصراعنده حرف اصلی^۳ اخیر (ز) اولدیفی
حالده ایکنجی مصراعنده (عربز) تعییرنده کی (ز) حرف
اصلی^۴ اخیر منزله سنده بولندیرلمشدر .

بواسلوب اوزره یاییله جق قافیدلرک حکمی دخی یوقاربده
« روینك تکلغسز اوله رق حرف اصلی^۵ اخیر منزله سنده بولنش
حرف اولسی » مبحثده کوستریلن وجه اوزره درکه یکقافیه
اولان منظوم دلرده بردفعه دن زیاده ایراد اولنسی مقبول دکلدر .
منظومه نك اوزونلنی حسبیه ایرادی اقتضا ایدرسه کذلک یدی
بیت فاصله ایله کتیرلملیدر . هر حالده کتیرلمه سی اولادر .

اساتذه اوتهدن بری بورالره دقت ایتیشلر در . مثلاً
تفعینك :

اسدی نسیم نوهر رآچلدی کلر صبحدم

مصراعيله مصدر اولان قصیده سنك قافیه لرینی کوزدن کچیره جك
اولساق :

سن برشه ذی شانسین شاهنشاه دورانسین
یعنی که سن خاقانسین دورکده بن خاقانیم [۱]

بیتندن باشقه بالجله ابیاتنك رویلرینی حرف اصلی^۱ اخیر اولمق
اوزره بولورز . دیمك که قصیده ده یالکز بردفعه اوله رق غیر
اصلی بر حرفی روی یاپیش . بونده ایسه بالاده کوسترلدیکی
وجه ایله بآس یوقدر .

سفر مبارک اوله ای خدیو فرخ دم

مصراعيله مصدر اولان قصیده سنده بویله ایکی روی ایراد
ایتمشدر . فقط آره لرنده یکرمی بیتدن زیاده فاصله واردر .

بورایه قدر ویریلن ایضاحاتدن آ کلاشلش اولملیدر که روح
قافیه اولان روینك قوافیده تکراری وجوب تحتنددر . قافیه دار
اولان ابیات و مصارعده روی یالکز بر حرف اولور . باشقه
حرف اوله ماز .

[۱] بوییتده کی (ذی شانسین ، دورانسین ، خاقانسین) مدلری
— (اماله) مبحثده بیان اولنه جنی اوزره — عیوب شعردن معدوددر .
(خاقانیم) ده کی صورت تلفظ ایسه زمانزده قبول اولنه بیلیر برشیوه
عجمانه دکلدر . شمدی طوغری عداولنان تنفط یانک کسریله (خاقاناییم)
دیمکه حصوله کلیر .

تأسیس - روی ایله بینلرنده بر حرف متحرك بولنان
القدر

مثلا :

افكارم اگرچه نظمه مائل
حالم دكل انتظای قابل

بیتنده (مائل) ایله (قابل) ده کوریلن الفلر تأسیسدر که
بولنرله روی اولان (ل) لر بیتنده متحرك (ه) ایله (ب)
بولنیور

ابیات آتیهدده دخی تأسیسه رعایت اولنمشدر :

مادام که دلبر آنده حاضر
موقعده در احسن المناظر

محمود عوام اولدی حالم
قارشیمده خلاصه العوام

بول نشوة حسن وعشقی جامع
آقشامه قالیر ایسه که نه مانع

قافیدنک بودر لوسنه (قافیه مؤسسه) دینلیر . فضولینک : قافیه مؤسسه

بت نورسم نمازه شب و روز راغب اولمش
بونه دیندر الله الله بته سجده واجب اولمش

مطالع غزلنده سراپا قافیه مؤسسه التزام اینلشدر . باقی درت
بیتنک قافیدلری شرنلدر : جاذب ، کاتب ، غائب ، طالب .

طباع سلیمه نك شهادتیه ثابت اولدینی اوزره تأسیس تزیینات
شعریه دن معدود اولمقله برابر واجب الالتزام دکلددر . عدم
التزامندن قافیه تقیصه دار اولماز . بناءً علیه صنایع جله سندن
عد اولنور .

ینه مشارالیهک :

خی ذکر ایتمز ایل افسانه مجنونه مائلدر
نه بکزر اول بکا دردی آنک درمانی قابلدر

مطلع مؤسسینی تعقیب ایدن اییادنن یالکز شو بیتده تأسیسه
رعایت اولنماشدر :

نه مشکل حالی اولسه عاشقک معشوق ایدر چاره
کر اول بی درد بیلمزسه بو حالی حال مشکلددر

ایران شعراسیله اوزان و قوافیده آنلره تبعیت کوسترمش
اولان عثمانلی شاعرلری بالاده بیان اولدینی اوزره تأسیسه رعایتی
لوازم قافیه دن عد ایتیورلر ایسه ده مولانا جامی کی بعض
افاضلک افاده لرندن فصیحای عربک تأسیسی التزام اینلکدری
آکلاشیلیور . فی الحقیقه (متنبی) نك ابیات آتیهدسی کی
مصادف نظر عاجزانه من اولان بعض اشعار عربیه دخی بو
مدعائک صحتنه دلالت ایتکده در .

فیالیت مابینی و بین احبتی
من البعد مابینی و بین المصائب
کثیر حیاة المرء مثل قلیلها
زول و باقی عمره مثل ذاهب

الى لعمري قصد كل عجيبة
كأني عجيب في عيون العجائب

تأسیس ایله روی بیننده بولنه جق حرف متحرک (خاور،
یاور) کبی برجنسدن اولسی شرط دکدر .

دخیل — تأسیس ایله روی بیننده بولنان حرفدر .

دخیل

اولدقه زمان زمان مصادف
حیرانم اولور نگاه عارف

بیننده کی (مصادف) ک دالی ایله (عارف) ک راسی کبی .

بعضلر « رویلر متحرک اولدینی وقت دخیلرک اختلاف
حرکاتنده بأس یوقدر » دیرلر و مثلاً (کاتبه) ایله (معاتبه) نک
قافیه یابلسنی تجویز ایدرلر ایسه ده بو صورت آهنگه ولو کلی
اولسون خلل ویره جکندن عدم جوازینک ترجیحی دها زیاده
موافق طبیعت کورینور .

ردف — آره لرند برحرف متحرک بولنماق اوزره رویدن
اول واقع اولان الف یاخود ماقبلی مضموم واو ساکنه ویا ماقبلی
مکسور یاء ساکنه در .

بو تعریفه نظراً ردف ایکی نوع اولمق لازم کلیر . برنجیسی
روی ایله بینلرنده نه متحرک ، نه ساکن هیچ برحرف بولنمیاندر .

کوکلمجه تبسم اولدی معتاد
چشمه ده جهان تبسم آباد

ردف

و :

ای صنع صفا فزای بیچون
دل اولدی تنزلکله ممنون

و :

حالکز ساده شکلکزده ظریف
سسکز خوش مقامکزده لطیف

بینلرنده اولدینی کبی .

ایکنجیسی بینلرنده برحرف ساکن بولناندیر . (بافته) ایله
(تافته) ، (سوخته) ایله (دوخته) ، (بخته) ایله (ریخته) کبی . بونوع
قافیه بالنسبه آز قوللانیلیر .

ایکنجی صورتده آره ده بولنان حرف ساکنه (ردف زائد) ،
الف ویا واوه یاخود یایه دخی (ردف اصلی) نامی ویریلیر .

مطابقا ردفی مشتمل اولان قافیه یه (مردف) و (قافیه مردفه)
دینیلیر . قافیه الف ویا واو یاخود یادن عبارت یالکز برردفی
مشتمل ایسه (ردف مفرد ایله مردف) ، هم ردف زائدی هم ده
ردف اصلی یی محتوی ایسه (ردف مرکب ایله مردف) عنوانی آلیر .
ایران وروم شعرا سنک رأینه کوره قوافیده علی الاطلاق
ردفک تکراری واجبدر . عرب شاعرلری ایسه واو ایله یاده
اختلاف ردفی تجویز ایدرلر . مثلاً (امور) ایله (امیر) ی قافیه
یایارلر . بو یولده قوافی اشعار عربده پک چوقدر . از جمله
(کعب بن زهیر) ک (رضی الله تعالی عنه) حضور اقدس نبویده
انشاد ایتمش اولدینی مشهور قصیده بلیغه ذکر اولنسان اسلوب

تقفیه نك شواهدندن معدود در . نمونه اولق اوزره ایکی بیتنی
ایراد ایده لم :

انبئت ان رسول الله اوعدنی
والعفو عند رسول الله امول
لاتأخذنی باقوال الوشاة ولم
اذنب وان كثرت فی الاقاویل

فارسیده اولدیغی کبی لسانخزده دخی بو صورتک اجراسنه
قطعا جواز ویر یله من .
قید — رد فدن باشقه اوله رق روینک بلا فاصله ماقبلنده
بولنان حرف ساکندر .

قید

سنسین بوکون ای مشرف القرش
جنتلرک اورته سنده بر عرش

و :

ترك حقیقت ایدن اولمازی پست
اولیان اناسمی حقیقت پرست

و :

کوهی آزار دکلیدر عیب
دل کندی ایکن خزینة الغیب

پتلهنده کی (ر ، س ، ی) حرفلری کبی .

(بزم و رزم ، شمع و جمع ، درد و مرد ، مهر و سپهر ، میل و نیل ،
نقر و مغز) طرزنده کی قافیه لر هپ بو قیلدندر .

اکثر فصحا قوافیده قیدک تکرارینی واجب عد ایدر لر .

قابوسندن چیقوب همان شهرک
اولدی عازم بوینجه بر نهرک

پیتنده اولدیغی کبی که قیدلرک ایکیسی ده (ه) حرفیدر . فی الحقیقه
(نرم و بزم) قیلندن اولان کله لرک قافیه یاپلسی آ ز چوق سلامتی
حائز بولنان طبعه خوش کلز . عزت ملانک :

اولوب مال قارون اساسنده خرج
قینمش ترا بی جوا هر له منج

بیتی بو یولده در .

قیدک اختلافی تجویز ایدنلر قید اوله جق حرفلر پیتنده قرب
مخرج بولنمسی شرط ایتشلردر . بولره کوره مثلاً (بحر) ایله
(شهر) ، (وحی) ایله (نهی) قافیه اوله بیلیر . قول اول موجبنجه
قیدک اتحادی اسلم اولدیغنده شبهه یو قدر .

مبحثده کورلدیکی وجه ایله جهوره کوره (ردف) الفویا
ماقبلی مضموم و اوسا کنه یا خود ماقبلی مکسوریادن ، تعبیر دیکرله :
حروف مددن عبارت ایسه ده بعضلر بونی « روینک بلا فاصله
ماقبلنده بولنان حرف ساکن » دیه تعریف ایتشلردر . بو قوله
نظراً قید رد فده داخل اولمش اوله رق (قید) تعبیرینک استعمالنه
احتیاج قالماش اولور .

وصل — روی بی متعاقب کلن حرفدر :

وصل

اولفده نگاه بی قرارم
جوش آور طبع جذبه دارم

بیتنده کی (م) لر کبی .

قوافیده وصلک تکراری واجبدر .

خروج — وصلی متعاقب کلن حرفدر :

خروج

مست اولور هرکیم که سیر ایلر شرابی رنکی
رقص ایدر هرکیم که دیکار دلفریب آهنگکی

بیتنده کی (ی) لر کبی .

قوافیده خروجک تکراری واجبدر .

مزید — خروجی متعاقب کلن حرفدر :

مزید

زمانمزنسخن افروزیدر زمانمزنک
زمانمزن حکم آموزیدر زمانمزنک

بیتنده کی (ک) لر کبی .

قوافیده مزیدک تکراری واجبدر .

نأثره — مزیدی متعاقب کلن برویا بردن زیاده حرفدر .

نأثره

اکثریا براولور :

شاشمه ده هشیارلر مستیکزه
کند کزدشمنسکز هستیکزه

بیتنده کی (ه) لر کبی .

قوافیده نأثره نک دخی تکراری واجبدر .

بورایه قدر تعداد اولنان حروف تسعه دن (روی) اساس قافیه
اوللق اوزره نظر دفته آلدیغی حالدیه باقی سکز حرفدن (تأسیس،
دخیل، ردف، قید) دینیلن دردینک رویدن اول، (وصل، خروج،
مزید، نأثره) دینیلن دیکر دردینک دخی رویدن صکره واقع
اولدیغی کوریلور . دیمک که بو طقوز حرفک بر قافیه ده اجتماعی
لازم کلسه روی بونلردن دردی صاغنده، دردی صولنده اولدیغی
حالدیه اورته ده بولنه جق .

ملاحظه مخصوصه

ظن عاجزانه مزه کوره (روی) دن صکره هر نه کلیرسه
(ردیف) عد اولنلق اولادر .

بوصورت قبول ایدیله رک بالاده کوردیکمز درت مثالده کی
(م) لر، (کی) لر، (مزنک) لر، (یکزه) لر کبی روییه الحاق اولنان
شیلر (ردیف) نامیله یاد اولندیغی تقدیرده (وصل، خروج، مزید،
نأثره) تعبیر لرندن هیچ برینک استعمالنه احتیاج قالمیه رق کلفت
برطرف ایلمش اولور .

(دف) ک (قید)ه دخی شامل اولان سالف الذکر «روینک
بلا فاصله ماقبلنده بولنان حرف ساکن» تعریفی قبول ایلدیکی
حالدیه ایسه (قید) تعبیرینک استعمالندن ده استغنا حاصل اوله جفندن
میدانده یالکز (روی، تأسیس، دخیل، ردف) تعبیرلری قاله رق
حروف قافیه مسئله سی دهها زیاده ساده لشیر .

مع هذا (حرکات قافیه) مجثله سائر بعض مباحثه لزومی
 اوله جستن (وصل، خروج، مزید، نأثره) تعبیر لرینی اونو تاملی یز،
 قلمما (ردیف) ی صور مختلفه ده، حتی ایچندن چیقیله میدجق
 صور تکرده تعریف ایتیلر در. بواشکال (وصل، خروج، مزید،
 نأثره) اعتبارندن ایلری کلمشدر. بوقاریده ترجیح ایتک ایستدیگمز
 رأیه کوره ایسه مسئله ده بیهوده ذهن یوره جق هیچ برجهت
 قالماز، بناء علیه (ردیف) شوبله تعریف اونور:
 — مصراعلرک یاخود بیتلرک اواخرنده روی بی متعاقب عیناً
 تکرر این بر ویاردن زیاده شی.
 بو تعریفده کی (شی) تعبیری بر حرف یاخود بر کلمه دن عبارت
 اولان ردیفله شاملدر. تعدد صور تری ایسه «ویا بردن زیاده»
 قیدیه تعریفه ادخال ایدلشدر.
 مختلف ردیف مثالاری.

ردیف

بر صفا بخش ایده لم کل شودل ناشاد (ه)
 کیده لم سرو روانم پوری سند آباد (م)

ندیم

قاشلرین بالاده سیر ایت رخلرین کور زیر (ده)
 قیل تماشا خلای زیر سایه شمشیر (ده)

وله

حلاوتیاب اولورمی نعمت الوان دنیا (دن)
 دهن شوی اولیا نلر بوس دامن مدارا (دن)

راغب یاشا

زیارت ایلدم بر تار پاک خرقة پیری
 کوزل اکراملر کوردم حنیف نکته پیرا (دن)
 علامتدر ایدر ایصال بزم قریه اسراری
 بوکون سر رشته کیردی دسته دامن ملا (دن)

اسرار دده

ایدر از بر پری صورت کوزل (لر)
 غمدای روحدر تازه غزل (لر)

قوی

امید و بیدن بکا یارب فراغ (ویر)
 جان وجهانی ترک ایده جک بر دماغ (ویر)

قائلی قدیم

کیمسه ادراک ایتدی معناسنی دعوا (مزک)
 بز دخی حیرانی یز دعوا ی بی معنا (مزک)

عونی بک

شاخ کلدۀ ژاله دوشمش غنچه زیبا (میدر)
 شاه النده یا مرصع ساغر صهبا (میدر)

یاقی

کیتدی باشکدن کوکل اول سرو قدک سایه سی
 آغلا کیم ادباره تبدیل اولدی اقبال (ک سنک)
 تیز چکمز سک جفا تیغن بنی اولدر مکه
 اولدیور بر کون بنی آخر بو احوال (ک سنک)

فضولی

حیرت ای بت صورتک کوردکده لال (ایلرینی)
 صورت حالم کورن صورت خیال (ایلرینی)

وله

کبار بسته زبان غرور ایمنش طوتهلم
بور هکذرده هزاران سلام (آلیر بولنور)

زبون بولوب بزی پامال جورا یدنلردن
برای غیرت حق انتقام (آلیر بولنور)

نابی

عید ایرشسون باعث شوق جدید (اولسون ده کور)
سیر سعد آبادی سن بر کره عید (اولسون ده کور)

ندیم

کل سویلشلم جمله کچن دملری جان
حیرانکه ابکم (دیرایدک شمدی نه دیرسک)
کوردمکی نه در عاقبت جنت نخوت
اول کیمه آدم (دیرایدک شمدی نه دیرسک)

سایه

صفا (ی عشقی کیم آکلار کیمکه سویلشلم
وفا (ی عشقی کیم آکلار کیمکه سویلشلم)

لا

ردیفلی شعره (مردف) تعیر اولنور • شعر مردف ایران
وروم شعراسته مخصوصدر • فصیحای عرب ردیفه اعتبار ایتمز •

حقیقت حالده شعر مردفک حلاوتی انکار اولنه ماز • فقط
شوراسی ده اعتراف اولنمیلدر که ردیفسز شعر سویلکده ردیفلی
شعر سویلکدن زیاده صعوبت حس اولنور • بونک سببی سائر
ایضاحات لازمه ایله برابر (غزل) میخشنده بیان اولنه جقدر •
[انتهى]

حرکات قافیه

حرکات قافیه آلتیدر :

- رس •
- اشباع •
- حذو •
- توجیه •
- مجری •
- نفاذ •

رس — تأسیسک ماقبلنده کی حرکه در :

معرفت التفاته تابعدر
مشتربیز متاع ضایعدر

پیتنده (تابع) ده کی (ت) ایله (ضایع) ده کی (ض) ک قتحه لری کبی •
الفک ماقبلنده باشقه در لو حرکه بولنه میه جفندن رس منحصرأ
قحه اولور •

قوافیده تأسیس تکرر ایتدکجه رسک دخی تکرری طبعیدر •
تأسیسی حروف قافیه دن عد ایتینلر رسی دخی بالطبع
حرکات قافیه دن عد ایتزلر •

اشباع — وصلی مشتمل اولان قوافیده دخیاک حرکه سیدر •
بویله اولان دخیلده حرکات ثلاثه بولنه بیلیر •
قحه یه مثال :

مسند اجلالک رفعت بر ادنی پایه سی
درکه اقبالک دولت قدیمی چاکری

باده ادرا مک توحید سر جوش خمی
ساقی اندیشه مک تحقیق درد ساغری

نفی

کسر به مثال :

آصف خان احمد غازی وزیر بی نظیر
کیم رفاه کونه باعث در وجود نانی
صاحب الحیات ابراهیم پاشا کیم اودر
آسمان بر وجودك آفتاب لامی

سای

ضمه به مثال :

کوکلم بیویور تعاضمکدن
پر جوش اولیور تلاطمکدن

اصحاب اعتنا اشباعك اختلافی عیوب قافیه دن عد ایدر لر .
مثلا (ساغری) ایلله (شاعری) و (تفاخری) کبی کلمه لری
قافیه یاماز لر . (دخیل) مجتهده بیان اولندیغی اوزره طبیعت
اوفق اولان ده بودر .

حذو — ردف وقیدك ماقبلنده کی حرکت در :

کاشانه خانه بیرون اول ده ایت بر التفات
شکل انسانی به کیرمش روح کورسون کاشات

پیتنده کی (ف) ایلله (ن) ك قتمه سی ،

پیش چشمده در اول جند جهانگیر هنوز
کوش جاتنده در اول غلغل تکبیر هنوز

پیتنده کی (ك) ایلله (ب) نك كسره سی ،

کوکلرده کزن او بال منتوش
بر کوف اوله حق زمینه مفروش

پیتنده کی (ق) ایلله (ر) نك قتمه سی و :

بویله بر نغمه دن کیم اولماز مست
بونه سسدر دکلی بانك الست

پیتنده کی (م) ایلله (ل) ك قتمه سی کبی .

بو مثاللرده اولدیغی وجه ایلله روی ساکن بولندیغی وقت
قوافیده حذوك تکراری واجبدر . مثلا (دیر) ایلله (دیر) ،
(عون) ایلله (خون) ، (شهر) ایلله (مهر) قافیه اوله ماز .
روی متحرک اولدیغی زمان ایسه بعض قدما حذوك اختلافی
تجویز ایتشلر ، (بسته) ایلله (شسته) کبی کلمه لری قافیه یامیشلر
ایسه ده بوکادخی جواز ویرلمه مک اولادر .

بو اختلافی تجویز ایدنلر « قیدك ردفه تبدیلی لازم کلمه مک »
شرطیله ایدر لر . مثلا (دیری) ایلله (پیری) آنلرجه ده قافیه
اوله ماز .

توجیه — تأسیسی مشتمل اولمیان قوافیده علی الاطلاق
روینك ماقبلنده کی حرکت در .

توجیه حرکات ثلاثه دن اوله بیلیر .
قتمه به مثال :

عالم قالیر اورتیه سنده ارزنی
جولانکهی بویله ایسترم بن

کسره به مثال :

بر آیرینه قارلی طاغ کسلمش
هر موجه کف نه رندهش

ضمه یه مثل :

سکا دوشمن بو اعتلا ای کل
اورادن دوش که رشکه دوشدی کوکل

بو مثاللرده کورلدیکی اوزره روی ساکن بولندیغی وقت
توجیهک تکراری واجبدر . مثلاً (الکن) ایله (ممکن) قافیه
اوله ماز .

متحرک اولدیغی زمان توجیهک اختلافی تجویز ایدنلر
واردر . مثلاً (مشتري) ایله (سامری) و (عنصری) یی
قافیه یاپارلر . اندرونی و اصفک شو بایاغی بیتلرنده کی توجیه
بو قبیلدنلر :

کشور ستان بلاغت بر فضای معرکه
اول فضائک ناطقه م بردای دال خنجری
عرفا آلم عرفیدن میدان نظمی شاعران
شاه عرفانم رکابده یوررلر هربری

بوکا دخی جواز ویرلمه مک اولادر .
مجری — روینک حرکه سیدر .

باقدقجه او صنع بر کاله
شاهین قضا کلیر خیاله

بیتنده (ل) لرك قفحه سی ،

عشقکله نوای دلشینی
رقصان ایدیور موحدینی

بیتنده (ن) لرك کسره سی کبی .

قوافیده مجرائک تکراری واجبدر .

نفاذ — وصالک حرکه سیدر .

دوشدم سقوط برک خزان یولو راهکه
برکره باق شو منتظر نظره خواهکه

و :

کورمه جانلرکی لایق بکاعداونکی
بر جنایت ایتدم ایتدمسه اعلا شانکی

بیتلرنده (ک) لرك قفحه و کسره سی کبی .

خروج ایله مزیدک، حتی (متحرکی بولنورسه) نأره نک
حرکه سی ده بونام ایله یاد اولنور .

قوافیده نفاذک تکراری دخی واجبدر .

بالاده ذکر اولنان حرکات قافیه ایچون شویله بر خلاصه یاپه لم :

رس : (صنایع — منافع .

اشباع : } آذری — خاوری .
 } نائی — مائی .
 } تغافلک — تجاهلک .

حدو: { کار — بار •
تیر — میر •
نور — مور •
رنك — تنك •

توجیه: { بن — سن •
مشتر — مقتخر •
كل — مل •

مجرى: { تنه — زنه •
زمانی — مکانی •

نفاذ: { قلبنه — جلبنه •
عزمنی — جزمنی •
آنكزك — شانكزك •
پیشانیکزه — پشیمانیکزه •

انواع زوی

روی یکی نوعدر:

— روی مقید •
— روی مطلق •

روی مقید — روی مقید — وصله عدم اتصال حسیله ساکن اولان رویدر •

مثال:

روحبخش اولدی مسیحا صفت انقاس بهار
آجدیلر دیده لرین خواب عدمدن ازهار باقی

روی مطلق — وصله اتصال حسیله متحرک اولان رویدر • روی مطلق

مثال:

هر حجاب اشکمه برعکس صالمش بیکرم
شاه ملک محتم طوتمش جهانی لشکرم فضولی

تقطیع اعتباریله قافیه بش نوعدر:

تقطیع اعتباریله
قافیه نك نواعی

— مترادف •

— متواتر •

— متدارك •

— متراكب •

— متكاوس •

قافیه مترادفه — تقطیع حسیله آخرنده فاصله سز ایکی قافیه مترادفه
حرف ساکن بولنان قافیه در •

مثال:

اولنجه پرده بر انداز نظره چشم شهود
کورندی آینه دله چهره مقصود سامی

قافیه متواتره — تقطیع حسیله آخرنده اولان حرف قافیه متواتره

ساکن ایله آ کا تقدم ایدن دیگر حرف ساکن بیننده بر حرف
متحرکدن باشقه شی، بولنمیان قافیه در.

مثال :

زهی سمند ملایم که حسن رفتاری
اونوتدیر دل عشاقه جلوۀ باری نفی

قافیه متدارکه — تقطیع حسبیلله آخرنده اولان حرف ساکن
ایلله آ کا تقدم ایدن دیگر حرف ساکن بیننده ایکی حرف متحرک
بولنن قافیه در.

مثال :

هر کورن عیب ایتدی آب دیده کریانی
ابلام تحقیق کورمش کیمسه یوق جانانی

نضولی

قافیه متراکبه — تقطیع حسبیلله آخرنده اولان حرف ساکن
ایلله آ کا تقدم ایدن دیگر حرف ساکن بیننده اوچ حرف متحرک
بولنن قافیه در.

مثال :

جان ویرر آدمه اندیشه صهبای عدم
جوهر جانمی عجب جوهر مینای عدم

عاکف پاشا

دیگر :

او خداوند هنر پرور جنکاور کیم
منحصر دولته تر بیت تیغ و قلم

اویکانه سپه انداز نظر یاور کیم
چند ارواح وملائکدر اکاخیل وخشم نفی
قافیه متکاوسه — تقطیع حسبیلله آخرنده اولان حرف
ساکن ایلله آ کا تقدم ایدن دیگر حرف ساکن بیننده درت حرف
متحرک بولنن قافیه در.

درت حرکه نك تعاقبیلله ثقیل اوله جنی درکار بولنن بونوع
قافیه اوزانك مساعده سرلکندن طولای — بالالتزام یا پیمازسه —
همان هیچ بولنمیدجق درجده آذر در. مثلاً (کله مدمش) ایلله
(چله مدمش) وزنه صوقیلله بیلسه قافیه متکاوسه ایچون بر
مثال اولور.

قافیه نك ذکر اولنن بش نوعی تعیین خصوصنده اك زیاده
دقت اولنه جق جهت تقطیع حسبیلله ساقط اولان حرفلری حساب
قامتاقدر. مثلاً (ایده مدمش) ایلله (کیده مدمش) قافیه اولمق
لازم کلسه (تقطیع) مجمشده بیان اولنه جنی وجه ایلله اشیای
تقطیعده حروف املا ساقط اوله جغندن الده یالکز (ادم م ش)
حرفلری قالیر. بولنرک اخیری اولان (ش) دن ماعدایی ایسه
متحرک بولندیغندن قافیه ده (تکاوس) تحقق ایتش اولور.

عیوب ملقبه قافیه درتدر :

— سناده.

— اقوا.

— اکفا.

— ایطا.

سناد — ردفك اختلافیدر.

(زار) ایله (زیر) و (زور)، (مار) ایله (میر) و (مور) کبی.

افوا — خذو و توجیهك اختلافیدر.

(دور) ایله (دور)، (درد) ایله (درد)، (کل) ایله (کل) کبی.

اکفا — روینك بینلرنده قرب مخرج اولان دیگر بر حرفه تبدیلیدر.

(صبح) ایله (سپاه)، (احتیاط) ایله (اعتماد) کبی.

عربی حروف ایله فارسی حروفی قافیه ده جمع ایتك اکفا قییلندندر. مثلاً (طرب) ایله (چپ)، (حك) ایله (رك)، (خواجه) ایله (سراچه) قافیه اوله ماز.

پك چوق شاعر لرمز زیاده سیله شایان دقت اولان بو حصو. صدن ذهول ایتشلردر. از جمله (خرابات) مقدمه سنده:

لایقمی که شاعرم دین ذات
فرق ایتیه مخرج حروفات

بیورمش اولان ضیا پاشا ینه اوراده شوبیتلری یازمشدر:

اولدی شعراسی بونلرك هپ
ترتیب حروف ایله مرتب

سائر لسن عتیقه نك هپ
معقولاتی اولور مرتب

لکن بویله اثر لرین هپ
اخلاق عمومه صانمه مکتب

ابکار معانی مرتب
صف صف دیزیلیر حضورینه هپ

تعقید ورکیکه اوغراماز هیچ
ایلر او قودجه طبعی تهییج

لطائفدن اولمق اوزره عرض ایله لم که:

شاعر دقایق شناس عونى بك مرحومه بر کون پاشانك بو
یتتی اخطار ایله (هیچ) ایله (تهییج) ك قافیه اولوب اوله میه جعفی
سؤال ایتدك. بلا قائل شو جوابی ویردی:

— (هیچ) ایله (پیچ) قافیه اوله بیلیر.

بر آرز دوشوندكدن صکرده عزت ملانك (محنت کشان) ندن
اولمق اوزره بیت آتی یی او قودی:

آنك کلمدی دهره فرزندى هیچ
ایدردى تبنى اصكر بولسه پیچ

ملانك شوتقیه سنه دیه جك یوق ایسه ده ینه (محنت کشان) ده
مندرج بولنان:

مقدر اعش دیکلدك اوچ کیجه
او اوچ کیجه دن کورمدم کوچ کیجه

بیتنه عیب اکفا موجود در • چونکه (اوج) فارسی جیم ایله

اولدینی حالد (کوج) عربی جیم ایله در •

ایطا — قافیه نك بر معناده اوله رق عیناً تکراریدر •

اکثر شعرا مطلعک برنجی ویا ایکنجی مصراعنده کی قافیه یی

مطلعه اولماق شرطیله تکرارده بآس کورمیدرک تجویز ایتمشر •

حتی بوکا (رد مطلع) نامیله برده سوس ویرمشردر •

عثمانی شاعرلری بو تعبیری اکثریت اوزره غزل نهایتنده

مطلعک برنجی ویا ایکنجی مصراعنی عیناً اعاده خصوصنده استعمال

ایدولر •

برنجی یه مثال :

جوی کوستردی بینه آینه وش روی کلی
پنجه مهر آجدی همچون شانه زلف سنبل

شویله کلشن برطرب کیم کوشلر فرق ایلمز
قهقههای خنده کلدن نوای بلبل

ایلمش کویا که حق ایجاد جسم نازکن
ایلیوب آمیخته بوی کله رنگ ملی

کلشن حسنک کورک سنبل هوای کلشن
ابر مشکین وش طاغتنجه نسیم اول کا کلی

تازه معنی رونما نظم سلیسکده (ندیم)
جوی کوستردی بینه آینه وش روی کلی

•

•

•

•

•

ایکنجی یه مثال :

برشکر خنده یله بزم شوقه جام ایتدک بنی

نیم صوک پیمانه یی ساقی تمام ایتدک بنی

شعله سرو آساجیقار خا کمدن اول یرلرده کیم

یا مال توسن آتشخرام ایتدک بنی

نکته کیسو ایلله کلدک بزه آه ای نسیم

طره سنبل صفت آشفته کام ایتدک بنی

جلوه حسنکله هرمویم پری خیز اوله ده

عشق ایلله سرتا قدم آینه جام ایتدک بنی

بویله سرمست خراب ایتمه (ندیم) زاریکی

نیم صون پیمانه یی ساقی تمام ایتدک بنی

•

•

•

•

•

•

•

•

•

ندیم :

اول پری وش عاشقه رام اولسه ده مانع دکل

کوندوزین اولمازسه آقشام اولسه ده مانع دکل

مطلعنک مصرع ثانینی دخی غزلک نهایتنده :

بك اومار تشریفکی عیدک ایکنجی کون ندیم

کوندوزین اولمازسه آقشام اولسه ده مانع دکل

صورتنده اعاده ایتمشدر •

رد مطاعک مقبولتی اعاده اولنان مصراعلرک برجسته

اولسیله مشروطدر • کویا که شاعر مطاعک بر مصراعنی پک

مطبوع بولدینی ایچون تکرارنده بی اختیار قالیر •



بویله اولیوبده مصراعك اعاده سی تنکی قافیه دن طولایی
 بر طولدر مق کبی بر مقصده مبنی اولورسه پک صوغق دوشر .
 رد مطلع بر مصراعك ایکی دفعه تضمینی دیمک اولدیغندن
 کوزل اولدینی صورتده صناعدن عد اولنور . عکسی حالده
 شاعرک عجزینه برهان اوله بیلیر .
 یالکز قافیه یی تکرار مصراع برجسته اعاده سی کبی لطافت
 شعره مدار اوله میده جغندن طبع سلیم بونده اجر اسندن ابا ایته
 مجادر .

ایطاء ایکی نوعدر :

— ایطاء جلی .

— ایطاء خفی .

ایطاء جلی — تکراری پک ظاهر اولان ایطادر .

ایطاء جلی

(فسونکر) ایله (ستمکر) ، (نیکوتر) ایله (زیباتر) کبی .
 قافیده بر معناده اوله رق تکرار ایدن کلدیر ، کلدلرک اواخرینه
 مطراً بحق اولان حرفلر هپ ایطاء جلی صاییلیر . قطعاً بویله
 شیلر اوزرینه قافیه بنا ایدلمه ملیدر .

برقاج مثالده :

آتمق — آماق .

آنان — آلان .

کیتمک — کلمک .

کیدن — کلن .

چنلر — چیچکلر .

صفات — کائنات .

معلمین — موحیدین .

زریں — سیحین .

خندان — کریان .

یاران — خوباز .

برغزیده بویولده آنجق بر قافیه ایراد اولنه بیلیر . ابیات آتیدنک
 قافیدلری ایچنده جمع الف نونیه اولان یالکز (کلر خان) در :

کلیر لطافت آلیر هرجهان خیالمدن

کچر شرف قازانیر آسمان خیالمدن

اوکنمسون او قدر وسعتیله بی جادر

کورنسون صیقیلیر لامکان خیالمدن

سرور ایچنده دخی برهلال حس ایدرم

بهار ککسه ده کیتمز خزان خیالمدن

طبیعتم باقهلم هانکی کیزله اککسه چک

برر برر چک ای کلرخان خیالمدن

بونده بآس یوقدر . ناپینک شوغز لنده ایسه (یاران ، رنجان ،

پلنکان ، خوبان) هپ (کلرخان) قیایندندر . بناء علیه معیوب

سعد اولنور :

جمع اولدی بزم صحنه یاران برر برر

جام آلدی دست عشرته رندان برر برر

ای رهرو اول وراه کزدردن کیز پای

جمع اولدی کوه عشقه پلنکان برر برر

اولدی چکان ینه قطرات شراب سرخ
مانند سلك دانه مهرجان برز برز

داری الشفای وصلتی ایتدی کشاده یار
بیمار هجره ایلدی درمان برز برز

نابی خیال ماه رخاں طولدی سینه یه
گویا که کلدی مکتبه خوبان برز برز

قصیده ده بویله ایکی ، نهایت اوچ قافیه ایرادینه جواز واردره
فقط بالاده سویلنلدیکی اوزره آره لرنده یدیشمر بیت قدر فاصله
بولنمق شرطیله .

نفعی بر قصیده سنک ابتداسی اولان آشایکی بیتلرده بوافاده یه
مخالف اوله رق (اختران) ایله (کروبیان) ی تقرین ایتشدن .

بارك الله ای بهشت آباد وی رشك چنان
صانك الله ای سرای دلکشا ودلستان

سده بابیله پاینده اساس کائنات
طرح مطبوعیله نازنده زمین و آسمان

کورمه مشدر چرخ چارمله بهشتی سیرایدن
بویله برروشن مقام و بویله برخرم مکان

درکه دولتنهای ملتجی خاص و عام
خاك پاك آستانی بوسه جلای انس و جان

طایفه طاق و رواقی همسر ذات البروج
سایه سنف بلنددی خوابگاه اختران

پیش درگاهنده بر پاصف نشینان فلك
زیر ایواننده پرواز ایتده کروبیان

ندیم دخی بر تارینخنده شو اوچ بیتی متوالیا ایراد ایتلشدن :

یتر بوساله بر سرمایه اقبال کیم آنده
هلال عز و دولت بدر تابان اولدی بر کونده

که یعنی نجل عالیشانی ابراهیم پاشانک
وزارت برجنه مهر درخشان اولدی بر کونده

وزارتله اولوب داماد مرآت سعادتدن
ایکی رخساره شادی نمایان اولدی بر کونده

بین الشعرا مشهور اولدیغی اوزره كرك جمع اداتی ، كرك
صفت مشبهه علامتی اولان (ان) ی مشتمل بولنان قافیه لره (شایکان) قافیه شایکان
عنوانی ویریلیرسه ده حقیقتده بو عنوان او ایکی صورته مخصوص
دکلدنر . علی الاطلاق ایطاء جلی یی محتوی بولنان قافیه لره (شایکان)
تعبیر اولنور . هر حالده بردن زیاده سی ایراد ایدلمه مك اولادر .

ایطاء خفی — تکراری پك ظاهر اولمیان ایطادر . ایطاء خفی

(آب) ایله (خوناب) و (کلاب) کبی .

نفعی بر قصیده سنده :

رنك لفظ ونكهت معنای نظم یا که
نوله ایلرسه حسد رنك کل و بوی کلاب

بیتنی متعاقب :

برکستاندر قصیده م کیم صفا و یرمش آکا
بونشاط انکیز و جانپرور غزل مانند آب

بیتنی ایراد ایله ایطاء خفی ایچون برمثال پیدا ایشلدر .

مشارالیهک دیگر بر قصیده سندن اولان ایسات آتیه ده کی
(سیراب) ایله (آب) ده دخی ایطاء خفی جلیدر :

خاک بر مرتبه کرم اولدی که دوران ایده من
نیجه طوفان ایله بر ذره غبارین سیراب
دوکیلن خاکه بوفصل ایچره دکلدر باران
خوی فشان اوله ده در تاب تموز ایله سحاب
بویله کرماده که دریالری خشک ایتدی هوا
کوهدن ظاهر و جاری اولانی صاعکز آب

جلیسندن خفیی اهنون عد اولنان ایطا هر فصل اولسه

طبع سلیمه :

اولمش اما اولییدی کاشکی !

دیدیرر .

عیوب غیر ملقبه قافیه چوقدر .

روینک بریرده متحرک ، دیگر یرده ساکن اولسی بوجله دندر .

اندرونی واصفک :

کلدی خروش وجوشه بیه دله آب عشق
ایتدی اساس صبر و شکیمی خراب عشق

عیوب غیر
ملقبه قافیه

مطلعنده (آب) ایله (خراب) کسره اضافتله متحرک بولنیور .
حال بوکه :

فیض مؤثرات حواص آزمووده در
واصفایدرسه نوله اگر شیخی شاب عشق

مقطعه منده (شاب) ساکن اولتی لازم کلیور .

ایران مشاهیر شعراسنک آثارنده ده بویله شیلره تصادف
اولنده بیلیر . عیید زاکانینک اک زیاده :

فرض خدا و قرض خلایق بکردم
آیا ادای قرض کنم یا ادای قرض

بیتنی شهرت بولمش اولان :

مردم بعیش خوشدل و من مبتلای قرض
هرکس بکار و باری و من درد بلای قرض

معلی غزل هزل آمیزنده کی :

مردم زدست قرض کریزان و من همی
خواهم پس از نماز و دعا ازخدای قرض

و

عرضم چو آب روی کدایان بباد رقت
ازبس که خواستم زدرهر کدای قرض

بیتلرنده (خدای) ایله (کدای) ک اضافتدن انقطاعی بوقیایدندر .

خواجه حافظك :

صلاح کار کجا و من خراب کجا
بین تفاوت ره کز کجاست تا بکجا

مطالعنده دخی بو نقیصه موجود در . چونکه روی اولان (ب) لردن
برنجیسی ساکن اولدینی حالدی ایکنجیسی متمرکدر .
ابن الفارضك .

ولان مانی بالبال وکان طو—
رسینا بها قبل التجلی لدکت

بیتنده کورلدیکی وجه ایله شعرای عرب مصراعلر بیتنده برکله یی
ایکی یه بولمکده بآس کورمز لر . بو کیفیت قافیه ده واقع اوله جق
اولورسه لسانمزده عیوب غیر ملقبه دن عد اولنور . فارسیده دخی
بوکا جواز ویرلیور ایسه ده حضرت مولاناك .

عافل آن باشد که عبرت گیرد از—
مهرک یاران در بلای محترز

بیتنده اولدینی کبی ادواتك داخل اولدینی کلماتدن تفریق اولدینی
وارد در . عید زاکانینك بالاده کوستریلن بیتلرندن برنده (همی) .
نك (خواهم) دن تفریق ده بویله در . بو صورت دخی پك چرکین
دوشه جکندن لسانمزده تجویز اولنه ماز .
فردوسینك .

میازار موری که دانه کشست
که جان دارد و جان شیرین خوشست

بیتنده اولدینی کبی شعرای عجم قوافیده و او معدوله نك ماقبلنده
بولنان ضمه آلود قتحه یی قتحه صریحه ایله جمع ایدر لر . شیخ
سعدینك :

یکی آنکه در نفس خود بین مباش
دگر آنکه در خلق بد بین مباش

بیتی ده بویوله در . بزایسه « ضمه آلود » دیدیکمز قتحه یی قاباجه
ضمه دینیه جك بر صورتده تلفظ ایتمکده اولدیغمز دن بونك قتحه
صریحه ایله جعنی جائز کوره میز . مع مافیه (خوان) و (خویش)
قیلندن اولان کلمه لرده کی واولری قافیه خصوصنده شعرای عجم کبی
کأن لم یکن عدایلرز . مثلاً (یار بخوان) ایله (بی درمان) ی
(خویش) ایله (پیش) ی قافیه یاپه بیایرز .

تغیر املا خصوصی دخی عیوب غیر ملقبه قافیه دندر .
(وطن) ایله قافیه اولمق ایچون (اوتان) ی (اوطن) صورتده
یازمق کبی . خطاب یا خود اضافت کافنی نونه و بالعکس نونی خطاب
یا خود اضافت کافنه تبدیل ایتمکده بونوعه ملحقدر . نورس قدیم :

چوقدن حصوانی کوره هم مدعالمک
تأثیری بنده ضدینه دوشدی دعالمک

مطلعی غزلنده ایراد ایتدیکی :

ای ساکنان بزم وطن یاد ایدك کهمی
غربت اسیری درد و بلا مبتلالمک

یبتنده قاعده (مبتلا لرین) یازمسی لازم کلیرکن غزلک ابیات
سائر سبیلہ توافق املا حصولی ایچون مساحه (مبتلا لرك) یازمشدر .
اندرونی و اصفك :

ای مغچه منت ایله یاغسه لندن
ارباب خرابات ییقلسون تمدن

مطلعه‌ده کی (لندن) ك (الكدن) صورتده یازمسی لازم کلدجکی ده
محتاج ایضاح دکلدر .

شیخ خالیک نشیده آتیه‌سنده کی (نشانك) دخی (نشانن) صو-
رتده یازملق اقتضا ایدردی :

برشله‌سی وارکه شمع جانك
فانوسنه صیغماز آسمانك
بوسیده برق آشیانك
سینا دخی کورمه مش نشانك

افروخته شایستکدر

خطاب کافیه اضافت کافيك جهنده بآس یوقدر .
مثال :

ای باغی شکوفه آفرینك
کهن یارادر طورر زمینك

عیوب غیر ملقبه قافیه مجعنده سوزی بوندن زیاده اوزاتحق
ایستیمورز . باقیسنی حسن طبیعت حواله ایلرز . ذاتاً حسن طبیعت
اولینجه قافینك لزومی قلماز .

قافیه برده شویله تقسیم اوانور :

- معمول .

- غیر معمول .

قافیه معموله - بعض تصرفات ایله قافیه اولمغه صالح اولاندور .
بو تصرفات ایکی لفظی ترکیب ویا بر لفظی تجزیه‌دن عبارت
اولمق اوزره ایکی صورتده اولور .
تفعینك :

فکر بر مضمونیدر آینه طبعده یا
عکس نقش کارگاه عالم بالامیدر

سوز توکندی نیجه بردعوای شعرو شاعری
لاف و دعوی بر طرف شمدی دعاهنگامیدر

یبتلرنده (م) روی ، (یدر) ردیف اعتبار اولندیغی صورتده
(بالا) (م) ایله ترکیب ایدلمش اوله جفی کی (ا) روی (میدر)
ردیف اعتبار اولندیغی صورتده دخی (هنگام) تجزیه قیلغش اولور .
برنجی صورتده کوره (بالا) (میدر) ك میننی آله‌رق (بالام) شکلده
کیرمکله (هنگام) ه ، ایکنجی صورتده کوره (هنگام) میننی (یدر)
ویرهرك (هنگا) شکلده قالمقله (بالا) یه قافیه اوله بیلیر .
باقینك :

صوکی زنجیر لرطومتز دل دیوانه می

حاصلی آواره‌ك وقتی بهار ایامیدر

دهره مفتون اوله ای باقی فلک رام اولدی طوت
بی وفا دنیا هله بن بیلدیم دنیا میدر

بیتلرنده ده حال بویله در .

کرك نفعی ، كرك باقی بالاده کی بیتلری حاوی اولان نشیده لرنده
القی روی اعتبار ایتیشلرایسده بترکیب و تجزیه یه بر یرده مثال
کوسترمش اولمق ایچون میك ده روی اولسنده احتمال و یردك .
مشارالیهمانك اعتبارلری وجه ایله بو احتمالی و یرمه مش اولیدق
یالکز تجزیه برر مثال کوسترمش اولوردق . چونکه او حالده
(بالا) و (دنیا) نك (میدر) ك مییله ترکیبی تصور دن خارج قالیردی .
قوافی معموله ایطاء جلی قیلندن عد اولنه جق صورته
تکثیر ایدلمه ملیدر .

بوراده ده بعض ایضاحات و یرلسه بلکه فائده دن خالی
اولمازدی ، فقط قافیه مجثنی همان لزومندن زیاده عد اولنه جق
درجدرده اوزاتمش اولماق ایچون صرف نظر ایلدك .
قافیه غیر معموله - تصرف سر اولدق قافیه اولمغه صالح

قافیه غیر معموله

اولاندر .

مثال :

هوا عرائس کلزاره اولدی چهره کشا
بهار گلشنه کیدردی حله خضرا فضولی

نفعی ایله باقینك یوقاریده کوریلن بیتلرنده روی (۱) اعتبار

اولندیفی تقدیرده (بالا) و (دنیا) ، (م) اعتبار اولندیفی تقدیرده
ایسه (هنکام) و (ایام) قافیه غیر معموله اولمش اولور .

ذو قافیتین - ایکی قافیه لی شعر در .

ذو قافیتین

ذو قافیتین ایکی نوعدر :

- متقرن .

- محجوب .

متقرن - قافیه لری متوالی اولان ذو قافیتیندر .

متقرن

بر قاق مثال :

ایسه براقلیمه کر بئل سعادت کوکی
هر کدای بی نواسی شوکت (سلطان) بولور
بن او خاقانی عهدم کیم بنم ممد و حمک
آستانروب سرای دوات (خاقان) بولور

نفعی

آفتاب صبح معنی بزم اندیشه مده جام
باده فیض لایزال جاودان مدر بنم
حشر اولنجه تا که شوق انکیز بزم اهل دل
کیف صهبای خیال شادمان مدر بنم

وله

افزونئی حیات (کم آزار) لفته در
سرمایه نجات (سبکبار) لفته در

نابی

حتلیدر جانان وداعمدن ایدرسه امتناع
وهم ایدر اشك روانمدن بلا (باران) یدر

حزن هجرانكده ماتمزار كورددم عالی
شمیدی هر صحرای بکابر کربلا (میدان) یدر

—

هانکی عاقل دیرکه آنحق راه (کلشن) دن کچك
برده غافلر! شونا لشگاه (شیون) دن کچك

—

محجوب

محجوب - قافیه لری فاصله لی اولان ذو قافیتیندر .

مثال :

عالم (اسیر دست مشیت) دکلیدر
آتم (زبون پنجه قدر) دکلیدر نابی

ذوالقوافی - ایکیدن زیاده قافیه سی اولان شعر در .

مثال :

پادر کل تلاش (مقال) کله خامه لر
پیچیده فراش (خیال) کله نامه لر نابی

دیگر :

ار باب (قلم) معرفت آموز امم (در
آداب) امم (ماحصل فیض قلم) در
عونی بك

ذوقافیتین ایله ذوالقوافیده قافیه لر بیننده بولسان بر یاخود
بردن زیاده کلمه یه (حاجب) دینیلیر . (محجوب) حاجبلی دیمك
اولور .

ذوقافیتین ایله ذوالقوافیده قافیه اخیره (قافیه اصلیه) ، دیگر
قافیه ویا قافیه لر (قافیه ملحقه) نامیه یاد اولنور .

(ذوالقوافی) ایله (ترصیع) بیننده کی فرق (ترصیع) مجعنه
بیان اولنه جقدر .

قافیه یه عائد بعض ملاحظات مخصوصه

[مجموعه معلم] ده بیان اولندیغی اوزره (حروف املا) حروف املا

کلمات ترکیه ده قفحه یه ، ضمه یه ، کسره یه علامت اوله رق یازیلان

(اه وی) حرف لریدر . بونلر لسانمزدده مستعمل کلمات اجنبیه ده

دخی قوللانیلیر . بعضاً بونلردن (اه وی) حرف لری حروف مد

حکمی آلیر . بو حالده آنلره (حروف مستخلفه) دینیلیر .

(حروف مد) عربی ، فارسی کلماتده قفحه یی ، ضمه یی ،

کسره یی مدایدن (اه وی) حرف لریدر . بعضاً حروف مد

حروف املا دن اولان (اه وی) حکمنده قالیر . بو حالده آنلره

(حروف معزوله) دینیلیر .

حروف املا نك اساساً خدمتی ماقبلنده کی حرفك حرکه سنی

کوسترمکدر ، مد ایتمك دکدر . حروف مدك اساساً خدمتی

ماقبلنده کی حرفك حرکه سنی کوسترمکله برابر مد ایتمکدر .

برحرف املا حرف مد حکمی آلیرسه (حرف مستخلف)،
بالعکس بر حرف مد حرف املا حکمنده قالیرسه (حرف
معزول) اولور •

(استخلاف) حرف املائی حرف مدیرینه، (عزل) بالعکس
حرف مدی حرف املا یرینه قویمقدر •

استخلاف
عزل

بولسه امکان خیال یار کلز یانه

مصراعنده (یان) ده کی (۱) مستخلفقدر •

عالم بالایه سوق ایلر بوعلوی جان بی

و :

حزنه دائر صحبت آچدک ایلدک محزون بی

و :

ای خود آرا ایلور آینه لر خود بین سنی

مصراعلرنده (جان) و (محزون) و (خودبین) ده کی (اوی)
معزولدر • مجتهدیه بیان اولنه جنی اوزره حروف معزوله
(تقطیع) ده حسابیه داخل اولماز •

استخلاف هر یرده اجرا اولنه ماز • موقعی سلیقه صحیح
تعیین ایدر • مثلاً شیخ الاسلام یحیی افندینک :

فرقتکده چکدیکم آلامی چکمز طاغیر

مصراعنده (طاغیر) ده کی استخلاف ثقیل کورینور • حال بوکه
فضولینک :

خیال ایلر کورن کیم لعلنددر قهرمک طاشی
مصراعنده (طاشی) ده کی استخلاف ثقیلندن وارسته بولنور •
یا قینک :

طفل ایکن دایه سی قوجاغنده
کل ایدی قویمدق بوداغنده

یعنی ده حسن استخلاف مثالرندندر •
فضولینک :

ویرسیدی آه مجنون فریادمک صداسن
قوشمی قرار ایدردی باشنده کی یوواده

یعنیله ندیمک :

ذوق احباب ایدوب ایواه ندیمایواه
آدک آ کلمدی بی چاره س-نک آراده

یعنیده (یووا) و (آرا) ده اجرا ایدیلن استخلاف دخی یوقاریکی
(طاغیر) قدر ثقیلدر •

عزل ایسه -- ما قبلنده حروف مددن بری بولنق
شرطیه - نون ساکنه ایله بیتن کلماته مخصوصدر • نون
متحرک و یا متحرک حکمنده اولور ایسه [*] عزل جائز اولماز •
چونکه بو صورتده اوله جق عزل (زحاف) ک عینی اولور •
نونک متحرک اولسنه مثال :

[*] متحرک متحرک حکمنده اولسی کنایه سی همزه تعقیب ایتکله
بولور •

المن قيسه قياس ايمه دل مزونك
يوق ايدى عقلى نه دردى وارايدى مجنونك

نونك متحرك حكمنده اولسنه مثال :

اى فراق لب جانان جكرم خون ايتك
چهره زردى خوناب ايله كلكون ايتك
فضولى

آخر كلهده - متحرك اولسون اولسون - نوندن باشقه
بر حرف بولنديغى صورتده ايسه (زحاف) مجتثده ايضاح
ايديله چكى وجه ايله عزله هيچ جواز ويريله من .
بعض كمانده مصراع آخرنده اولق شرطيله استخلاف اجراسى
تجويز اولنور .

كلرده اولور بونك دلجو
حقك بزه بر عطا سيدر بو

ييتنده (بو) لفظى رايحه معناسنه آلميه رق اسم اشارت عهد
اولنديغى تقديرده تحقق ايدى چك استخلافده باس كورلمز .

سير ايت شوتلاشى ، باق شوشوقه
شادى دم و صالدر بو
اى كورپه قوزى نه حالدر بو
الغبطه شو حالته ، شو دوقه

قطعه سيله فضولينك :

نه بلادر بزه يارب نه قاره كوندر بو

مصراعنده كى (بو) لرده بويله در .

ذكر اولنان تجويز اواخر مصارعده بولنه جق (اوى)
حروف املاسنك حروف مد صورتنده تلفظى طبيعته اضطراب
ويرمه مكده اولسنه ، تعبير ديكرله : طبيعى بولنسنه مبتنيدر .
از جمله مشاراليهك (صو) رديفلى نعت شريفنى روان بر صورتده
الوقويه بيلنلر صانيرز كه بو خصوصى بلاتردد تسليم ايدرلر .
اماينه مشاراليهك :

دمادم قطره قطره قان ياشمدر كيم چيقار كوزدن
ويا پيكانلرك كيم آتش دل آنى صو ايلر
ديدم كيمدر پریشان ايلين عاشقلى احوالن
صبا كوستردى تار سنبل زلفن كه بو ايلر

ييتلرنده كى (صو) و (بو) قافيه لرى زما نغزده شايان تقليد عد
اولنه ماز .

آخرنده حروف املا دن (ي) بولنان بر كله ايله آخرنده
حروف مددن ينه (ي) بولنان ديكر بر كله نك تقفيه سى مجازدر .
مثال :

الهي بادشهر پادشاهى
نه خير تبخشد رصنعك الهى
اكرم بك

بويله قافيه لرده دائما حرف املا دن اولان (ي) حروف
مددن اولان (ي) كى تلفظ اولنور . هيچ بروقت بريكى
لوتنه كنه تابع قيلنماز .
براى كى مثال دهها :

ترك ايلمش ايشته آشياني
خاكي ايكن اولمش آشياني

آتش كي سومه اعتلاني
كل اوله آسوديكم هوايي

پك ناعمل آنك غروري
برشيمي ايمش علوصوري

دوهولري آه پك دروني
عاشق بكنير بوارغوني

دامن كوهه طوغري كيتدكيه
بر كذر كه كورندي نوراني
كليور بانك آب جوشاني
كوش تحينه دقت ايتدكيه

ياء معروفه بومجوده (ياء معروفه) و (ياء مجهوله) تعبيرلرينك قبول
ياء مجهوله مدار سهولت اولور. حروف مددن اولانه ياء معروفه، حروف

املادن اولانه ياء مجهوله ديملير. الف ايله واوي دخي معروفه
ومجهوله ديه توصيف ايده بيلير. هاء رسميه ايله واورسميه
عربي، فارسي كلماته مخصوصدر.

يوقاريده كوسترلديكي اوزره قاييده ياء معروفه ايله ياء مجهوله
له نك جي جائز ايسده بونده دقت اولاندجق برجهت واردر.
اوده تلفظك فحاي شعرا بئنده معروف ارلان صورته مناسير

كورنمه مسي، بناء عليه سمعه وحشي كلمه مسيدر. بو حالده يالكز
ياء معروفه ايله ياء مجهوله نك دكل، ايكي ياء مجهوله نك دخي اجتماعي
تجويز ائتمهك مقتضاي حسن طبعقدر.
(خرابات) مقدمه سنده لسانمز نفعي ايله نابي طرفندن
تجديد اولنديغندن بحث ايدلديكي صيرهده ايراد اولنان و:

اي واقف هر مكاني رومك
بر آدي ده وانمي ارض رومك

تعريض مشهورينك صدورينه سبب مستقل اولان:

ياپدي ايكي طشره لي بو حالي
وانلي بريسي بري رهالي

بئتنده برنجي (لي) كسره خفيفه، ايكنجيسي كسره ثقيله ايله تلفظ
اولنق طبيعي اولديغنه كوره قافيتين بئنده امتزاج تام حاصل اوله.
مامشدر. ايكي سي ده كسره خفيفه ويا كسره ثقيله ايله اوقونه جق
اولسه بري مطلقا سمعه وحشي كليز.

نديمك:

بعض احباب كمر سيرين ايدر تنهاده
باري بزده كمر سير ايده لم صحراده
طاغده صيد غزال ائتمكه حسرتي چكر
خانه ده كوزلري آهوسن ايدر آماده

بئتلري حقنده ملاحظه بيان ايدنلرك «تنهاده ايله صحراده قافيه
اوله بيلير، فقط بوايكيسي له آماده تقفيه ايديله مز، چونكه آنلرده كي ده

فتمه ثقیله ایله او قوندینی حالدده بونده کی فتمه خفیفه ایله تلفظ
اولنیور « دیلری شایان قبول دکلدر ، زیرا قافیه ده واقع اولان
بویله (ده) لری عمومیت اوزره فتمه خفیفه ایله تلفظ اتمک
معتاد فصاحدر .

عزیمی زاده حالتینک :

سن ایدک کلبه احزانه قویان یعقوبی
آیروب حضرت یوسف کی کوز نورندن
کتیروب عشق الهی بی کوکل خانه سینه
قاپودن باقدیره ایم غم دنیا سنی بن

قطعه سنده کی (دن) اداتی دخی (بن) کی فتمه خفیفه ایله او -
قومق ایچون بر مانع یوقدر . حتی اصله موافق اولان ده بوصورتدر .
اصحاب فصاحت (نورندن) دیمکه (نورندن) دیمکی ترجیح ایدر .
مع هذا (جانندن ، جاناندن) کی (دن) ک فتمه ثقیله ایله تلفظی
مقتضای فصاحت اولان بر لر بوکا قیاس اولنه ماز .
الفاظ ترکیه دن یاییله جق قوافی بالخاصه نظر دفته آلفغه
شایاندر . ثقیلی پک مناسبتسز یا خود مناسبتسزی پک ثقیل اولور .
شیخ الاسلام یحیی افندینک :

نه مجلسر قورلشدر نه ساغرلر سورلشدر
محبت باده سینه بکزر اولماز هپ کورلشدر

مطلعه سنده کی قافیه لری ضمه لک بری خفیفه مقبوضه ، دیکری خفیفه
مبسوطه اولق صورتیله اختلافندن طولای بکنمه مک لازم
نکسه بیله آنی تعقیب ایدن :

کوکل مرا آتی صد پاره کوردم راه ذلتده
مقرر بر جفا جو سنکدل یاره اورلشدر
بیئتک ضمه ثقیله لی قافیه سنی بکنمک ده الدن کلز . ثابته .

میان نشئه جامه خار غم کیرمن
یمین ایدر سه م او معنایه باشم آغیرمن

مطلعی ایسه حقیقه صداع ویره جک مقفیاتندندر .
ضمه ثقیله مبسوطه ایله ضمه ثقیله مقبوضه مک و ضمه
خفیفه مبسوطه ایله ضمه خفیفه مقبوضه مک قافیه ده ازدواجی
کندیلرندن صکره بر حرف متحرک بولنق شرطیله تجویز
ایدیلیدر . فقط نصل اولور سه اولسون ضمه ثقیله ایله ضمه
خفیفه مک ازدواجنه جواز ویرمه ملیدر . ندیمک شو مصراعلرینه
یاقه لم :

واروب اول درد شناس دل وجانی کورسه م
خاک پایینه ندیماینه یوزلر سورسه م
کیجه لر آراسه م آغزین لبن امسه م سورسه م

(کورسه م) ایله (سورسه م) ده کی ضمه لک بری مبسوط
دیکری مقبوض اولقله برابر ایکسی ده خفیف اولدیغندن
ازدواجلرنده بأس یوقدر دینیله بیلیر . فقط (سورسه م) ک ثقیل
ضمه سی ایشی بوز میوردینیله من . هر حالده کمال اتحاد ممدو حدر .
قافیه عائد ده بر خیلی ملاحظاتمز وار ایسه ده شمذیلک
یوقدرله اکتفا اتمکی انبب عد ایلدک .



شعر — بو مقاله ده شعر دن بحث ایتک ایستورز . بو گونه قدر یازد یغمز شیر آره سنده شعره دئر در میان ایتدیگمز ملاحظاتی ذهنمزدن کچیردیگمز حالده بونلرک اک طوغریسی یا خود طوغری یه اک قریبی اولمق اوزره [مجموعه معلم] ده مندرج بولنان (نظم - نثر) بندینی بولیورز . او بندی تشکیل ایدن فکری بوراده دخی اساس اتخاذا ایدنه جگمزدن هان عینا کبی بر صورتده بروجه آتی درج ایدیورز .

نظم — نثر

بو نامرله ایکی یه تقسیم اولنان « سوز » یا بلیغدر ، یا دکلدرد . بلیغ ایسه نظم اولسون نثر اولسون « ادبیات » دن عد اولنور . دکل ایسه کذلک نظم اولسون نثر اولسون ادبیاتدن عد اولنماز . نقاد بلاغت صانع حکیمک انسانلردن پک چوغنه احسان بیورما مقده اولدیغی « ذوق سلیم » در . سوزک بلیغ اولوب اولمادیغی « معیار ادبیات » دینلکه شایان اولان بو قوه جلیله تعیین ایدر .

« شعر » ادبیاتک اک کوزل پارچه لریدر . بو حالده شعر ادبیاتدن بر قسم خاص اولمش اولور . ادبیاتدن عد اولنمایان سوزده شعر دینله مه مک لازم کلیر . چونکه هر حالده شعر مفهومی ادبیات مفهومده داخلدر . حقیقتده بر سوزک شعر نامنی آله بیلرسی اول امرده

ادبیاتدن معدود اولسنه توقف ایدر ، منظوم اولسنه دکل . اوله بیلیرکه برسوز منظوم اولورده ادبیاتدن معدود اولماز . آکاشعر دینله منز (ذی روح) مفهومده داخل اولمیا نه (انسان) دینله بیلیرمی ؟

مادامکه سوز ادبیاتدن صایله بیلیمک ایچون بلیغ اولمق لازم کلیر ، مادامکه سوز منظوم اولمقله بلیغ اولمق لازم کلیر ، شعر دینله جک سوزک مطلقا منظوم اولسی اقتضا ایتمز . مثلاً فضولینک زمانی حکامندن شکایت یوللو سویلمش اولدیغی « سلام ویردم ، رشوت دکلدرد دیه آلمدیلر ! » سوزی بلیغدر . بنا علیه ادبیاتدن معدوددر . بوکا شعر دیمک ایستینلره ده حق ویریله بیلیر . فقط ثابتک :

چرب و شیرینی بیوب عاشق ایدر حد و ثنا
حصه یوقی اوسوکشدن بزه بر پاره مدد

بیتی بیک پارچه اولسه شعر نامنی آله ماز . فصل آله بیلسونکه برکره ادبیاتدن معدود اوله ماز .

بویله سوزلره دینلسه دینلسه « نظم » دینیلیر . حال بوکه یوقاریده بیان اولندیغی اوزره منظوم برسوزک ادبیاتدن معدود اوله مامسی جائزدر . ادبیاتدن معدود اوله میان سوز ایسه هیچ بروقت شعر اوله ماز .

کمال بکک « آثار ادبیه یه زاده طبیعت دینلر خفایای قلبه نه بیوک وقوف کویستر مشلر ! هر منتسب ادبک وجدانسه

مراجعت ایدرم : انسانك یازدیغی شیلر سویلشدی اولادیله برابر دکلیدر ؟ « سوزینه باقلسون . پك سویلی برشعر دکلیدر ؟

بزده هرمنتسب ادبك وجدانسه مراجعت ایدرز : ثابتك شو بیتنه شعر دیوب ده كلك بوسوزینه شعر دیمه مك موافق انصافیدر ؟

ادبیات دینیلن بلیغ سوزلره طبیعت درجه بلاغتیه کوره آز چوق منجذب اولور . بوانجذابى حاصل ایتین سوزلر دائره ادبیاته کیره مز . ادبیات ایچنده طبیعتك اك زیاده منجذب اولدیغی سوزلر شعردر .

استطراد

مشاهیر شعرای عربدن ابن الرومىنك هجوندن حذر اوزره بولنان وزیر قاسم بن عبدالله شاعر مشار الیهی برکون مجلسنده تسمیم ایتدرمش ایدی .

ابن الرومى تسمیم اولندیغی حس ایدنجه مجلسدن چیقماق اوزره قالقار . قاسم ایله بیلرندیه شو محاوره جریان ایدر :

— نرهیه کیدیورسین ؟

— کوندردیكك یره !

— بزم پدره سلام سویله !

— جهنمه اوغرایدجق دكلم !

ایشته ابن الرومىنك بوصوك جوابی منظوم اولماقوله برابر

ارباب ذوقه کوره کندیسینك پك چوق بر جستیه مصراعرلندن دها شاعرانه برسوز عد اولنور .

ادبیات بلیغ سوزلر ایسه شعر اك بلیغ سوزلردر . شعر ادبیاتك اك منتخب پارچه لری اولدیغندن هر شعر ادبیاتدن معدود اولدیغی حالده هر ادبیاتدن معدود اولان سوز شعر اوله ماز .

شعر هم نظم هم نثر کسوه سنده تجلی ایده بیلیر . بر سوزه منظوم اولدیغی ایچون « شعردر » دینیله میه جکی کبی منشور اولدیغی ایچون « شعر دکلدر » ده دینیله مز . شو قدر وارکه اکثریت اوزره طبیعت منظوم اولان شعره منشور اولان شعردن زیاده میل ایدر . مثلاً لطیف بر فکر نثر ایله شعر دینیله جك صورتده افاده اولنسه ، ینه اوفکر نظم ایله كذلك شعر دینیله جك صورتده بیان ایدلسه طبیعت نظمه نثر دن زیاده منجذب اولور . بوده نظمه کی اوطبیعت نواز آهنگ مخصوصدن ایلری کلیر . قافیه ایسه نظمك زیور جاذبه افزا سیدر . بونك ایچوندر که قافیه لی نظم قافیه سز نظمندن زیاده سویلیر .

ظن ایدرز که شعرك اوتیه دن بری بعض قیود سائر ایله برابر « موزون ، مقفی سوز » دیه تعریف اولنسی بیان او . لندیغی اوزره طبیعتك كلام منظومی كلام منشوره ، قافیه لی نظمى قافیه سز نظمه ترجیح ایتك استعدادنده بولنسنندن نشأت ایتشدیر . یوقسه شعرك مطلقاً موزون ، مقفی اولسی ایچون لزوم حقیقی یوقدر .

منظوم سوزده عرفده « شعر » دیورلر . چونکه بونامه اك
زیاده لایق کوريله جك جاذبه لی سوزلر نظم آره سنده بولنه بیلیر .
بز علی العموم بلیغ سوزلره « ادبیات » دیمکله برابر بونلرک
اك زیاده بلیغ اولانلرینه « شعه » دیورلر . منظوم و یامشور
اولسنی قید ایتورلر . مع هذا شعر دینیله بیله جك برسوزك
مشور اولسنه نسبتله منظوم اولسندن دهها زیاده ذوقیاب
اولدیغیزی اعتراف ایلورلر .

بز شعری نظم ونثره تعیم ایدیورلر . آنلر نظمه تخصیص
ایدیورلر . بو تخصیص شایع اولمش . « شعر » دینلدیکی کبی
موزون ، مقفی سوز خاطره کلیور . حال بوکه بالاده کوسترلدیکی
وجدایله اوله موزون ، مقفی سوزلر وارکه شعر اولق شویله
طورسون بایاغی ادبیاتدن بیله معدود اوله میور . بالعکس اوله
مشور سوزلرده وارکه نیجه منظوماته فائق بولنیور .

اعتقادمنه کوره نطق یارادیله شعر موجوددر .

آنکه اول شعر کفت آدم صفی الله بود

طبع موزون حجت فرزندی آدم بود

مدعاسنی اثبات ایچون حضرت آدمه اوغلی هابیک مقتولیتی
اوزرینه :

تغیرت البلاد ومن علیها

فوجه الارض مغیر قبیح

دیه مرثیه سویلتمکه نه حاجت ! طبیعتک بوبابده کی تمایلاتنه دقت
ایتمک کافیدر .

دنیاده شعرسز آدم اوله ماز . شعر امید کیدر . شو قدر
وارکه هر کسك شعری کندی ذوقنه کوره اولور . وزن ، قافیه
یوق ایکن شعر وار ایدی . هیچ نطق اولورده شعر اولمازمی ؟
بو حالده شعرک نظمه تخصیصی حادث اولدیغی تبین ایتزمی ؟
بزم تعریف ایتکه چالشدیغمز شعر طبعیدر . شعره
موزون ، مقفی سوز دیمک صناعیدر .

بو بابده طبیعتک صناعیلکه البته تقدم ایدر . چونکه انسانک
هیچ بکنده میه جکی برسوز منظوم اوله بیلور . بالعکس پک
بکنه بیله جکی برسوزده مشور بولنه بیلور . اوته کنه شعر دیمکه ،
بریکنه دیمکه نه دن مجبور اولسون ؟ بو ذوقه عائد بر کیفیتدر .
هانکی سوزی شعر اولق اوزره تلقی ایدیورسه بو نامی آکا
ویرر . کندیسنبجه هیچ بر مزیتی اولیان سوزلره مجرد منظوم
اولدیغی ایچون شعر دیمکدن باشقه ادبیات بیله دیمه مک النده در .
بوراده شایان دقت اولان جهت شودر که بلاغتله پک منا -
سبتی اولیانلر مثلاً بر بیت کورر کورمن « بو شعر دکل .
ادبیاتدن بیله دکل » دیمکه احتیاط ایتلیدرلر . چونکه او بیت
شاید کرچکدن شعر ایسه بو ادعا موجب خجالت اولور . هر
حالده فکر صحیح اوزرینه حکم ویرمکه چالشمیدر .

بو افادادن مقصدمز « بوندن بویله شعر لفظی موزون ،
مقفی سوز معنا سنده استعمال ایتیمه لم » دیمک دکلدر ، شعر طبیعی
نه دن عبارت اولق لازم کله جکنه دائر حدمز جه بر فکر
ویرمکه چالشمقدردر .

حرز . شعر دیدیکمز وقت یرینه کوره معنای طبیعیستی
یا خود معنای عرفیستی قصد ایده بیلرز .

آیات و احادیث شریفه ذاتاً مستشادر . بونلری ادبیاتدن
عد ایتک هیچ بر ادیبک حقیله تقدیرینه مقتدر اوله میه جغی
علویت مقدسه لرینی تجیل ایتهمک دیمک اوله جغی جهتله مغایر
ادبدر . بناء علیه « آیات و احادیث مادام که اک بلیغ سوزلردندر »
تعریفکزه نظراً بونلره ده شعر دینلک لازم کلیر « اعتراضی
وارد اوله ماز . حتی شعری « موزون ، مقفی سوز » دیه تعریف
ایدنلرک اوزانه موافق اوله رق ورود ایدن آیتلر ، حدیثلر
خارجده قالمق اوزره تعریفه علاوه ایتدکلری « قصده مقارن
اوله رق سویلنلین » قیدی بی لزوم کورینور . چونکه آنلرک
تعریف ایتک ایتدکلری شعر البته ادبیات مفهومندن خارج
دکلدر . آیات و احادیث ایسه اوزانه موافق اولسون اولسون
بو مفهومک داخلنده تصور اولنمقدن متعالیدر .

او مقدس سوزلر بر طاقم معالیدر که ادبیات آنلردن نه درجه
اقتباس ایدرسه اودرجه تعالی ایدر . هیچ تعالی ایدن شی ایلله
آنی متعالی ایدن شی بر اولورمی ؟ مضی باشقه . مستضی ینه
باشقه در . مهر ایلله ماهی مساوی کوره جکز ؟

آیات و احادیثی نصل ادبیاتدن عد ایده لم ؟ ابلغ الانبیایه
شاعر دیمک ایستینلرک قولنی تنظیرمی ایده جکز ؟

ظنزه کوره بو افادتدن سوزک قسم عالسی دیمک اولان

ادبیات ایلله ادبیاتک قسم اعلاسی دیمک اولان شعرک ماهیتلری
آکلاشلدینی کبی ادیب ، شاعر عنوانلرینک ده کیلره ویرلمی
لازم کله جکی تبین ایتدی .

بونکله برابر « شعر نه در ؟ » سؤالنه « اک بلیغ سوزلردر »
جوابی کافی کوریلله بیلیرسده « ادبیات نه در ؟ » سؤالنه یالکز
« بلیغ سوزلردر » جوابی کفایت ایتمز . ادبیات دینیلنجه باشقه
بر معنی دهها آکلاشیلیر که اوده « بلیغ سوزلر تالیفی ایچون طوتیلان
اصول » در . بو حالده ادبیات عنوان فن اولمش اولور .

دیمک اولیور که بواصوله موافق اولمق اوزره یازلمش بر
مکتوبی ادبیاتدن عد ایده بیلله جکمز کبی ینه بواصولی معرف
اولمق اوزره یازلمش بر کتابی ده ادبیاتدن عد ایده بیلله جکمز .
انتهای بند

شو بندک خلاصه الخلاصه سی دیمک اولان « سوز بلیغ
اولمدجه شعر اوله ماز ، حتی ادبیاتدن معدود اوله ماز » حکمنک
حقیقی آکلاشلق اوزره یوراده (بلاغت) دن بحث ایدلک
اقتضا ایدیور :

اول امرده دیه لم که :

بلاغت بر صفتدر که آنکله ماهیتلری مختلف ایکی شی اتصاف بلاغت

ایدر :

— کلام .

— متکلم .

کلام ایله متکلمک ماهیتلرنده کی اختلاف صفتک متصفلردن هر برینه کوره ایکی صورت مختلفهده تجلی ایتسنی ایجاب ایلدیکندن علی الاطلاق، یعنی تعیین تجلیکاه ایتکسزین بلاغتی حقیقه تعریف ایتک ممکن اوله ماز. آنک ایچون «کلامده بلاغت» ویا «متکلمده بلاغت» دیه تعیین تجلیکاه ایله ایکی درلو تعریف اولنور.

کلامده بلاغت
متکلمده بلاغت

کلامده بلاغت فصیح اولمقله برابر مقتضای حاله مطابق اولمسیله، متکلمده ایسه کلام بلیغ ایله افاده مرام ایتک منکهنی حائر بولنمسیله تحقق ایدر.

(بلیغ) بلاغته متصف دیمک اولدیغنه کوره هم کلامه هم متکلمه وصف اوله بیلیر. (نظم بلیغ، قصیده بلیغ، خطیب بلیغ، ادبیه بلیغ) کی تعیرات قوللانیلیر.

مقتضای حال حالک اقتضا ایتدیکی صورت دیمک اولان (مقتضای حال) مقتضای مقام تعیرینه بدل (مقتضای مقام) و (اعتبار مناسب) تعیرلری دخی اعتبار مناسب استعمال اولنه بیلیر. جعلرنده (مقتضیات احوال، مقتضیات مقامات، اعتبارات مناسبه) دینیلیر.

(حال) تعیرینه دقت ایدلم. حالده بولنه جق تنوعات نهده بولنه بیلیر؟ نفس و آفاقدده مشاهده ایدلمکده اولان بونجه کیفیات رنگارنگک هر بری بر حالدر. هر حالک مقتضاسی اولور. هر مقتضایه کورهده سوز بولنور. حال تجلیات آلهیه قدر متوعدر. مقتضاده اوילה. سوزده اوילה.

سوزک کافه مزیاکی مفهومده مندرج اولان بلاغتك مدار

وجودی مقتضای حاله مطابقدر. آنندن محروم اولان سوزده فصاحت بولنسهده بلاغت بولماز.

سوزک درجات بلاغتی مقتضای حاله مطابقتک درجاتیله متناسب اولور. بر حالک مقتضاسنه مطابق برقاج درلو سوز بولنه. بیلیر. بولنردن هانکیسی مقتضایه الزیاده مطابقت ایدرسه اوبلغ عد اولنور.

مقتضای حال دیدیکمز شیئک تیاترو طرزنده یازیلان آثار ادبیهده دخی بیوک اهمیت و دارد. اشخاص وقعه یی نوبت نبوت نطق ایده جک اولان تیاترو مؤلفی بولنردن هر برینه مقتضای حاله مطابق اوله رق سوز سو یلتملیدرکه بلیغانه بر اثر یازلمش اوله بیلسون. (استعاره لسان) مجتهدده بورالره دائر ایضاحات ویریه جکدر.

جزئی ملاحظه ایله کلاشیلیرکه سوزده طبیعیک دینیلن عزیت دخی مقتضای حاله مطابقت سایه سنده حصول بولور. «مقتضای حال مقتضای حال مخاطب دیمکدر» دینلر خطا ایدرلر. متکلمک حالی یوقی؟ اوילה برادعاده بولنق کنیدی اوانوتق قبیلندن اولمازمی؟ یوقاریده «نفس و آفاقدده مشاهده ایدلمکده اولان بونجه کیفیات رنگارنگک هر بری بر حالدر» دیه اشارت ایتدی کمز وجه ایله حالک تعمیمی واجبدر. انسان یالکمز مخاطبک حالنه کوره می سوز سویلر؟ کنیدی حالزمی تصویر ایتیه جکمی یز؟ مثلاً قلبنک بعض حسیات شدیدیه مغلوب اولدیغنی

کورن بر شاعر فریاد ایدر . او فریاد آنک حسب حالیدر .
باشقه سنک حالی دوشونمکه وقتی بوله بیلیر ؟ عجبا فضولی نشید
آیه یی یازارکن کیمک حالی خاطرینه کتیرمشدر ؟ :

دوست بی پروا ، فلک بی رحم ، دوران بی سکون
درد جوق ، همدرد یوق ، دشمن قوی ، طالع زبون

سایه امید زائل ، آفتاب شوق کرم
رتبه ادبار عالی ، پایه تدبیر دون

عقل دون همت ، صدای طعنه بر یردن بلند
بخت کم شفقت ، بلای عشق کون کوندن فروق

بن غریب ملک ، راه وصل پرتشویش و مکر
بن حریف ساده لوح و دهر پر نقش فسون

هر سهی قد جلوه سی بر سیل طوفان بلا
هر هلال ابرو قاشی بر سر خط مشق جنون

یلده برک لاله تک تمکین دانش بی ثبات
صوده عکس سروتک تأثیر دولت واژگون

سرحد مطاوب پر محنت طریق امتحان
منزل مقصود پر آسیب راه آزمون

شاهد مقصد نوای چنک تک پرده نشین
ساغر عشرت حباب صاف صهبا تک نکون

تفرقه حاصل ، طریق ملک جمعیت مخوف
آه یلیم نیلیم یوق بر موافق رهنمون

بویله سوزلر غیر اختیاری آهلیر کییدر . بر درجه یه قدر
یا لکن صاحبک حالی معرف اولور . کیمسه یه برشی دیمک ایچون
ایزماز .

(آتشپاره) ده مندرج اولان (فریاد) سر لوحه لی منظومه تک
شوپارچه لری ده اولدقجه حالزه موافقدر :

وولغا نمیسین ای دل هوا خواه
آتشکده اولدی سینه سندن

طور مازنه یا نادر سین الله الله
یاندیم سنی شعله بار ایدندن

§

بر شعله مزاج دلفرو زک
نار هو سیله مشتعلسین

افکار شبک ، خیال روزک
بر در ، هپ آنکله مشتعلسین

§

اولسه کده کپی نهان ، اولورسین
صبرک طو تیشنبه آتش افشان

یان ، طورمه که بر زمان او اورسین
منظور حقیقت آشتایان

§

انای لمعه خوش بروز سنسین
تو آتشی دو دمان عشقک

ای برق جها تفروز سنین
مشعلکشی کاروان عشق

§

حیرته بو عشق بی سکوندن
اک جاذبه لی بتانی شهرک
خشیته بو جذبه الجنوندن
اک جذبه لی عاشقانی دهرک

§

بیلم نه دیسه که ایتسه ایما
حال دل حسرت آرمایی
بر حاله در که ایلر ابکا
بر کویه ایله بیک آشنایی

§

بولسه م اوسوزی که ایتسه ایفا
دنیا ده بولند یغم زمانی
اخلاف کزین ایدردی ایفا
دمبسته سی اولد یغم فغانی

بونکله برابر «سوزی مخاطبک حاله کوره سویلملی»
تمنیه سی ده بر دستور ادبیدر . ذاتاً بوسورتک التزامی بر عاقل
ایچون طبعیدر . مثلاً بر جاهله سویلیله جک سوز بر عالمه سویلنلمز .
سویلیلیر ، فقط بر نکته یه مبنی اولمق شرطیله .
بر نکته یه مبنی دیمک مقتضای حاله مطابق دیمکدر . نکته سوز
سوز مقتضای حاله مطابق اولدیمیه جفتدن بی لزوم صاییلیر .

بعض قدما مخاطبده اوچ حال بولور:

— خلوت ذهن .

— تردد .

— انکار .

دیر لرکه :

— کلام بو حاللره مناسب برر صورتده سوق اولنور .
برنجیسنه کوره «ابتدائی» ، ایکنجیسنه کوره «طلبی» ، اوچنجیسنه
کوره «انکاری» وصفی آلیر . مخاطبک بر خالی الذهن یا خود
بر متردد و یا بر منکر اولسنه کوره سویلنلین سوز «کلام ابتدائی»
یا خود «کلام طلبی» و یا «کلام انکاری» عنوانی ویریلیر . جملر نه
«ابتدائیات» ، طلبیات ، انکاریات «تعبیرلری قوللانیلیر .
ابتدائیاتده — مخاطبده تردد و انکار حاللرندن هیچ بری بولنیه جفی
جهتله — اکثریا تأکید احتیاج مس ایتمز . ساده صورتده افاده
مرام ایدیلیر . یالکز مخاطب تقریر ایدیلن مسئله یی آکلایه مدینگی
صورتده تأکید مراجعت اولنور . طلبیاتده ساده لک
محافظه سی جائز اولمقله برابر — ترددی قطعاً ازاله ایچون —
تأکید مستحسن کوریلور . انکار یاتده ایسه — مقصد انکاری
اقراره تحویل اوله جفتدن — تأکید وجوب تحتنده بولنور «
ظن عاجزانه مزه کوره بویله شیلر فن بلاغتک ال ساده
مسائلند ندر .

(مجموعه معلم) ده بواوچ درلو سوزنه مثال اولمق اوزره:

حق پرستم عرض اخلاص ایتدیکم درگاه بر
بر نفس توحیددن آیرلدم الله بر

پیتنک مصراع ثانیه سی :

— توحیددن آیرلدم.

— بر نفس توحیددن آیرلدم.

— بر نفس توحیددن آیرلدم الله بر.

صورتلرنده کوستره رك « بومصراعلردن برنجیسی — تأکیددن
خالی اولدیغندن — ابتدائی وطلبی یه ، ایکنجیسی — « بر نفس »
ایله مؤکد بولندیغندن — طلبی وانکاری یه ، اوچنجیسی — « بر
نفس » دن باشقه « الله بر » ایله ده تأکید اولندیغندن — یالکز
انکاری یه مثال اوله بیلیر « دیمش ایدك .

اوت ، اوله بیلیر . فقط اعتراف ایدلم که بز اویتی (خلاصه
الاخلاص) نامنده کی رساله جکک ظهرینه یازدیغمز وقت
توحیددن آیرلدیغمیزی انکار ایتمش بر شخصك ولوخیالا اولسون
قارشیسنده بولمئور ایدك . حقیقته او بیت مخاطبی اولمیان
وجدانیاتندردر . آنی اخلاص شریف تفسیرینه متعلق سکر اون
صحیفه یازی یازمقدن عبارت اولان حال سویتمش ایدی .

بحثی تنويع ایدلم :

بالاده کی افادادن آکلاشدیغنه کوره بلاغت کلامه نظراً :

— فصیح اولمقله برابر مقتضای حاله مطابق اولمق .

طرزنده ، متکلمه نظراً .

— کلام بلیغ ایله افاده مرام ایتك ملكه سنی حائر بولمق .

یولنده تعریف ایدلك لازم کلیور .

بلاغتك حاوی اولدیغی معانی بیلمش اولمق ایچون بوایکی

تعریفی کورمك کافی ؟ دکل .

کلامده بلاغت ، متکلمده بلاغت دیدیکمز کی برده « فن
بلاغت » دیورز . دیمك که بلاغت بر فن . سائر فنلر کی بودخی
تعریف ایستر . « فن بلاغت نه در ؟ » سؤالنه جواب اوله رق
یوقاریکی تعریفلردن هر هانکی سنی اوقویه جق اولسه ق موافق
دوشمدیکی گوررز . چونکه فن بلاغت نه کلامك فصیح اولمقله
برابر مقتضای حاله مطابق اولمئیدر ، نه ده متکلمك کلام بلیغ
ایله افاده مرام ایتك ملكه سنی حائر بولمئیدر .

« فن بلاغت نه در ؟ » سؤالنه شو جوانی ویره بیلیر :

— بلیغ سوزلر تألیفی ایچون اساتذه طرفندن طوتیلان اصولدر .

اصول دیدیکمز شیلر لسانمك بلاغت کتابلرنده موضحاً

مندرج اولسی لازم کلن بر طاقم مسائلدن عبارتدر . ایشته بونلرک

هیئت مجموعه سنده « فن بلاغت » دینیلیر .

بواصولی اوکرغش فرض ایده جکمز هر شخصك کرک ذاتنده

کرک کلامنه بلیغ دیمك اقتضا ایتیه جکمی آ کلامق ایچون اتعابه

ذهن ایتمک لازم کلمه. نیجه آدمی اوله بیلیرکه ذکر اولنان اصولی
تمامیه اوکرنسهر، حتی باشقهلرینه اوکرتسهر نه کندیلری،
نده سوزلری بحق بلیغ اطلاقنه لایق اولماز. آنک ایچون بعض
بلغا دیرلرکه:

— انسان بلیغ اولمق ایچون بلیغ اولمق اوزره طوغق شرط
اقدمدیر.

هرملکه نك حسن تحصیلی قابلیته موقوف دکلیدر؟ قابلیتی
مساعد اولمیان بر آدم فن بلاغت دینیلن اصولی ولو احاطه
صورتیه اولسون اوکرنمکله نصل بلیغ اوله بیلسون؟ فن بلاغت
آکا تعدادی غیر قابل اولان مقتضیات احوالی برر برر تصویر
وتعریفی ایده جک؟ بر ایکی نمونه کوسترر. باقیسنی استعداد
براقیر. فرض ایده لم که مقتضیات احوالی برر برر تصویر و تعریف
ایتسون، اولیه جق اولان ینه اولماز. بر یسنه «فلان یرده شو
سوزی شو ادا ایله سویایه جکسین» دیه برسوز تعلیم ایدلسه مستعد
اولمدینی تقدیرده مطلوب وجد ایله سویایه بیلیری؟

«ایله ایه قابلیتی مساعد اولمیان بر آدم نیچون بوفنی تحصیله
قالقشسون؟» دینیلرسه شویله جواب ویریلیر:

— هیچ اولمازسه حال طبیعیسنی دکشدیرر، آنک بر قایچ
قات فوقند چیقار، فنک اصطلاحاتدن خبردار اولور، بلاغته
سویلنیلن سوزلری بر درجده قدر اولسون تقدیر ایدر، بزچوق
فوائد قازانیر.

برده شوراسنی دوشونه لم:

«بلیغ سوزلر تألیفی ایچون اساتنه طرفندن طوتیلان اصول»
دیدیکمز شیلرک قابلیتی مساعد اولمیانلره کوره خارجه تطبیقی ممکن
اوله میه جق دیمک اولور. بونکله برابر ذکر اولنان اصوله فن
بلاغت دینیلور. برده بواصوله تطبیقاً سوز سویلر بر ذات، بر
بلیغ تصور ایدلم. آنده فعلاً تجلی ایدن احوالته ندر؟ ینه
نقطه نظر دکشدی. «فلان بلاغته سوز سویلر» دیوروز. نه
دیمک ایستوروز؟ بو کیفیت متکلمده بلاغت دیدیکمز شیمیدر؟
«کلام بلیغ ایله افاده مرام ایتمک ملکه سنی حائز بولمق» دیدیکمز
کیفیت شخص بلیغده فعلاً تجلی ایدن احوالتمیدر؟ البته دکل.
ایله ایه «فن بلاغت ندر؟» سؤالنه بزده شو جوابی ویرمیلیز:
— فصاحتله مقتضای حاله مطابق اوله رق سوز سویلمک
قنیدر.

یوقاریدن بزنی سرد اولنان ملاحظات کوز اوکنده جمع
ایدیلنجه کوریلورکه بلاغت دینلدیکی وقت ذهنه درت درلوفکر
وارد اولور:

— کلامده صفت اولمق اعتبار یله بلاغت.

— متکلمده ملکه اولمق اعتبار یله بلاغت.

— اصول مخصوصه دن عبارت اولمق اعتبار یله بلاغت.

— متکلمده فعلاً تجلی ایتمک اعتبار یله بلاغت.

برنجی یه مثال:

شومنظومه ده بلاغت موجود در.

ایکنجی به مثال :

شو دات بلاغتی حائر در .

او چنجی به مثال :

بو افندیلر بلاغت او قوبورلر .

دردنجی به مثال :

او خطیبک کمال بلاغتنه حیران اولمش ایدم .

متکلمده بلاغت (ذوق) دینیلن قوه معنویه نك وجودیله حصوله کلیر . ابن خلدونك دولتلو جودت پاشا حضرتلری طرفندن ترجمه بیوریلان ذوقه دائر مقاله حکیمانه سی لسان عربی به متعلق اولمقله برابر هر لسانه تطبیق اولنه بیله جکندن بروجه آتی خلاصه درج اولور :

ذوق

(ذوق) لفظی علمای بیان بیننده متداولدر . معناسی لسانده بلاغت ملکه سنك حصولیدر . بلاغت دخی کلام عربده مرعی اولان خواص تراکیبه رعایت نتیجه سی اوله رق کلامك مقتضای حاله مطابق اولسندن عبارتدر . عربجه تکلم ایدن بر متکلم بلیغ عربك اسالیب و اصول مخاطباتی اوزره مفید اولان هیئت تحری ایدمرك کلامنی او وجه ایله ترتیب ایلر . کثرت اشتغال ایله بودرجه یه واصل اولنجه کندینه ملکه کلدرك سهولته ترتیب کلام ایدر ، عربك مسلك بلاغتندن باشقه بر طرفه صامق احتمالی قالماز . بو مسلکه اویماز بر ترکیب ایشته ادنی فکر ایله ، بلکه

ذوق

بلا فکر مجرد ملکه سی اقتضاسیله بالاستقباح آندن تبری ایلر . زیرا ملکات راسخ اولنجه طبیعت کی اولور . احوال ملکاتی بیلمین غافلر « عرب ایچون اعراب و بلاغته صوابده بولنق بر امرطبیعیدر » دیرلر . حقیقت حال ایسه او یله دکلدرك عربك تکلمی تمکن ایتمش ملکه لسانیه اولدیغندن وهله طبیعت کی کورینور . بو ملکه ممارسه و سمعده تکرر و خواص تراکیبی تقطن ایله حاصل اولور ، فن لسان اصحابك استنباط ایتمش اولدقلری قوانینی بیلمکله حصوله کلر . زیرا بو قوانین آنجق معرفت لسانی افاده ایدر . ملکه نك بالفعل محلنده حصولی مفید اولماز . الحاصل : لسانده حصوله کلن ملکه بلاغت متکلم بلیغی کلام عربده واقع تراکیبه موافق صورته حسن ترتیب کلام طریقنه ارشاد ایدر ، برحالده که کندیسسی بو یولدن عدول ایتك ایستسه ایدم من . بویله خلاف مألوف اولان طریقته ذهاب خصوصنده لسان و ملکه سی کندیسنه موافقت ایتمز . عربك طرز بلاغتنه مخالف بر کلام ایشته در حال مألوف اولدیغی کلام عربدن اولمیدیغی بیلوب آندن اعراض ایدر . مع ذلك اکثریا بوبابده قوانین نحویه و بیانییه اصحابك اصولی اوزره دلیل اقامه سندن عاجز اولور . چونکه آنلرك مسلکی بالاستقرا حاصل اولان قوانین ایله استدلالدر . بونك علمی ایسه وجه مشروح اوزره ممارسه ایله حاصل اولم بر امر وجدانیدر . صبیان عربدن کندی ایچلرنده نشأت ایله تربیه اولنمش بر صبی آنلرك

لغتنی اخذ و تعلم ایلر • اعراب و بلاغته آنلره تمامی تمامنه تقلید ایدهرک درجه غایبه واصل اولور • حال بوکه علم قانونیدن هیچ برشی بیلمز • کندیسنده بو کیفیت آنجق ملکه ایله حصوله کلمش بولنور • کذلک عربک اشعار و منشأتی حفظ ایدهرک ایچلرنده نشوونما بولمش بر آدم مرتبه سنه کلجهیه قدر بومسلکده دوام ایدن کیمسه ده دخی او ملکه حاصل اولور • اما قوانینی بیلمکله بو کیفیت حاصل ایدیه من • ایشته شو ملکه ده راسخ اولدینی حالد اصحاب فن بیانک مصطلحی اولان (ذوق) اسمی استعاره اولمشدر • ذوق فی الاصل بر نوع طعمی ادراک دیمکدر • طعم لسان ایله ادراک اولدینی کبی بوملکه دخی لسانده وجدانی بر کیفیت اولدیغندن آکا ذوق دینلشددر •

بو مقدمات معلوم اولنجه شوده مجزوم اولق لازم کلیر که مشرقده فرس ، روم و ترک ، مغربده بر بر کبی عرب لسانه دخیل و اهل لسان ایله اختلاطلرنندن طولایی اولسان ایله تکلمه مضطر اولان اعاجک بو ملکه دن نصیبیری قاصر اوله جفتندن دیدیکمز ذوق آنلرده حاصل اولماز • چونکه بونلرک محصول عملیری عمرلرینک بر مقداری مرور و لسانلرنده بر ملکه دیگر ، یعنی کندی لغتیری ملکه سی سبق ایتد کدن صکره اهل امصارک محاورا - تنده متداول اولان الفاظ و عباراته محتاج اولدقیری جهته آنلری اوکرنگ دیمکدر • حال بوکه اهل امصارده کی ملکه باشقه در • مطلوب اولان ملکه لسان دکدر • بو ملکه نک احکامنی کتابلرده

مسطور اولان قوانیندن اوکرنگ دخی برمنوال سابق تحصیل ملکه دیمک اوله ماز • بو ملکه آنجق ممارسه ایله حصوله کلیر • « سیبویه ، فارسی ، زنجشیری و بونلره مماثل اولان فحول علمای لسان عجم اولدقیری حالد آنلرده بو ملکه حاصل اولمشدر » خاطره سی وارد اولور ایسه جواباً دیرز که :

— بوقیلدن اولان فحول آنجق نسباً عجمدر • نشأت و تربیتیری عرب ایچنده واقع اولمشدر • بووجه ایله کلامک بر مرتبه سنه واصل اولمشدر که آندن اوته سی اوله ماز • آنلرمبدأ نشأتلرینه نظراً کوچک عرب چوجقیری مثابه سنده ایدیلر • لغتک کهنه واقب اوله رق اهل لغتن معدود اولدیلر • نسباً عجم ایسه لرده کلاماً عجم دکل ایدیلر • متی مبادیسنده ، لغتی شباهنده بولدیلر که آثار منکه هنوز زائل اولماش ایدی • ممارسه و مدارسه یه مواظبتله لسانک غایتنه واصل اولدیلر »

شمدیکی حالد اعاجدن بری شهرلرده اهل لسان ایله اختلاط ایتسه عربیدن مقصود اولان ملکه یی زائل اولمش بوله رق بر باشقه ملکه حصوله کلمش اولدینی کورر • فرض ایدم که ملکه مطلوبه یی تحصیل ایچون ممارسه و مدارسه ایله اشتغال ایتسون ، ینه او ملکه نک حصول بولدینی پک نادر اولور • چونکه یوقاریده دیدیکمز وجه ایله محننده دیگر بر ملکه سبق ایتش اولان ملکه حاصل اولسه بیله ناقص قالیر • نسباً عجم اولان بر شخص لسان عجم ایله اختلاطدن بتون بتون سالم اولدینی

حالده ممارسه و مدارسه ايله بو ملکه یی تحصیله سعی ایتسه آنده
بو ملکه حاصل اوله بیلیر . لکن بوده نادر اتدنیر . قوانین
بیانیه یی تعلم ایدنلردن بعضلری بو ذوقک کنديلرنده وجودینی
ادعا ایدرلر . بو ایسه غلط و یا مغالطه در . کنديلرنده حاصل
اولان آنجق قوانین بیانیه ملکه سیدر . عباره ملکه سی دکدر .

انتهای مقاله

ابن خلدونک بو مقاله ده تعریف ایتدیکی ذوقک لسانزده
حاصل ایدیله جک ذوقه تطبیق خصوصنی اصحاب مطالعه یه حواله
ایلر .

محتاج ایضاح اولمדיنی اوزره بر لسانده آکا اتسابی اولانلرک
حاصل ایده جکلری ذوق متساوی اوله ماز . متفاوت اولور .
ایشته بونک ایچوندرکه ذوقک اک عالی عد اولنان درجه سنه
(ذوق سلیم) عنوانی تخصیص ایدلمشدر . بونک مادوننده بولنه جق
ذوقلر سلامت کامله یی حائز اولمیه جقلرندن آنلر (سلیم) ايله
توصیفه شایان کورلمه مشدر . ذوقده کی سلیمک خاصه جلیله سنه
سلامت ذوق (سلامت ذوق) نامی ویریلیر . بلاغتده متعلق اولان مزیا تئک
کافه سی بو تعیرک تحتنده مندر جدر .

برده (سلامت حس) وار . اوده اساساً پک زیاده مهمدر .
حتی سلامت حس اولمدیجه سلامت ذوق تصور بيله اولنه ماز .
بالاده دیمش ایدک که :

— متکلمده بلاغت ذوق دینیلن قوه معنویه تئک وجودیله
حصوله کلیر .

شدی ده دیرزکه :

— ذوق دینیلن قوه معنویه سلامت حس دینیلن موهبه
فطریه تئک وجودیله حصوله کلیر .

ایشته یوقاریده کوستریلن :

— انسان بلیغ اولق ایچون بلیغ اولق اوزره طوغمق
شرط اقدمدر .

سوزینک مالی بودر .

سلامت ذوقده علوم لسانیه تحصیلنک برقچ درجه یه قدر
دخی اولق طبعیدر . سلامت حسده ایسه حکم (خاقت سلیمه)
تعیر اولنان ممتاز یارادیلش مظهریت علویه سنکدر .

دقت ایدلسه (طبیعت شعریه) دینیلن مزیتک دخی سلامت
حسدن تولد ایتدیکی آکلاشیلیر . حسنده سلامت اولیان
بر آدمده اومزیت بولنه میه جغندن طبیعی اوله رق موزون سوز
سویلیه میه جکی ، حتی سویلیسه ده فرقنده اوله میه جکی کبی اوزان
شعریه ده کی آهنگدن دخی طبیعت شعریه احتیابی قدر ذوقیاب
اوله ماز . آکا کوره موزون غیر موزون بردر دینیله بیلیر .
مثلا فضولینک ، ندیمک :

نا ملایم لهجه سی موزونی ناموزون ایدر

و :

ناسخنور مصرع موزونی ناموزون اوقور

مصراعلری اوقویه جق اولسه مضمونلری نك صدقنه نفسی
اشهاد ایتیش اولور .

بو بر عجب خلق قدرکه (اعوجاج طبیعت) نامیله یاد اولنور .
اعوجاج طبیعتک درکاتی واردر . آنفا تعریف ایتدی کمز درکه
الك اشاعی سیدرکه اعوجاج کلیدر . او بر حالدرکه عروض اوقومق ،
اشعار مطالعه ایتک کبی تدبیرلرله تحویلی ممکن اولماز . فن عروضک
موجدی عد اولنان امام خلیک بوفنی کندیسندن اخذ ایتک
اوزره نزدینه دوامه باشلایان واعوجاج کلی اصحابندن اولدینی
ایچون مشار الیهک جاتی صیقمقده صوک درجهیه واران برذاته
شاعرانه بر استقال اولق اوزه :

اذالم تستطع شیئاً فدعه

وجاوزه الی ما تستطیع

یتنی تقطیع ایتمنی تکلیف ایلدیکی مشهوردر .

بویله ذاتلرک عروض اوکرتک آرزوسنده بولنلری شایان
تعیب کورلمسه بجادر . انسان بر شاعر بلیغ اولمنی البته ایستر .
شوقدر وارکه عروض اوقومقله ، حتی اوقوتقله کیسه شاعر
اولما مشدر .

(مدرسه خاطرهلری) مندرجاتندن اولان (مصحح) فقره سی
در خاطر ایدیلیرسه بر اعوجاج مثالی کورلمش اولور . مصحح
دیدیکمز آدم :

کیم ایدردی آرزو محبوب اصغر وصلی [*]

عاشقه زرسزجه رام اولسیدی سیم انداملر

یتنی تدقیق ایتدیکی صیرهده مصراع اولی نصحیحاً :

کیم ایدردی آرزو محبوب اصغر وصلک سنک

شکلنه قویش ایدی .

بوندن بر ایکی سنه مقدم ضیا پاشانک :

ایستر ایسک آنکلامق جهانی

اوکرنلی اوروپا لسانی

یتنی تحریف ایله :

ییلک ایستر سهک جهانی

اوکرن اجنبی لسانی

صورتنده و دظن ایتمهکه جوابسز قالیرسین ، بزدن بویله آفرینلر
آلیرسین ، عباره سنی بیت ظنیه :

ظن ایتمهکه جوابسز قالیرسین

بزدن بویله آفرینلر آلیرسین

هیئتنده یازانلردخی کورلمش ایدی .

اعوجاج طبیعت اصحابندن بر طاقی ده واردرکه گاه صوابده ،

اده بولنورلر . مثلاً دوت یتلی بر قطعه سویلر بش

مصراعی موزون اولورسه اوچ مصراعی ناموزون دوشر .

[*] « محبوب اصغر » بر تعبیر اصطلاحدرکه آلتونه اطلاق اولنور .

بونلر توغل ایله بر درجهیه قدر تصحیح طبیعت ایده بیلیرلر .
 بوخصوصده حکم قومیت دخی نظر دفته آلملیدر . اقوام
 اسلامیة نك المشهورلرندن اولان ولسانلری اسلام ادبیاتنك
 مدار بقاسی بولسان عرب ، عجم ، ترك قوملری مله متحد
 اولدقلری حالده خلاقه بر اولدقلرندن طبیعتلرنده اوزان شعریهیه
 تمایل مسئلهسنده آز چوق اختلاف موجوددر . عربك بعض
 بحوری ، خصوصیه فروغ بخوردن اولان برچوق اوزانی
 عجمك ، تركك طبیعتنه توافقی ایتمز . حتی عیدزاکانی کبی لغات
 هزلیه جمع ایتمش اولان بر عجم لطائفردازی دیمش که :

— النا موزون = شعر عربی .

شونلرده اوزاتك تعریفاتندر :

— الشاعر = دزد سخن .

— العروض = اندازه طبع سقیم .

عیدزاکاتی ایسه شاعری شیویه تعریف ایدر :

— الشاعر = طامع خود پسند .

بونك ایچوندرکه عجمده عروض مخصوص اتخاذ ایدلشد .
 یز ایسه اکثر اوزان عجم طبیعتنره موافق کلدیکندن آریجه
 عروض اتخاذینه حاجت کورمیهرك عجم عروضنی قبول
 ایتمشدر . بونکله برابر شوراسی انودلماق کله المزده بولسان
 عجم عروضنك بر ترك عروضنی شیکنه افزائی ایچون طبیعتنره
 تمامیه توافقی ایده جک صورتده حسن تحقیقی لازمه دندر .

مقتضای قومیتك خارجته چیقیلهرق عربیه یاخود عجمه
 مخصوص اولمق لازم کلن بعض اوزان اوزره ترکیه شعر
 تنظیمی داعیهسینه دوشیلورسه . بیهوده اختیار کلفت ایدلمش
 اولور . مثلاً عربك بحر بسیطی اوزره سویلنلمش بر شعر بلیغ
 عربی ارباب ذوقه رقص آور اوله جق بر آهنگ لطیفی حائر
 یولنور . از جمله امام بوصیرینك قصیده برده سی بویله در .
 حال بوکه او بحرده ترکیه شعر سویلنیه جک اولسه لسانمزده
 او آهنگه عربی کبی استعداد اولدیغندن کلفت حس اولنور .
 لطافت ایسه کلفت ایله اجتماع ایتمز . آثار اسلاف آره سنده
 ترکیه یازلمش بر خیلی قصیده برده تخمیساری کور یورز .
 هانکیسنی لذتله اوقویه بیلور ؟ ذاتاً عربی بر شعری ترکیه ایله
 تخمین ایتمکده نه معنی واردر ؟ مقصد قصیده مباره کدن استسعاد
 ابسه آنی اوقوملی ، آ کلاملی ، ذوقنه وارملی ، از برله ملی .
 یاننه بر طاقم لزومسز ترکیه سوزلر قاتمق مذهب عشاقده
 حرمتسنزك عد اولنور . برکزه (توسل) صاحبك شو تخمیسه
 باقکزر ! :

چیقار میوب درد دلدن مسالك حرمی
 همیشه یاد ایدوب احباب یار محترمی
 عجب بوکرینه حسرت بواشك دمبدمی
 امن تذکر جیران بندی سلم
 منرجت دمعا جری من مقلة بدم

لویمشمی ؟

مع مافیه بویه اثر لرك اصحاب اقتدار طرر فندن ینه غربی ايله
تخمیس ایدلمسه برشی دینله مه مک طییعدر .

فن بلاغت اربا شدن بعضری شعرى (مرقص ، مطرب ،
مقبول ، مسموع ، متروک) نامر یله بش قسمه تقسیم ایدر لر .
مرقص انسانی رقصه کتیره جک درجه لده لطیف اولان ،
مطرب طبیعت طرب ویرن ، مقبول قبوله شایان کوریلن .
مسموع دیکله نیله بیلن ، متروک ترک ایدیلن طاقیدر .

بو تقسیمى ایدن لر مثاللر ایراد یله اقسام خمسة نك ایضا حنه
چالشمش لر ایسه ده طبایع مختلف اولدیغندن بر طبیعتك مرقص
عد ایده جکی شعرى دیگرى مثلا مسموع عد ایده بیه جکی
جهتله بوباده مثال ایرادینه پک لزوم کورله میدر . حتی
بر شعرك مطلقا بوش وصفدن بر یله توصیفنه دخی احتیاج ،
بلکه ده امکان اولمادیغی ایضا حدن مستغنی کوریلور .

اساتذده طرفندن تنظیم شعره دائر در میان ایدیلن ملاحظاتدن
بعضرینک بوراده ایرادینی فائده لی عد ایلدک :

۱ - معانی قوافی ايله يك آهنگ اولمی . قافیه خاطر ی
ایچون حسن جریان معانی یه خلل ویره جک صور افاده یه
التفات ایدلمی . دائماً الفاظ معانی یه تابع قیلنملی .

۲ - زوائد تحریرندن اجتناب ايله برابر مقصدنه ایسه
تماماً افاده اولنملی . فقط بعض کره دخی تصریح مقصددن

مرقص
مطرب
مقبول
مسموع
متروک

اصحاب ذوقك انتقال ایده جک لری بر صورتده عدول ایدلملی .
مع هذا ایجاز مغل سمتنه کیدلمه ملی .

۳ - طرز افاده ممکن اولدیغی قدر تنويع ایدلملی . یک طرز
اولان بیان اوصاندر یجی اولور . موسیقیده تنوع نعمات
حسیاتی نه قدر تهییج ایدر ! حال بوکه بردوزی یه کیدن بر آهنگ
حواسی یورار ، اوصاندریر . شعرده بویه در . اثنای تحریرده
طرز افاده نك حسن تبدیلی مهارت ایستر . ماهرانه اجرا
ایدیلیرسه پک لطیف اولور . مهارتکارانه اولمازسه آهنگی بتون
بتون بوزار . مثلاً لطائفدن عبارت کبی کورینن بر منظومه نك
ایچنده بر حقیقت کوسترمک لازم کلنجه ارانه نك موقع و طرزینی
کوزل دوشوره بیلیمک بیوجک بر معرفتدر .

۴ - ساده لك ایچنده صنعت ، صنعت ایچنده ساده لك
ارانه سنه چالشملی . صنعت اجبار طبیعت شائبه سندن وارسته
بر صورتده اجرا ایدلملی . بویولده اجرا ایدیله میه جک ایسه
صنعتسز ساده لك ترجیع اولنملی .

۵ - آهنگلی ، طمطراقلی الفاظ انتخاب ایدلملی . فقط
اول الفاظ افاده ایدیله جک معانی ايله متناسب اولملی . بعضاً کوزل
بر شعر برکله ايله چرکینلشه بیلیر . الفاظ آهنگلی ، طمطراقلی
اولوبده معانی عادى اولورسه کولنج اولمغه استعداد کوسترر .
۶ - یازمه دن دوشونملی ، دوشونمه دن یازماملی . دوشونمکسزین

یازیلان شیرک سر و بنی اولماز. نه قدر ایی دوشوتیلورسه اوقدر ایی یازیلیر .

۷ - پر کولقدن احتراز ایتلی . آز سویلملی ، کوزل سویلملی ، چوق سویلین کوزل سویلییه مز .

۸ - انسان کندی شعری حقنده بر مؤاخذ شدید اولملی که سائر مؤاخذله بکندیره بیله جک سوز سویلمکه موفق اوله بیلسون . جهل آدمه کندی آثارینی کوزل کوسترر . شعردن آکلایانلرک تحسیننه قاییلانلر آنلردن اجهل عد اولنور .

۹ - انسان کندنده حس ایتدیکی برفکری ایی یازه ماز . مثلاً بر مرثیه حسیات ذاتیه اوزرینه مؤثر اوله رق یازیله بیلیر . ایصمارلامه مزارطاشی یازمق باشقه در .

۱۰ - نمکن اولدیغی قدر طبعیلکدن آیرلاملی . هر لطافتی طبعیلکده بولملی .

مصراع — موزون بر پارچه درکه کندیسيله بحر آمتساوی

دیگر موزون بر پارچه یه مقارنتدن بر بیت تشکل ایدر .

بوکله (مصرع) صورتنده دخی قوللانیلیر .

مصراع آزاده قرینی اولمیان ، یعنی تک اولان مصراعه (مصراع آزاده) دینیلیر . بوندن اوج درت سنه مقدم تبسم حالنده چیقاردیلان بر رسمک الته یازدیغمز :

مضحکات دهره بن اواسه مده تصویرم کولر

مصراعی کبی .

قرینی ایله مناسبت مغنویه سی اولیوب هر بری باشقه برسوز عد اولنه جق صورتده واقع اولان مصراعلره دخی (آزاده) تعبیر اولنور . بودرلو آزاده مصراعلر طبیعت رکیکه اصحابی آثارنده بولنور .

مثال :

هوس زان یار وار سرده
سر کرام خمار وار سرده
خواجه نشأت

متین ولطیف اولان مصراعلر (برجسته) ایله توصیف برجسته ایدیلیر .

مثال :

اگرچه طبع ناچیزانه مده بر مصرع برجسته نظمیه بیله ذره قدر استعداد اولدیغنی بیلیرایسه مده (باقی قالان بوقبه ده بر خوش صدا ایمش) فحواسنجه اخلافه یاد کار اولمق آرزوی خالصانه سیله ...

ضیا پاشا

دیگر :

اگر مقصود اثرسه مصرع برجسته کافیدر
عجب حیرتدهیم بن سد اسکندر خصوصنده راغب پاشا

(برجسته) وصفی مصراعه مخصوص دکلدیر . عمومیت اوزره اشعار وافکار حقنده استعمال اوانه بیلیر .

مثال :

اشعاری لطیف لیک آرزوی
بر برجسته قصیده یازدی

ضیا پاشا

دیگر :

تتبع ایدر سوزی اودانا
برجسته در آمده لفظ و ما

وله

یازمقدمه اولدیغمز لغت کتابنده شویله دیمش ایدک :

— برجسته تعیری اکثریا اشعار و افکار حقنده قوللانیلیر.
مثلا (شعر برجسته ، مصراع برجسته ، فکر برجسته) دینیلیر.
انسان بعضاً کمال سهولتله بر شعر سویلرکه باشقه وقت نه قدر
چالشسه انک کبی سویله مز . کذلک بعضاً کندی کندینه ذهنه
اولیله بر فکر کلیرکه معتادک فوقنده عد اولنور . ایشته اصل
(برجسته) اودرلو شعرلره ، اودرلو فکرلره دینیلیر .

بیت

بیت — بروزنده اولان ایکی مصراعدن متشکل نظمدر.
متحدالوزن اولیان ایکی مصراعدن تشکل ایدن نظمه بیت
دینیلر مز . مثلا روح البیان صاحبی اسماعیل حقیقک :

نیته کیم شمس غزم قونیله ایدوب
ایلدی ملا جلالی ارشاد

سوزی ایکی مصراعدن متشکل ایشه ده مصراعنر مختلفالوزن.

اولدیغندن بیت عد اولنه ماز . بناءً علیه بیتک تعریفنده « ایکی
مصراعدن مرکب نظم » دیمک ناقص اولور .
بر بیتی تشکیل ایدن مصراعلرک یکدیگرله مقفی اولسی
شرط دکلدور . مثلاً :

چوققیدر اولدیه مهرکدن سویدا غرق نور
سن کلدیم بن ، نه وار اولسم سراپا غرق نور

نظمی بر بیت :

شوق رؤیتدن نصل برق جهان اولماز کلیم
سینه پر آتش ، نظر کاهنده سینا غرق نور

نظمی ده ینه بر بیتدر .

بر قصیده نکه پارلاق عد اولنان بیتته (بیت القصید) عنوانی
ویریلیر . مترجم قاموس دیرکه :

— بیت القصید مبنی علیه اولان بیتدرکه ابیات سائرمدن
ونکیکن وجودت طبعه تصادفله دلنشین اولور . نیته کیم دیمشلردر:
قصیده ده بر اولور بیت نادر المضمون .

کذلک بر غزلک پارلاق عد اولنان بیتته (بیت الغزل)
اطلاق اولنور .

(بیت الغزل) ه بدل (شاه بیت) و (شه بیت) تعیرلری دخی
قوللانیلیر .

بیت الغزل

شه بیت

کاظم پاشانک :

بر غزل طرح ایده‌یم لعل لبك وصفنده
اوله هر مصرع بر جسته‌سی شه بیت قصید

بیتته اوچ صورتله اعتراض ایدلمشدر :

اولاً (شه بیت) ایله (بیت قصید) آیری آیری ایکی
تعیر اولدینی خالده بونلری مزج ایده‌رك (شه بیت قصید) دیمك
یولسزدر. (شه بیت) دینیلنجه (قصید) ك، (بیت قصید) دینیلنجه ده
(شه) ك لزومی قالماز. مصرع :

اوله هر مصرع بر جسته‌سی بر بیت قصید

صورتنده یاز یله بیلیردی .

ثانیاً - مصرع بر جسته (شه بیت) اوله میه جنی کبی (بیت قصید) ده
اوله ماز . بیت مخصوص اولان بر عنوان مصرعه نصلی ویر یله بیلیر ؟
ثالثاً - (شه بیت) غزلده اولور ایسه ده (بیت قصید)
قیصده ده بولنور . حال بوکه « بر غزل طرح ایده‌یم » دینیلیور .

اوچنجی اعتراضه شویله جواب ویر یله بیلیر :

- شاعر ك « طرح ایده‌یم » دیدیکی غزل امام علی (کرم-
الله وجهه) وصفنده کی بر قصیده‌سی میاننده اولدیغندن بوغزلده
بولنه جق بر جسته مصراعلرینه او قصیده ده بولنه جتی جهته بولنره
(بیت قصید) دیمك ناممحل اولماش اولور .

ایکنجی اعتراضه ده شویله جواب ویر یله بیلیر :

- بر جسته بر مصرع مدحده مبالغه مقصودینه مبنی مجازاً
(شه بیت) یاخود (بیت قصید) مثابه‌سنده طوتیله بیلیر .

برنجی اعتراضه دخی (شه) اغظنك (بیت قصید) مفهومینی
تأکید اچون کتیرلش اولدینی درمیان ایدیلر ك جواب ویر یله
بیلیرسه ده دیگر ایکی جوابدن دها ضعیف دوشر .



تصریع - بیت هر ایکی مصراعنی قافیه دار قیلمقدرد . تصریع
او یولده یازیلان بیتته (مصرع) دینیلیر . اکرم بك افندیك
منظومه آیه‌سی تشکیل ایدن بیتلر هپ مصرعدر .

بویله ده شعر یاز یله بیلیر یا

هیچ بر دم سنسر اولقی ایسته مر جانم بنم ،
اولدی کویا تاب حسنك نور ایمانم بنم ،
جورك اولماز کاسر شوق فراوانم بنم ؛
راحت ایتمز محنتك کور مزسه وجدانم بنم ؛
متصل عالمده ایتسون کر به چشمانم بنم ؛
راضی یم یانسون مؤبد قلب سوزانم بنم ؛
موت طوتسون دامنم ، خسران کر بیانم بنم ؛
ترك ایدر سه‌م عشقکی ای مهر تابانم بنم !

(ائتلاف) مبحثده (دقت) مثال اوله رق ایراد ایدلش
اولان (صوك تشیه) عنوانی منظومه دخی بوقیلدندر .



فرد — مصرع اولیان تک بیتدر .

فرد

مصرع اولور ایسه (مطلع) نامی آلیر . فرد (مفرد)
دخی دینیلیر . حتی جمعی لازم کلنجه (افراد) یاخود (فردات)
دینلمیه رك (مفردات) تعیری قوللانیلیر .

مفرد

مفرد جالب نظر دقت بر مضمونی مشتمل بولتملیدر که تحریر
شایان کورلسون . یوقسه نابینک، ندیمک :

نشاط وصلت ایله یاره قارشى سینه مری
طورر طورر دوکرز طبل عیدگاه کبی

و :

بزمده سازینه مضراب اوروبینه مطرب
سمند شوقی چت ایتدی تازیانه ایله

مفردلری کبی شیلر حقیقت حالده یازمغه دگم .



مطلع — بر منظومه نك ایلک بیت مصرعیدر .

مطلع

بوتعیر قصیده ، خصوصیه غزل حقنده زیاده استعمال
اولنور .

علی الاطلاق (مطلع) دینلدیکی کبی بالاده کوستریلن معنی
آکلاشیلیر . قصیده وغزل آره لرنده تجدید کلام یوللو ایراد
اولنان مصرع بیتلره دخی (مطلع) نامی ویریلیر سده بونلر
مرتبه لرینه کوره (مطلع ثانی، مطلع ثالث) طرزنده تقید اولنور .
شو حالده منظومه نك اک باشد کی مطلعنه (مطلع اول) دینلمک
لازم کلیر .

ذات المطالع
ذوالمطالع

بردن زیاده مطلعی حاوی اولان شعره قصیده ویا منظومه
اعتباریله (ذات المطالع) ، نظم ویا شعر اعتباریله (ذوالمطالع)
تعیر اولنور .

ندیم :

حبذا ای تاج وتحتك مایه زیب و فری
عالمك آرایشى ملكك طراز و زیوری

بیتله مصدر اولان قصیده سنده طور آتی ایله تجدید مطلع
ایتمشدر :

جست وجوی معنی وصفکله عقل وفکر وفهم
کشت ایدرکن زیر و بالای سپهری سرسری
راست کلدی پیک اندیشم بوغرا مطلع
چرخ چارمدن اوتنه عرش معلادن بری
دست قهرکده رخ چرخ کهن نیلوفر
باغ اظفکده بهشت هشت برورد طری

شوده غزل ایچون بر مثال اوله بیلیر :

فضولی به پیرو اوله بیلیر میم ؟

ای تعالی ایلد کجه ایلین حیران بنی
خاک پای ایتدی سکا میل علوشان بنی
خاک پایک اوله دن آسودکی بولماز تنیم
عالم بالایه سوق ایلر بو علوی جان بنی
شعله بارم ، دوردن سیر ایلسون یاران بنی
ایتدی هجران آتشی سیار بروولقان بنی
لطفنه لایق کوروب اولدرمدی جانان بنی
شمعی هر ساعت آنکچون اولدیرر هجران بنی
غمزه سی رؤیاده اولسون ایلسون قربان بنی
تکری حقیچون او یوت بر لحظه ای افغان بنی
ویرمه ای آرام جان بیهوده زحمت تیغکه
جسمدن تجرید ایدر بر جنبش مژگان بنی
دوندی بر کرداب خرینته کوزمده کائنات
کردش چشمک خیالی قیلدی سرکردان بنی
دوستم دور وصالکده عجب خوشحال ایدم
باق نه حاله قویدی عهدندن دونوب دوران بنی

بر منظومه نك مصرع اولمیان ایلک بیتته دخی . (مطلع) دینیه .

بیلیر .

برده (حسن مطلع) تعبیری واردر که غزلده مطلعی تعقیب
ایدن بیت رنگینک عنوانیدر . شوکت فراهینک :

حسن مطلع

فلک حسن ترا از حسن یوسف کرده کلکون تر
که رنگین تر کند شاعر زمطلع حسن مطلع را
قولنجه شاعر بوییتی مطلعدن دها کوزل سویلمکه چالیشیر .

مقطع — بر منظومه نك نهایتده اولان بیتدر .

بو تعبیر اکثریا غزل حقننده قوللانیلیر .

مطلعك آلت طرفنده کی بیتته (حسن مطلع) دینلدیکی کی
مقطعك اوست طرفنده کی بیتته دخی (حسن مقطع) دینیلیر .
شاعر بونك ده حسن تنظیمنه صرف همت ایدر . مثلاً یددی
بیتلی بر غزلده بر حسن مطلع اتخاذ ایلد کدن صکره مقطعدن
باشقه الده قاله جق درت بیتك اك کوزلنه مقطعك اوزرنده یر
تعین ایتك دأب دیرین شعرادر .



قصیده — مطالعی مصرع اوله رق اون بشدن زیاده بر قافیه

قصیده

اوزره سویلنلمش بیتدن متشکل اولان نظمدر .

ابیات قصیده نك اقلی اوتوز بر ، اکثری طقسان طقوز
اولور . ایکسی اورتیه سی بر مقدار اختیار ایتك اعلادر .

(مجموعه معلم) ده ملاحظه آتیه درمیان ایدلمش ایدی :
قصیده اکثریا مدایح اکبری متضمن اولور . بعضاً اولنده
ویا آخرینه قریب تغزل ایدیلیر . ندیم (کلیر) ردیفلی قصیده سنه :

ناز و شیوه بله که آغوشه جانانه کلیر
سینه فی لبی کجوب تا حرم جانانه کلیر

دیه بر غزل ایله ابتدا ایتشدور . نفی :

شکر کیم بر بارگاه لطفه قیلم انتساب

مصراعیه باشلایان قصیده سنک آخرینه قریب :

کوز اوجیه عاشقه که لطف ایدر کاهی عتاب
برسؤاله یر قوماز اول غمزه حاضر جواب

مطالعی غزل سویامشدر . بویاکنجی صورت اکثریت اوزره
دها مطبوع دوشور .

قصیده ده مقصده انتقال ایچون مناسبت پیدا ایدن بیت
(کریز) یاخود (کریز گاه) تعمیر اولنور . ندیک مشهور قصیده
رائیه سنده کی :

کریز
کریز گاه

دید کی برایکی بیت القصید کیم اولمش
آنکه حضرت صدر کرینه خدمتکار

بیتی کی . بونی متعاقب مقصودی اولان ابراهیم پاشا وصفه
(جناب) ی یخ د (حضرت) ی زائد کورینن :

حجاب حضرت دستور آسمان مسند
که مهر دانه بر کرد بالش زرتار

بیتیه کیرشمشدر .

قصیده ده اکثریا کریزدن صکره کلوب شاعرك مخلصنی

مشمول بولنان بیت (تاج) عنوانی ویریلیر . آندن صکره دعا
کلیر . نفعینک سلطان عثمان وصفنده کی قصیده سنک آشاغیده تلج
کوستریلن صوک بیتلری کی :

باشلا شمدن صکره ای نفی دعای دولته
بردعا ایت کیم اوله حسن قبولک مظهیری
ایلیه تاخسرو صاحبقران شرق و غرب
اشهب زریا لهنک صبح ایله جولانگری
حق سر افراز ایلسون رایات دین و دولت
قنده عزم ایلرسه اولسون فتح و نصرت رهبری
ایانجه عزم میدان غزا اول قدم
پایمال اولسون بولنده دشمن دینک سری

اتهی

معروف اولدینی اوزره بزده اک پارلاق قصیده سویلین
شاعر نفعیدر . صکره دن بووادیده مشار الیه یتشمش ، حتی
یاقلاشمش بر شاعر کوراه مشدر . بر مقاله مزده دیدیکمز وجه
ایله عصر مزده نفی ایله اک زیاده اوغراشازردن بری قوت
طبعی ، کفایت دانشی کندیسنی بیلنلرک مسلمی اولان اسماعیل
پاشازاده صاحب دیوان حتی بک افندیدر . مقایسه ارلنسون :
نفی ایله آر دلرنده خیلی مسافه اولدینی کوریلور . بوراسنی
کندی ده هر زمان اعتراف ایدر . جالبوکه نفعیدن صکره کلن
ارباب انظم ایچنده اقدار شاعرانه جه حتی بکه معادل
طوتیه بیله جک پک آز آدم بوانه بیایر .

بونکله برابر شمیدلرده نفی مسدکی هان بالکلیه کوزدن
دوشمشد. نفعیانه برقصیده سویلمک، پیوده اختیار کلفت
ایلمک قیلندن عد اولیور. «نفعی موده سی کجی» دینیلیور.
صحیحاً کجی. طرز جدید ادبیات شعرك طبیعت موافق بدایع
فکریه مصوری اولوق لازم کله جکنی میدانه قویدی. بوندن
بویله نفعی مسلکنک اعاده اقبالی قابل دکلدر. شوخالده بوندن
بویله دخی نفعی کی برشاعر یتشمک احتمالی قلمدی دیمک
اولور. افکاره بودرجه لرده تحول کلدکن صکره عمرنی الی
آلتش یکنسق قصیده ایله سکنز اون غزلدن عبارت اولوق
مرتبه سنده بر مجموعه میدانه کتیرمک اوغرنده صرف ایده جک
برشاعر مفقدر بواق نصل ممکن اولور؟ بوندن بویله
یتیشه جک شاعر لر من بدایع فکریه نه کی شیلردن عبارت ایسه
آنلری بزه کویستر جک زمینلر بوله رق و فقط ادبیات غربیه دن
استفاضه نامیله:

دیوانه جه سوزلری دیمکدر ادبیات
آثار ترقی دیورز بز بوکا هیهات!

دیدیره جک معناسز لاقیر دیلر سویلمک سوداسنده بولنیه رق
ملتمزه، دولتمزه کر چکدن خدمت ایده جکلر.

نفعینک قصیده لری ایچون «یکنسق» دیورز. اوت
اوله در. هر قصیده سی تشیب، توصیف، فخریه، هجویه، دعا
ماده لرندن عبارتدر دینیه بیلیر. ذاتاً قصیده بو اسلوب اوزرم

تنظیم اولنور. شمیدیکی شاعرك عالمی بویله غایت محدود بر
دائرهدن عبارت اولوق ایستمیور. ضیا پاشانک دیدیکی کی:

محدود میدر دیار افکار

نفعی بی اودائرهدن چیقار میان شی بولندیغی زمانک حکمیدر.
یوقسه اوقوتده برشاعر میلان طبیعتنه نظراً مثلاً عثمانلی محاربات
مشهوره سی تاریخ طرزنده وپک پارلاق بر صورتده نظم ایده رک
بزه حسیات مایه ایله مشحون برظفر نامه بدایع نمون براقه
بیلیدی.

مشار الیهک قصائدنده بعض غلطات لفظیه کورلیدیکی کی بر
خیلی غرائب معنویه دخی بولنور. مثلاً دیرکه:

کر اولسه فیض حکم عدل ودادی عالمه شامل
ایدردی یچه کبک دری شهباز ایله بازی
کر اولسه همی عاجز نواز و تقویت کستر
کبو تر حره شاهین کیی صید ایلردی شهبازی

بریسی چیقوب دیه بیلیرکه:

شاعر بوسوزلرله مدح ایتک ایستدیکی ذاتی ذم ایدیور.
«کر اولسه» دیور. دیمک که اوزانک نه فیض عدالتی عالمه
شامل اولمش، نه ده همی عاجز نواز و تقویت کستر!

نفعی د بویله شیلر آزدکلدر. فقط شوراسنه دقت ایتلی که
بونلر:

اولیدی آب وتاب قبض طبعم طبع فیضیده
ایدردی فیضه مستغرق سواد ملک لاهوری

دیعه بکزه مز .

بومسلکده مشار الیه پیرو اولانلر دهها زیاده غرائب نمالقی
ایتمشدردر . مثلاً :

لاملایی پر ایدر ادخنة فحم امل
مطبخ جودی اگر آچسه سپهره باحنک

دینلمش . معناسی شو اولیور :

— مطبخ جودی سپهره باجه آجسه لاملایی امل کوموری
دومانلری طولیدرر . فقط آچیور



غزل — مطلعی مصرع اوله رق طرز مخصوصده یازیلان
تظمدر .

اقلی درت ویابش ، اکثر اون ویا اون بش بیت اولور .
غزل اساساً حسن وعشقه تعلق ایدن مضامین ایله ترین
ایدیلیرکه بووادیده یازیلان غزللر شعرک (غرامیات) تعبیر
اولانان و صرف حسیات عاشقانه تصاویرندن عبارت بولنان
قسمندن صاییلیر . بووادیده :

غزلدر صفا بخش اهل نظر
غزلدر کل بوسه تان هنر

غزال غزل صیدی آسان دکل
غزل منکری اهل عرفان دکل

غزل بیلدیرر شاعرک قدرتن
غزل آرتیرر ناظمک شهرتن

کوکل کرچه اشعاره چوق رسم وار
غزل رسمن ایت جمله دن اختیار

که هر محفلک زینتیدر غزل
خرد مندلر صنعتیدر غزل

غزل دی که مشهور دوران ازله
اوقومقده یازمقده آسان اوله

نشیده سیله اقسام شعر آره سنده غزلک درجه اهیتمی کوسترمک
ایسته مش اولان فضولی تفرد ایتمشدر . کینه یتمش از جمله شو
غزلانی اوقویه لم :

قیلیدی زلفک تک پریشان حالمی خالک سنک
برکونای بی درد صورمازسین نه درحالک سنک

کیتدی باشکدن کوکل اول سرو قدک سایه سی
آغلاکیم ادباره تبدیل اولدی اقبالک سنک

زینت ایچون جسم دیوارنده قیلازدم پرین
چکمسییدی عشق جان اوحنده تمثالک سنک

تیز چکمزسین جفا تینن بی اولدرمکه
اولدیرر برکون بی آخر بواهمالک سنک

غرق خوتاب جکر قیلش کوزم مردملرین
آرزوی خال مشکین ورخ آلاک سنک

دامگاه عشقدن طوت برکنار ای مرغ دل
صیغه‌دن سنک ملامتدن پر و بالک سنک

سایه وش چوقدن فضولی خاک پایک یاصلانیر
اول امید ایله که برکون اوله پامالک سنک

سائر غزل‌سرا شاعر لر مزك آثارى ایچنده بوتأثیرده بر
غزل بوله بیلیرمی‌ز ؟
اربابنه :

« يك بيت عاشقانه به از صد قصیده است »

دیدترن بووادیده اظهار کمال ایده بیلیمک طبیعتده شاعر لکه
عاشقلغک اجتماعنه متوقف اولدیغندن هر شاعرم دینه میسر
اولماز .

طرز افاده‌تک غایت جدی اولسی بووادینک شرائط اساسیه-
سندندر . ولو پک جزئی اولسون هزل جهتیه میل ایدلدیکی کی
غر امیاتک الیه - مزیت مغنویه‌سی اولان سوزش تباعد ایدر .
مثلا اندرونی واصفک غزلیاتنده سوزشدن همان هیچ اثر
کورلر ، چونکه هزلیات مقوله‌سندندر .

فضولی ایله ندیمک شوغلرینی مقایسه ایدم :

حیرت ای بت صورتک کوردکده لال ایلر بنی
صورت حالم کورن صورت خیال ایلر بنی
مهر صالمالزین ، نکا رحم ایلر سین بونجه کیم
سایه تک سودای زلفک پایمال ایلر بنی

ضعف طالع مانع توفیق اولور هر نیجه کیم
التفاتک آرزومند وصال ایلر بنی

بن کدا سن شاهه یار اولمق یوق اما نیلیم
آرزو سرکشته فکر محال ایلر بنی

تیر غمزدهک آتمه کیم باغرم دلر قائم دوکر
عقد زلفک آچه کیم آشفته حال ایلر بنی

دهر وقف ایتش بنی نورس جوانلر عشقنه
هریتن مهوش اسیر خط وخال ایلر بنی

ای فضولی قیلزم ترک طریق عشق کیم
بو فضیلت داخل اهل کمال ایلر بنی

§

بوس لعلک شویله سیراب زلال ایلر بنی
کیم کورن آب حیات ایچمش خیال ایلر بنی

شاعره سوز بولغه منت نه اما نیلیم
آه کیم حیرت سنی کوردکجه لال ایلر بنی

سودیکم جام میه حاجت به در لعل لبک
پر شکر خندیه مست بی مجال ایلر بنی

باغده زلف ورخک آکدکجه بوکیمدر دیو
سنبل وکل بیرى بیرندن سؤال ایلر بنی

نکته زلفکله کلدکجه نسیم نوبهار
طره سنبل صفت آشفته حال ایلر بنی

ناتوانم شویله چشمک حسرتندن کیم کهی
سایه مژگان آهو پایمال ایلر بنی

کردن کوردجه ساقی ملایم مشربك
 « آرزو سرکشته فکر محال ایلر بنی »
 حسرت چشمکله بن خاک سیاه اولسهم دخی
 بخت آخر سرمه چشم غزال ایلر بنی
 کویا بیلز اقدام بنده دیرینه سن
 کیم ندیما بومیدر دیو سوال ایلر بنی

بونظیره ندیمك الكوزل غزللرندن معدوددر . فضولی به
 بیرولك یولنده یازلدینی ایچون کندیسك سائر غزللرنده کوچ
 بولنه بیله جك برتأثیری ده خائر بولنیور احتمال که فضولینك
 غزلندن پارلاق کورینور . نه قدر پارلاق اولسه سوزش جهتیله
 آندن خیلی آشاغی قالیر . فضولی غزلنده محل سوزش اوله جق
 هیچ برشی سویلمدیکی حالده ندیم نظیره سنده تضمین بیتیه
 مقطعه سوزشی اخلاص ایتمش . فضولینك « آرزو سرکشته فکر
 محال ایلر بنی » فکری « کردن کوردجه ساقی ملایم مشربك »
 توقیه سیله تقید بر شوخلق ، تعمیر دیگرله : پرده بیرونلق
 اولیور . مقطعلک محتوی اولدینی مال ایسه ساده بر شطارت
 ندیمانه دن عبارت بولنیور . بناء علیه نظیره نك ابیات سائر سنده
 وجودی تخیل اولنان جدیت افاده به کلی خلل کلیور . تضمین
 بیتیه مقطع آره دن چیقارلسه نظیره به بر نظیره صیحه نظریله
 باقیله بیله جك .

بالاده افاده اولدینی اوزره غزل اساساً حسن وعشقه

تعلق ایدن مضامین ایله تزیین ایدمك موافق طبیعت اولدینی
 حالده اکثر شعرا بو طریقه دن عدول ایدمك غزل ایله قطعاً
 مناسبی اولماق لازم کلن سیاسیاته وارنجیه قدر هر درلو افکاری
 غزل میاننده ایراد ایلمشلر . مثلاً سکز بیتلی بر غزله باقیلیر ، ایچنده
 سکز درلو فکر کوریلور .

بویله غزللرک بیتلری غزته نسخه لرینك حاوی اولدینی
 مختلف بندلره بکزر . اوفکرلر بمضاً یکدیگره مناقض ده اولور .
 دیمك که شاعر غزلده نصریع مطلع ایله قافیه دن باشقه برشی
 کوزتمک لزوم کورمیور ، وزن وقافیه نك سوقنه تابع اوله رق
 عقلنه کلنی یاز یور . بز دخی شمدی به قدر بومسلکده برخیلی
 غزل یازدق . بونلرک ایچنده تصادفی اوله رق بیتلری بیتنده
 ارتباط معنوی اولانلرده بولنور .

مثال :

ای عشق بلای جانم اولدك
 آتشن دودمانم اولدك
 اول او جهان مستردن
 کلاک الم نهانم اولدك
 اظهار ایچون آتش درونی
 آتش فکن زبانم اولدك
 چوق کجمدی باشلادك ظهوره
 دنیا لره داستانم اولدك

بندن کورینوب جهانیا
برهان علوشانم اولدک

دیگر :

ای عشق یاقارسهك ایشته جانم
یاق دیردم اولیدی خاتمانم
ویردك خیلان دل و دماغه
صارصلدی زمین آسمانم
برعالم ذوقکه ویرردم
باری کی اولسه بیک جهانم
خضر اولسه ایدم ایدردم ایشار
راهکده حیات جاودانم
عالمده قالیر سنکله نامم
محو اولسه ده جسم ناتوانم

عصر مزده ظهور ایدن مجادلات ادبیه اکثریت اوزره
حد معروفك خارجنده کورنمش ایشه ده آرزویه موافق بعض
نتایج دخی انتاج ایلمشدر . ایشه ایاتی آره سنده ارتباط
معنوی بولنه جق صورتده غزل سویلمک هوسنک تعمم
درجه سنه کله سی اوجمله دندر .

ایکی مثال :

رنک بخش لطف اولوب فیاض قدرت کلره
لؤلؤ شبنم ایل ویرمش لطافت کلره
اول نه خوش رنک لطافتدرکه ارباب صفا
منشرح اولمده در ابتدجه دقت کلره

مظهر اولش التفات حضرت پیغمبره
منعطفدر دیده تقدیس امت کلره

کلهستانه رونق دیگر ویرر هرغنجه سی
دینسه ده شایسته در ازهار جنت کلره
افتخار ایلر وجودیله شهنشاه بهار
فیض رنگین طبیعتدر طراوت کلره

شیخ وصفی

§

سنک عشقك ای دلربا بر بلاد
او مبرم بلایه کوکل مبتلادر

بیایرسین که سندن دریغ ایلیم بن
یولنده سنک ایشه جانم فدا در

نیچون کریه می اویله تعیب ایدرسین
فصل آغلامم بن بو بر ابتلادر

یا بن آغلادجه نیچون سن کولرسین
بوخنده سنک طوغریسی نابجادر

وفاسزلق ایتکده سین بویله اما
ینه بن دیمم سودیکم بی وفادر

غریبم ملولم جفا دیده می بن
صفا کوردیکم یوقدر اسم صفا در

اسماعیل صفا

کنج شاعر اسماعیل صفا افندینک (تأسف) عنوانیله

یازمش اولدینی شو تحف غزل دخی بومبختده خاطره کله جک
آثار دندر .

غزلسرائق ایچون قلبه امل کلدی
بش اون دقیقه ده میدانه برغزل کلدی
بکتم بونی کوزدن کچیردیکم آنده
اوسوزلرک بکا معناسی مبتدل کلدی
اوت شو اوچ سنه اول یازلمش آثارم
حقیقه بکا بوندن دها کوزل کلدی
ینابرین نه قدر وارسه بنده شعره هوس
توکندی هپسی همان طبعمه کسل کلدی
صفا بوحاله نصل بن تأسف ایتیم
یازیق طبیعت شعریه مه خلال کلدی

بویله بیتلری آره سنده ارتباط معنوی بولمق اوزره یازیلان
غزللره (یك آهنگ) عنوانی ویرلمیدر . کچنلرده (رنگ)
ردیفلی برغزله دأر بیان ملاحظه ایتدیکمز صیره ده :

کوزل اما غزل رنگ یك آهنگ دکل

دیمش ایدک . (یك آواز) تعیری ایسه بشدن آشاغی به قدر بر
قوتده سویانلمش منظومه لره تخصیص ایدلایدیر . بعض منظوماتک
ابتدالرنده کی بیتلر قوتلی اولورده آلت طرفلری ضعیف
دوشمکه باشلار . ایشته اویله منظومه لر خنده « یك آواز دکل »
دینیلیر . ضیا یاشا نفی وصفنده :

يك آهنگ

يك آواز

ایتدکده قصیده یه سر آغاز
تا آخره دک اولور یك آواز

دیمش ایدی .

برغزل هیئت مجموعه سیله مقبول اولمق ایچون یك آهنگ
اولمی یاخود ابیاتنک محتوی اولدینی افکار بربرینه یك آهنگ
دینیه جک درجه لرده متقارب بولنمایدیر . مثلاً ندیمک :

ناز اولور دمبسته چشم نیم خوابکدن سنک
شرم ایدر رنگ تبسم لعل نابکدن سنک

کی نازک بر مطلع ایله موشح اولان غزلنده خطابی زاهده
چویره رک :

زاهدا معذور طوت جلدکده ثقات وار پراز
غلظتک فهم اولنور حجم کتا بکدن سنک

دیه جکی کیمک خاطرینه کلیر ؟

ینه مشار الیهک :

لعل تابک چاشنی سنج دتاب ایتز میسین
لطف ایدوب قهر ایله اولسون بر جواب ایتز میسین

مطلعنندن صکره :

قامتن سیر ایله انصاف ایت او بالا مصرعی
زاهدا سن شاعر اولسه ک انتخاب ایتز میسین

دیمسی دخی یك مناسبلی دکل ایسه ده طبیعت یوقاریکی قدر
کران کلز .

غزلک هر بیتنده باشقه برشیدن دم اورهق معرفتی بزه
 شعرای عجمدن انتقال ایتمشدر • عرب شاعرلری غزلی یک
 آهنگ دیدیکمز یولده سویلرلر. آنلرک اثرینه اقتفا ایتلی ایدک •
 برعرب شاعرینک شوغزلی (عبث) ایله باشلیور ایسه ده
 یک آهنگ اولدیغندن لذتله اوقونیور :

عبث النسیم بقده فتأودا
 وسری الحیاء بخده فتوردا
 رشأ تفرد فيه قلبی بالهوی
 لما غدا بجماله متفردا
 قاسوه بالفصن الرطیب جهالة
 تالله قد ظلم المشبه فاعتدی
 حسن الفصون اذا اکتست اوراقها
 وتراه احسن ما یکون مجردا

دیپورکه :

— سودیکمک قامت نازکی نفحات نسیمک لا ابالیانه ایاشمسنندن
 تمایل ایلدی • رحسار لطیفی سریان شرم ایله فی الحال کلکون
 اولدی • او برغزال بی مثالدرکه کوزللاکده تفرد ایدنجه کوکلم
 دخی عشقنده متفرد اولمشدر • کندیسنگ قد موزوتی جهل
 ایله نهال تازهیه تشبیه ایتدیله • بوتشیهی ایدنلر والله حدی
 تجاوزله ظلم ایلدیله ! تازه نهاللرک حسنی سبزپوش اوراق
 اولملریله قائمدر • حال بوکه سودیکم لباسدن تجرد ایتدکجه ده
 کوزل اولور •

سکا ای نور مجسم نیجه تشبیه ایدیم
 یوق ایکن وجه شبه تازه نهال چنی
 او بوارر جامه سبزین ورقله رونق
 سن ایسه احسن اولور سین چیقاروب بیرهنی

قطعه سی بوغزلک صوک بیتلرندن اقتباس ایدلمش اوله بیلیر •
 ابن کمالک اولق اوزره مشهور اولان بوقطعه یی مستطرف
 مترجمی اسعد افندی « خلی سال اول بوفقیق ابن هلال صابینک
 کرک اخذ طریقله اریسون کرک توارد قیلاندن بولنسون
 بیتین اخیرین مذکورین معناسنده برقطعه سنی کورمش اولوب
 « سکا ای روح مجرد نیجه تشبیه ایدیم — یوق ایکن وجه شبه
 تازه نهال چنی — اوبولور کسوه سبزین ورقله رونق — سن
 ایسه احسن اولور سین چیقاروب بیرهنی » نظم ساده معناسیله
 ترجمه یه جرات ایتشیدی « دهرک بنمسه مک ایستمشدر •

مردف شعر سویله مک خصوصی دخی بزه شعرای عجمدن
 انتقال ایتمشدر • بلغای عربک اشعارنده ردیف کورلمز • بونکله
 برابر مردف اولاشعربک کندینه مخصوص برلطافتی اولدیغی
 انکار ایدیله مز • مثلاً مردف برغزل بلیغک مطامعی اوقوندیغی
 وقت آنی تعقیب ایدن بیتلرده ردیفک نصل برمه ازلته تکرار
 ایدلدیکنی کورمکه طبیعت متشوق اولور • ردیف تکرار ایتدکجه
 تشوقی آردر • ردیف سز شعرده ایسه بو حالت بولماز • آنده بالکز
 قافیه ذوقی واردر • حال بوکه طبیعتیه ردیفلی شعر سویامک

ردیفش شعر سویا مکن قولای کلیر . چونکه مضامینی ردیف
جذب ایدر . طبیعت ده آنک جاذبه سنه قایلیر کیدر . بونک
ایچوندرکه اکثریا مردف اولان غزللر یك آهنگ اوله ماز .
شاعرك تعقیب ایتک ایستدیکی مضمون ردیفه یا خود ردیف
اومضمونه اویماز . بور . به ایله سویلنیلن غزل ردیف اسارتی
تحتده اوله رق اتمام ایدیلیر . میدانه بیتلری مضامین مختلفه یی
حاوی برشی چیقار . مردف اولیان غزللر ده ایسه وزندن
صوکره یالکز قافیه عائله سی بولنه جغندن تعقیب مضمونده او قدر
کوجلك چکلمز . بناءً غایه بلاغتجه متساوی اولان وبری
مردف ، دیکری غیر مردف بولسان ایکی غزلدن برنجیسی
ایکنجیسنه ترجیح اولتور .

شوراسی ده او بودلما لیدرکه بعضاً ردیف مضامین ایساتک
یکدیگره مرتبط اولسنی ایجاب ایدر ، مثلاً (کوزلرک) ردیفلی
برغزلده ایراد ایدیلرک مضامین هپ کوزلرله ناظر اولمق
طبیعی اوله جغندن او غزل یك آهنگ دینلرک صورتده وجوده
کتیریلیر . بالاده مندرج اولان (کالره) ردیفلی غزل بوقیلدندر .
اسماعیل صفا افندینک غزل آتسی ده او یولده در :

سحابلر اولیور قطره بار طالفه لره
همجوم ایدوب طور یور روزکار طالفه لره
شو بحر اعظم طوفانخروشه دقت ایدک
یاقک شو طاغله ، دهشت نثار طالفه لره

مشایه اولدی بولوتلرله طالفه لر طاغله
دیشش اراده بجا کوهسار طالفه لره
فلکله چارپیشه جقلمر صانیرده دیر انسان
نمونه غضب کردکار طالفه لره
صفا بو بویله دوام الیز کلنجه ربیع
سکونت آور اولور بی قرار طالفه لره



قطعه — مطلبی مصرع اولمدینی حالده یکقافیه اولان قطعه
نظمدر .

اقلی ایکی بیت اولور .
برقاج مثال :

نوک قلمکده در همیشه
خاک قدمکده در دمام
اعجاز کف کلیم عمران
آثار دم میج مریم

حالی

کرم مقاطعه سی تا زمان حاتمندن
قالوب مرادده بر کیمیه اولمدی طالب
کیمک نفوذ طایسی وارانی آله جق
مکر جناب اوله راغب

خاکی

قلم اولسون الی اول کاتب ید بحر یرک
که فساد رقی سورمزی شور ایلر

گاه حرف سقوطیه ایدر ناذری نار
گاه بر نقطه قصور یله کوزی کور ایلر

فضولی

دست کوتاهمزی ایتمه مش الله رسا
منبع لطفی یوقسه المزله قاپارز

بزه ویرسونمی خدا آب حیات توفیق
خضری بولسه ق ره ظلمتده کلاهن قاپارز

عزت ملا

یارب نه اکیلیردی دریای عزتکدن
پیمانه وجوده زهر اب طولسیدی

آزاده سر اولوردم آسیب درد و غمندن
یا دهره کلسیدم یا عقلم اولسیدی

ضیا پاشا

ارزان متاع فضل و هنر تا اورتبه کیم
بیک معرفت زمانه ده بر آفرینه در

ایسای دهر هر هنره آفرین ویرر
یازب بو آفرین نه توکنم خزینه در

نابی


لسقوفچه لی غالب بکک :

تجلی برق اورر یر یر سواد داغ جانیمن
جهانده طور عشقم نور آقازهر کاستانیمن

مطلعیله باشلایان نشیده مشهوره سینه کنیدی طرفندن :

نوله باغ جهانده اولسه مهر و ماهدن مشهور
بوقطعه م تازه بر کلدرد کستان پیانمن

یتیله قطعه اطلاق اولنمی (قطعه) نک معنای لغوی سینه کوره
اولمق لازم کلیر . چونکه یوقاریده ایما اولندیغی اوزره قطعه ده
مطلع مصرع اولمق شرطدر . اصطلاحه مراجعت ایدلدیکی
صورتده ذکر اولنان نشیده به (نظم) دینلمک اقتضا ایدر .
(نظم) ایله (قطعه) بیننده شوقدر فرق وارددر : مطلع نظمده
مصرع ، قطعه ده غیر مصرع اولور .



رباعی — بحر هزجک اخرم و اخرب [۰] اولان وزنندن
ماخوذ بروزن مخصوص اوزره سویلنیلن ایکی بیتدن عبارت
نظمدر .

ر باعینک برنجی ، ایکنجی مصراعلر یله دردنجی مصراعنده
قافیه بولنور . اوچنجی مصراعده قافیه بولمق شرط اولمدیغدن
او مصرع اکثریا قافیه دن آزاده قالیر . اوچنجی مصراعی دخی

[۰] عروضیون اصطلاحنده (خرم) (مفاعیلن) رکتنک معنی اسقاط
ایتمکدر . بو حالده (فاعیلن) قالیر . آنک یرینه (مفعولن) اقامه اولنور .
(خرم) دخی (مفاعیلن) ک میی ایله نوننی اسقاط ایتمکدر . بو حالده (فاعیلن)
قالیر . آنک یرینه ده (مفعول) اقامه اولنور .

رباعی مصرع قافیه دار اولان رباعی به (رباعی مصرع) نامی تخصیص ایداشد در که بیت ثانسی مصرع اولان رباعی دیمکدر.

رباعی وزنا یکر می درت درلو اولور . بونوعلر (اخرم) و (اخر ب) عنوانلریله ایکی به منقسمدر . بوقسملر اون ایکیشر نوعی شامل اولدیغندن مطلقا رباعینک نوعی یکر می درده بالغ اولمقده در .

قسمیندن برینک جزء اولی (مفعولن) اولور . بوکا (اخرم) نامی ویریلیر . دیگرینک جزء اولی (مفعول) بولسور . بوکا (اخر ب) تسمیه اولسور . اسهل والطف اولان قسم ثانینک آهنگنه متابعت ده ازیاده موافق طبیعت اولدیغندن اغلب رباعیات اخر ب واقع اولور .

(مدرسه خاطره لری) مندرجاتندن اولان (شعرده رباعی) بندنده رباعینک ذکر اولنان یکر می درت نوعی ایچون برر مثال کوسترلش ایدی . بوراده مختلف بعض امثله ایرادیلر اکتفا ایده جکزر .

عشاقه دکل قید علایق لایق
هرکز غم روزکاری چکمز عاشق
قید غم روزکار بر علتدر
اول علتد عشقدر طیب حاذق

فضولی

ارباب کمال پیشوایی نیلر
شهراهی بولان رهنمایی نیلر

اسباب یقین دلیلر محتاج اولماز
سکان حرم قبله نمایی نیلر [°]

سید وهبی

دادن هوس عارض آلك چیقماز
مانند سویدا غم خالك چیقماز
چشمندن اگرچه نقش عالم چیقدی
بروجه ایله تصویر جلك چیقماز

فصیح دده

سینه مده یانار نار تجلادر بو
تکریم اولنان آدم معتادر بو
فتحنده فلاطون خرد عاجزدر
دل نامنه بر نکته غرادر بو

اسرار دده

رباعی (ترانه) و (دو بیت) ناملریله دخی یاد اولتور .

ترانه و دو بیت

ساحر میسین ای ترانه پرداز شهر
برنغمه ایله بیک کوکل ایتدک تسخیر

تهییج طبیعت ایتدی آهنگ نوک
یکدن سکا بر ترانه ایتدم تحریر

رباعیسنده ایکنجی (ترانه) رباعی معناسنده قوللا تلمشدر .

[*] سید وهبی بومضمونی :

مستغنی ارشاد اولور ارباب حقیقت.

سکان حرم نیلر ایش قبله نمایی.

صورتیله ده افاده ایتمشدر .

ندیمک :

حالتی اوچ رباعیده اوچار عنقا کبی

دیمسندن دخی آکلاشدینی وجه ایله عثمانلیلرک اک چوق واک
کوزل رباعی سئویلین شاعری عزمی زاده حالتی اولمق لازم
کلیر . مشارالیهک بر مجموعه مخصوصه تشکیل ایتدیکی ترجمه
حالنده محرر بولنان رباعیاتندن پک آزی رسیده نظر استفاده من
اولمشدر .

عجمده اک بیوک رباعی ناظمی :

قومی متفکرند درمذهب و دین
جمعی متعیرند در شک و یقین
ناگاه منادی بر آید ز کین
کای بی خبران رانه آنست و نه این

دیمش اولان عمر بن الحیامدر . عربده ایسه اک لطیف ، اک عاشقانه
ترانه لر حضرت ر بن الفارضدن ایشیدلمشدر . شو رباعی
مشارالیهکدر :

روحي لك يا زائر في الليل فدا
يامونس وحشتی اذا لیل هدی
ان کان فراقنا مع الصبح بدا
لا اسفر بعد ذاك صبح ایدا

(تجاهل عارف) مبحثک نهایتنده ایما اولندینی اوزره بز
رباعیده بیت اولک دخی غیر مصرع اولسنی تجویز ایدرز .

مثنوی — هریتی باشلی باشنه مقفی اولان نظمدر . مثنوی

نظمک بودرلوسی کزیاذه حکایات قیابندن آلان نازده
یاقیشیق آلیر .
مثال :

آفتاب قریش اولنجه عیان
ظلمات اوزره اولدی نور فشان

نور وجهی اولنجه پر نو بار
سینه لر اواندی مطلع الانوار

مست شیر افکن ایلدی عربی
کوثر نطق جانفزای نبی

قیلیدی الله او قوم فیروزی
شرف اندوز وحدت آموزی

آز زمان ایچره ایلدی رهبین
اندلس خلقی او نور مبین

نور علم اول دیاره عکس ایتدی
ظلمت جهل محو اولوب کیتدی

دیگر :

جمعی سیرایت کیدیور صانکه جهاده [*]
دین غیرتی سوق ایتش آنی قمع بلاده


[۰] وقتیه اورو پادن قدس شرفه طوغری حرکت ایدن اهل صلیب

هنکامه سی .

طوفان جنون دینسه بو طغیانه سزادز
هم قهقهه ز طوغریسی هم کریه نزادر

آلدقلری هر ناحیه بر مسطحه دوندی
قالدقلری هر بلده ده ییک عاقله سوندی

اول طائفه به پیشرو اولمشدی دواهی
دنیا بی خراب ایتدی زهی جند آلهی



مربع — هر بندی در در مصراعدن مرکب اولان
نظمدر .

برنجی بنده در درنجی مصراعک دیگر اوج مصراع ایله
همقافیه اولسی شرط دکدر . در درنجی مصراع تکرر ایدرسه
آکا مربع (متکرر) نامی ویریلیر .
مثال :

خاصلم برق حوادندن ملامت داغیدر
مسندم کوی ملامتده فنا طوپراغیدر

زار کوکلم تنده زندان بلا طوتساغیدر [۰]
رحم قیل دواتلو سلطانم مروت جاغیدر

§

دور جورندن تن وجامده راحت قالدی
صورت حامده آثار فراغت قالدی

[۰] (طوتساق) اسیر دیمکدر .

محنت و غم چکمه من بعد طاقت قالدی
رحم قیل دواتلو سلطانم مروت جاغیدر

§

کور فضولینک رخ زردنده اشک آلی
پرده ادبار طومش صورت اقبالی

دردهندکدر عنایتلر ایدوب صور حالنی
رحم قیل دواتلو سلطانم مروت جاغیدر

فضولی

بر مربعی تشکیل ایدن بتدلرک در درنجی مصراعلری تکرر
ایتمیوبده قافیه جه یکدیگره توافق ایدرسه آکا (مربع مزدوج)
تسمیه اولنور . (وفا ایله صفا بیتنده مشاعره) سر لوحه سیله
یازیلان منظومه آتیه مربع مزدوجک ایکیشر ایکیشر توافق
ایدن قسمندندر .

و — المده ساغر ایسترم
یا تمده دلیر ایسترم
ترانه پرور ایسترم
یرمده کلشن اوللی


ص — خماری وار ، می ایسترم
اوزون کیدرنی ایسترم
خلاصه : برشی ایسترم
فقط کوکل شن اوللی

و — جهانی طوتدی دود غم
کورنمیرر حدود غم
آلای آلای عنود غم
نصل مظفر اوللی

ص — هجوم ایدنجه غم سکا
بنم کبی کورین آکا
طوررمی قارشى باق بکا
ار اولملى ار اولملى

و — زمانه خلقى بی وفا
نه در بوچکدیکم جفا
جهانده کورمدم صفا
اوباشقه عالم اولملى

ص — سن آلت جفا ایکن
جفادن اشتکا نه دن
وفالى آدم ایستین
وفالى آدم اولملى



مخمس — هر بندی بشر مصراعدن مرکب اولان
نظمدر .

مخمس متکرر
بشنجی مصراع تکرر ایدر سه آکا (مخمس متکرر) نامی
ویزیلیر . مربعدده اولدینی کبی مخمسک دخی برنجی بندنده بشنجی
مصراعک دیگر درث مصراع ایله همقافیه اولمسی شرط دکلدرد .
بر مخمسى تشکیل ایدن بندلرک بشنجی مصراعلری تکرر ایتیموبده
مخمس مزدوج قافیه جه یکدیگره توافق ایدر سه آکا (مخمس مزدوج) تسمیه
اولنور .

مثال :

خوش کلدک ایا خدیو اکرم
لطفکله کوکلر اولدی خرم
شاد اولدی مکارمکله عالم
هر کونه مأثرک دمادم
آرایش عرصه جهاندر
رایکله ایدر زمینی تسخیر
کردون کهن دینکری پیر
کیم سنده کی پاک رای وتدییر
چرخک الله کشیده شمشر
بازوسنه آهنین کاندرد
باب کرمک جهانه مأوا
نخر اتمده خدمتکله دنیا
ای صدر کرین عالم آرا
تشریفک ایله بوصدر والا
مغبوط فراز آسماندر

ندیم

مخمسک بندلرنده تکرر ویاخود قافیه جه یکدیگره توافق ایدن
شی مطلقا مصراع اولمق لازم کیز ، بعضاً بیتده اوله بیلیر .

مثال :

سایه دیگر کوزتم مستظل یار ایکن
سایه خواه اولسونمی قکرم بویله بر تو بار ایکن
سایه طوبایی آکم نو نهالم وار ایکن
وار ایسه بندن جدا دوشسون رجالت سایه سی
الویرر بر شاعره بر نو نهالك سایه سی

کرچه مهر دور فیض اولقله بولدم اشتهار
پاینه دوشنك مراقدر هر آقشام سایه وار
بنده مستقنی طبیعت، نو نهالم سایه دار
وار ایسه بدن جدا دوشسون رجالك سایه می
الویرر یرشاعره بر نو نهالك سایه سی



مسدس — هر بندی آلتیشر مصراعدن مرکب اولان

مسدس

نظمدر .

مسدسده درت مصراعدن صکره بر بیت ایراد اولنور .

مسدس متکرر بو بیت تکرر ایدرسه آکا (مسدس متکرر) نامی ویر یلیر . تکرر
ایتمیوبده دیگر اوچنجی بیتلره قافیه جه توافقی ایدرسه آکا

مسدس مزدوج (مسدس مزدوج) تسمیه اولنور .

واصفك :


کیم اولور زور ایله مقصودینه رهایب ظفر
کلیر البته ظهوره نه ایسه حکم قدر
حقه تفویض امور ایت نه الم چک نه کدر
قیم سوزم عارف ایسه کوش قبوله کوهر
محنتی کننینه ذوق اتمه در عالمده هنر
غم و شادی غلک یویله کلیر بویله کیدر

بندینی محتوی اولان مسدس متکرر ، فضولینک :

دون سایه صالیدی باشمه بر سرو سر بلند
کیم قدی دلر با ایدی رفتاری دلپسند
گفتاره کلدی نا که آچوب لعل نوشخند
بر پسته کوردم آنده دوکر ریزه ریزه قند
صوردم مکر بودرج دهندر دیدم دیدی
یوق یوق دوی درد نهانکدرر سنک

بندینی مشتمل بولنان مسدس دخی مزدوج قییلنددر .

مربع و خمسه اولدینی کی مسدسک دخی برنجی بندنده
اوچنجی بیتک دیگر درت مصراع ایله همقافیه اولسی شرط
دکادر .



مسمط — بیتلری اکثریت اوزره قافیه لی درت جزءدن مسمط

متشکل اولان نظمدر .

مثال :

کوکلم لیال فرقتک	بیدار یارب خوانیدر
فکر ایتدیکم بر آفتک	دیدار نور افشانیدر
عکس ایتدی بیک واحسرتا	طاغیرله چیقدم آشنا
هر طاغده کی قلبی صدا	افغانمک افغانیدر
بیهوده دوشمش یاره دل	دلبرده سنک خاره دل
چوقدن بری بی چاره دل	نالنده هجرانیدر
اولمده در دامنشان	فیض حقیقتدن جهان
ابر یز فریاد اولیان	یارب کیمک و بدانیدر

ای فارسانک سروری اول سنده بنگدن بری
 زیرا جهانک هریری بر امتحان میدانیدر
 نفعینک مشهور قصیده رباعیه سی سراپا بویولده در . مسقط
 کوزل یازیلیرسه پک دلنشین اولور .

(مربع) مبحثده مندرج اولان (وفا ایله صفا بیتنده
 مشاعره) منظومه سی شوصورتده یازیلیرسه مسقط نوعندن
 عد اولنور .

المده ساغر ایسترم یانمده دلبر ایسترم
 ترانه پرور ایسترم یرمده کلشن اولملی

ترجیع بند — مختلف القوافی برقچ قسمدن مرکب اوله رق
 هر قسمنک نهایتنده یالکز بریت تکرار ایدیلن نظمدر .

ترکیب بند قسملرک نهایتلرنده باشقه جه برر بیت ایراد اولنورسه آکا
 (ترکیب بند) دینیلیر . مثال اوله رق ضیا پاشانک اک کوزل واک
 مشهور اثرلرندن اولان ترجیع بند ایله ترکیب بندی اخطار
 ایدزر .

ترجیع خانه ترجیع بندک هر قسمنه (ترجیع خانه) ، ترکیب بندک هر
 ترکیب خانه قسمنده (ترکیب خانه) تبیر اولنور . کرک ترجیع بندک کرک
 واسطه ترکیب بندک اقسامی آرملرنده بولسان بیتلره (واسطه) یاخود
 بند (بند) نامی ویریلیر . بر قسمه واسطه سیله برابر (بند) دینلیرکی ده
 وارد .

ضیاپاشایه کنجهیه قدر روحی بغدادینک مشهور اولان
 ترکیب بندینه شعرا طرفندن یازیلان نظیره لردن هیچ بری
 آنده کی لطافته حقیله اشتراک ایدمه مش اولدینی حالدده پاشا
 نظیره کویانک جمله سنه تقدم اتمک کی عالم ادبیاتجه حقیقه ییوک
 صایله حق بر موفقیته مظهر اولمشدر . حتی روحییه خطاباً :

میدان سخنده یوق ایکن سن کی برار
 برشاعر روم اولدی سکا شمدی برابر

دیمسی فخریه سویلمک دکل ، تواضع کوسترمک قیلندن عد
 اولنسه لایقدر . ترجیع بندی ایسه اشتمال حکم جهتیه البته
 ترکیب بندینه فائقدر . کمال بکک :

ترجیع ایله فکری قیلدک اعلا
 ترکیب ایله شعری ایتدک احیا

اعترافی حقیقه موافقدر .
 ترجیع بند سویلمک ترکیب بند سویلمکدن کوجدر .
 چونکه ترجیع بنده سرد ایدیله جک افکار دائماً بر نقطه
 اوزرینه کیدر . یوز یکریمی بیت سویلیوبده هراون بیتده کمال
 مناسبتله برکده :

سبحان من تحیر فی صنعه العقول
 سبحان من بقدرته یحجز الفحول

دیمکده کی اشکالی شاعر اولانلر تقدیر ایدرلر . ترکیب بنده

ایسه افکارینه مناسبت دائره سنده اولمله برابر نقاط مختلفه یه توجه ایده جکندن تنظیمنده اودرجه صعوبت چکلمز .



تربیع

تربیع — اولدن سويلنلمش بر منظومه نك هر بيتنی مطالعه هرايکی مصراعيله ، ديگر لرندن يالکمز ايکنجی مصراعيله همقافیه اولمق اوزره ايکی مصرع ضم ايده رك درت مصرعه ابلاغ ايامکده در .

مثال :

آلدم آتش بر زمان بر آتشین رخساره دن
فرق اولتم شمدی بر آتشفشان سیاره دن
« ویردم آتش دلره سوزدل آواره دن
« ایلدم ایجاد بيک یانغین بر آتشیاره دن

§

بیم هجرک وپردی دهشت طبع غمپرور دمه
ایله کل انصاف باق بر کره روی زردمه
« چاره سازم کیمه کیم روز قراقک دردمه
« قطع امید ایتدیکم کوندر حصول چاره دن

§

وارسون اولسون شیوه ایران طباع ناسده
باشقه در فکرم دکدر طبعم اول مقیاسده
« کرچه مهلک بر تاتر وار دل حساسده
اشتکایتمز عجم طرزنده سینهم یاره دن

§

چشم بی فریاد چشمانکله پر آب اولمه ده
جسم لاغر تاب هجراسکله بی تاب اولمه ده
« طفل نوسودای دل کیتد کجه بی خوب اولمه ده
« کرچه درقید اولدیغم یرقالمیور کهواره دن

§

دقت ورقت ایدر اربابی محنت سرشت
راحت ایتک ایسین دل اولسون رقت سرشت
« سالب آرامدر ناجی دل رقت سرشت
« مالک اولسم کاشکی بر قلبه سنک خاره دن

ایکی مصرعه کذلک ایکی مصرع ضمندن اوچ یاخود درت
مصرع ضمی — ضمیمه نك اصلدن زیاده اولسی اصل ایله
متساوی بولنسنندن دهاطیبی کورنمنسه مبنی — انسب اولدیغندن
تربیع اک زیاده غزله یا قشیدنی حالده (تخمیس) ویا (تسدیس)
قدر لطافتلی اولمق استعدادینی حائر بولنه ماز .

تربیعده اک زیاده دقت اولنه جق جهت ضمیمه نك معنی
اصله کمال ارتباطیله برابر لفظاً دخی آنکله هم آهنگ اولمسیدر .
اکثریا اولدینی وجه ایله اصل باشقه بر شاعرک اثری ایسه تربیع
سراپا بر طبیعتک محصولی کی کورنملیدر . بویله اولیوبده
ضمیمه اصله نسبتله آشانی بولنورسه یامه کی کورینه رك
اصحاب ذوقی مجبور تبسم ایدر . بوملاحظه (تخمیس) ایله
(تسدیس) ه دخی شاملدر .

(تربیع) ایله (مربع) بیننده کی فرق تعریفلرینه مراجعیه
آکلاشیلیر. هر تربیعدن بر مربع وجوده کلیرسه ده آکا
اصطلاحاً مربع دینیه من. تربیعک میدان کتیردیکی مربعینه
تربیع تعیر اولنور.



تخمیس — اولدن سویانلمش بر منظومه نك هر بیتنی
مطلعه هر ایکی مصراعیه، دیگر لرنده یالکز برنجی مصراعیه
همقافیه اولق اوزره اوج مصرع ضم ایدیلرک بش مصرعه
ابلاغ ایلمکدر.

تخمیس اکثریا غزلده اجرا اولنور.
مثال:

شو بر غریب کی وقت احتضارنده
که پاره پاره کفن دوش اقتقارنده
آنن حسرت ایدر قبرینک کنارنده
«نه در اوتوچه شوویرانه نك جوارنده»
«طوقندی خاطر مه حال انکسارنده»

§

نه ذوق الت یاران نه شرق انس کتاب
شرابدر بکا امداد ایدن شراب شراب
دوشوب برهنه سر آرده غبار و تراب
«دکل غریب بولنسه مدام مست خراب»
«مسافر و طنک بر خرابه زارنده»

§

نه درد درکه ایدر بویله زار زار بنی
نه بختدرکه ایدر بویله بی قرار بنی
ایدن نه در بیه م بویله بی مدار بنی
«هواده یا پراغه دوندردی روزکار بنی»
«خزانه منتظم عمرمک بهارنده»

§

زیانه چیقدی بتون انتفاع ملک وجود
یتر بکا یتر اولدی صداع ملک وجود
وطنده اولسه چکلمز نزاع ملک وجود
«ایدرسه دل یری وارد روداع ملک وجود»
«غریبه یر بولنورمش عدم دیارنده»


§

رجای باده ایله دستبوس خمارم
شرابسز طوره مم نشئه دن ده یزارم
شو بزم کهنه ده بر سودسز کنه کارم
«قرار یاب اوله مم کرچه مست سرشارم»
«حسد اورنده که آسوده در مزارنده»

§

روای (اکرم) اونو تمق او مهر غناجی
رواده اولسه نه ممکن کرکلدن اخراجی
خیاله بارقه لر صالیدی شوق منهاجی
«کوکل اونوسفرنور طلعتک (ناجی)»
«یانار قیامته دک نار انتظارنده»

(نخمس) ایله (نخمس) بیتنده کی فرق تعریفلرینه مراجعتله
آکلاشیلیر. هر تخمیسدن برنخمس وجوده کلیرسه ده آکا
اصطلاحاً نخمس دینیه مز. تخمیسک میدانه کتیردیکی نخمسینه
تخمیس تعیر اولنور.



تسدیس

تسدیس — اولدن سویلنلمش بر منظومه نك هر بیتنی
مطلعهده هرایکی مصراعیه، دیگر لرنده یالکز برنجی مصراعیه
همقافیه اولق اوزره درت مصرع ضم ایده رک آلتی مصرعه
ابلاغ ایلمکدر.

تسدیس اکثریا مطالع منتخبه ده اجرا اولندیغدن شویله ده
تعریف اولنه بیلیر: اولدن سویلنلمش بر مطالعی برنجی بندده آنک
هرایکی مصراعیه همقافیه اولق و دیگر بندلرده یالکز مصارع
ملحقه بر بریله مقفی بولنق اوزره درت مصرع ضم ایده رک
آلتی مصرعه ابلاغ ایلمکدر.
مثال:

هجراندن شکایت

یقلوب قصر فلك خاك ایله یکسان اولسه
مهر وماهی عدمک قمرینه غلطان اولسه
حالمک عنصر واجزاسی پریشان اولسه
غرق طوفان قضا القمه نیران اولسه

«دار دنیا دلی کوکلم کبی ویران اولسه»
«نه جهان اولسه نه جان اولسه نه هجران اولسه»

§

هجره دوشدم ینه چشمانه طارا اولدی جهان
یاقه ده آتش سیال کبی جسمی جان
نه یمان درد ایش الله بودرد هجران
اوله شایدکه خلاصه بو بلادن امکان
«دار دنیا دلی کوکلم کبی ویران اولسه»
«نه جهان اولسه نه جان اولسه نه هجران اولسه»

§

آهنه سوزشنه باقدک ای ماه جال
ایلدک (اکرمی) هجرکه پریشان احوال
ایده رک یأس ایله قور تلغه بیک چاره خیال
کلیور خاطره بی چاره لکمدن بو مال
«دار دنیا دل کوکلم کبی ویران اولسه»
«نه جهان اولسه نه جان اولسه نه هجران اولسه»

(تسدیس) ایله (مسدس) بیتنده کی فرق تعریفلرینه مراجعتله
آکلاشیلیر. هر تسدیسدن برمسدس وجوده کلیرسه ده آکا
اصطلاحاً مسدس دینیه مز. تسدیسک میدانه کتیردیکی مسدسه
ینه تسدیس تعیر اولنور.



[*] بو مطلع یحیی بککدر.

تهزیل

تهزیل — جدی بر اثری هزل صورتنه قویق ، تعبیر دیگرله : هزل صورتنده تنظیر ایتمکدر .

تهزیل — که اکثریا نظمده اجرا اولنور . دائرة ادبدن چیقلمامق شرطیه لطائف ادبیه دن معدود اولور . بویولده اسلاف ایچنده کثرتیه مشهور اولاناردن بری :

بیایا نکمی کن زمن بخواه مرکب
چیقار بودمده دیبکدن عجب سیاه مرکب

دیمش اولان (مرکبچی هوایی) درکه بعض تهزیلاتی اصللریله برلکده بروجیه آتی ایراد اولنور .

دردسردن نیجه آزاد اولور اول طائفه کیم
باده نوش ایلیه جک یرده کلاب ایسترلر

سن همان دلدکی نقش هوسی محو ایله
سندن ای خواجه نه دفتر نه کتاب ایسترلر

نابی

صانچیدن قیشده نیجه قورتیلور اول طائفه کیم
چوربا نوش ایلیه جک یرده خوشاب ایسترلر

سن همان قیشده چارقسز قومه شاگردلری
سندن ای اوستانه قالجین نه چوراب ایسترلر

هوایی

دلی نه نائل ذوق وصال یارایده بیلدک
نه قائل الم کنج انتظار ایده بیلدک

رجای وصل ایله اول شاهه عرض حاللر ایتدک
نه یرحلی دیدردک نه درکنار ایده بیلدک

نابی

دلی نه مائل وادی کسب وکار ایده بیلدک
نه سائل در نایسته کبار ایده بیلدک
بیوک صاریق ایله شاگردمن بوبابه کتیردک
نه بر افندی دیدردک نه کیسه دار ایده بیلدک

هوایی

کردون ویریدی چهره مهر ومهه کساد
حفظ غبار خاطرمه بر بر ایستسم

نابی

شاگردلر سیلر سوپورر خردواتی هپ
دکانده بوریا بوله مم مندر ایستسم

هوایی

طاغتنک خواب ناز یاری ای فریاد نیلرسین
ایدوب فتنه یله دنیایی خراب آباد نیلرسین

بهایی

طاغتنک آریه و بغدادیمی ای باد نیلرسین
ایدوب خرم نکهم یکسر خراب آباد نیلرسین

هوایی

طربزونی حافظ زهدی افندی مشهور :

بر ملکسیایی کوزلر کوزلرم

نقراتلی شرقی بی :

اولم اوچ بیک بش بیک آلتون طالبی
چونکه یوقدر بویله امیدک دیی
شمکیلک اولسه بکا کافی کی
بریشی بریده کوزلر کوزلرم

یوللو تهزیل ایتیش ایدی .



توصیف

توصیف — بریشی کوز اوکنه کتیره رک تجسم ایتدیره جک
صورتده اوشیئک حاله مناسب برطاقم تعیرات ایله تعریف
ایتمکدر .

بویولده تعریفی مشتمل اولان اثرده توصیف دینیلیر .

مثال :

سلطان سلیم قامتی طولی مائل ، کیکلری قالین ، اوموزلرینک آره سی
غایت واسع ، وجودینک نصف اعلاسی نصف اسفلندن قیصه ، باشی بیوک ،
قاشلری چاتیق ، یوزی مدور و قرمز ، بیکلری چهره سنه برغریب
هیئت و یرر حالدی بیوک ، ارسلان کی اغزی ایری ، چکه کیکی واسع
وقوی بردهشتلی قهرمان ایدی . هله جبهه سنک انتظام ونورانیته کوز-
لرینک کاه بر فکر حکیمانه کی منظوریئک کوکلنده اولان اک پنهان گوشه-
لره دخول ایدر یولده وکاه بر زبان کویاکی نظرلره افشای مرام ایدر
صورتده باقشلی استعدادینک فوق العاده لکنه برر واضح برهان ایدی .
سیرتد ايسه قدرتک نادراً تریننده بذل کمال ایتدیکی خوارق عاداتدن

معدود برذات اوله رق علوهمت ، متانت عزم ، کبر نفس ، اتساع تصور ،
حدت ذکا ، عمق نظر ، سرعت انتقال ، اصابت ظن ، جلادت فطریه ،
مهارت حربیه ، میل انقلاب ، تحقیر عادات ، نفوذ امر ، القای دهشت ،
شدت شکیمه ، غلبه مشکلات ، نفرت لذائذ ، استحقاق حیات کی هر بری
بر قهرمانه سرمایه اقتضار اوله جق برچوق مزیات جلیله نی جامع اولمقله
برابر فطرتنده شهوت وراحتی انهماک اولماق جهتیله خالی زمانلرینی
صحت علما ومذاکره علوم ایله امرار ایتیش ایدی

کمال

توصیفانده تفصیلات زائده دن احتراز ایله برابر لزومی قدر
ایضاحات اعطاسنه اعتنا ایدلملیدر . توصیف بر صورتده اولملی که
مقضای حاله نظراً آنده نه زیاده ، نه ده نقصان کورملی .
برطاقم زواندی مشتمل توصیفات فنا یازلمش رومانلرده پک
چوق بولنور . (بو آلو) نک دیدیکی کی برکاشانه توصیفنده
قرق صحیفه یازی اوقونماز .

توصیفانده لزومنه کوره طمطراقلی ، پارلاق الفاظ و عبارات
قوللانق ممدوح اولمقله برابر اغراقات ایرانیه نی تنظیر ایدرجه سنه
کیفیته طبعیلکدن چیقارمق مقدوح اولور . هنر توصیفه
طبعیلک ایچنده برشعشعه و یرمکدر . بر پنجره جامنی کونشدن
دها ضیادار کوسترمکه قالقشقم عیدر . نابینک :

آیا صوفیه خود او اعجوبه دهر
قبه سی ثامن اجرام سپهر

یتنده کی قبه ایله نفینک :

نه در او قصر معلی کنار دریاده
که عکس قبه سی اولش نظیره کردون

بیتده کی قبه عکسنه باقه جق اولسه ق نه لطافت کوره بیلیرز؟ اسکی آثار ادبیه مز ایچنده فنا توصیف ایچون مثال نه قدر چوق ایسه ای توصیف ایچون مثال او درجه آذر . بونک سبی قدمای ادبانک ایشی طبعیلکدن چیقارمنی بر بیوک معرفت عد ایتش اولار یدر . مثلاً بر طاع توصیف اولنه جق ، آنلرک مذاقنه کوره « چون فراز کوهه یتدی بر سرا فراز کوردی که سایه دامنی سر آسمانه سایبان وزبانه تیغی خنجر مریخ ایله همزبان » یا خود « ناکاه بر کوهه ایردی که علو مرتبه ده شرفه سی کنکره افلا که همسر وغایت عظمندن کره زمین زیر دامننده بر توده احقر » [*] کبی بر طاقم یاوه لر سو یلنملی . بویله شیاردن آرتق نفرت ایدلدی . واقعا مبالغه سز ادبیات اوله ماز ، حتی ادبیات ایچون مبالغه بر لازم غیر مفار قدر اما بویله لرینی سلامتدن بهره دار اولان هیچ بر طبیعت قبول ایتمز . بونکله برابر مثلاً عزت ملانک بر متطبب حقنده کی :

او ثقلله چوکدی کلوب مندره
مریضی یلیردی همان قان تره
کوروب آتی علت فرار ایلدی
صاووشدی دیو افتخار ایلدی

[*] بو عباردر (همایوننامه) دندر .

توصیفی مبالغه لی اولدینی ایچون رد اولنه ماز . اک کوزل توصیفاتدن اولمق اوزره کمال بکک کلیبولی یه عائد اولان (توصیف غروب) نی اخطار ایدرز . (ده لیل) دن مقتبس اولان شو پارچه یی دخی اسلوب ساده ایله یازلمش بر توصیف اولمق اوزره عرض ایلرز :

آغاز پرواز

باقکز شو یاورو قوشجغزی طیرانه آلدردمغه آناسی ، باباسی نه قدر جدی بر غیرت شفقت پرورانه ایله پالیشیورلر !
وقت آقشام ، طبیعت سکون حالده ، هوا لطیف و خوشبو ،
اورته لق یشیلک .

طائر تورسیده لطافت ایچنده بولنان اطرافه باقه باقه کندنده بر شوق پرواز حس ایده رک مینی مینی قانادرینی آچوب او زمانه قدر محبس تربیه سی اولمش اولان یووه دن بر کره هوالاتیر ، چیقار . جوارده بولنان بر آغاجک ایجه دالی اوزرینه قونهرق دال ایله برابر صاللامغه باشلار .

اوچه بیله جکنده تردد اوزره بولنور .

بر آره لق تتره مکده اولان قانادجق لیل بر تجربته طیران اجراسنه دها جسارت ایده جکی آکلاشیلیر . ینه طورر . ینه اوچه یلتنیر .
بو یلتنش لر اثناسنده تلاش ایچنده بولنان والدینی نو هوس یاورو .
جق لر ینک اطرافنده اوتیشه اوتیشه اوچیته رق حس احترازینی تعدیل ایله کندیسنه جرأت جدیده ویرمه سعی ایدرلر . بوکره دخی کمال احتراز ایله پرواز ایدر . براز کیدر ، اوچه بیلمکده اولدینی کورنجه آرتق اجنحه نورسته سنه کرکی کبی اعتماد ایده رک ، انبساط ویره رک بول آلمغه باشلار .

هوا بو بار لطیفی قوجاغنده بر آز کوتوردکن صکره اوراده کی
چنستان اوزرینه خفیجه براقیورر . پدر و مادر کمال افتخار ایله نغمه
مسرلرینی تکرار ایدرلر .

نوطیریان یا وروجق بودفعه ده جسورانه بر طور ایله قالدقهرق
پروازه آغاز ایلر . ینه دوشر . ینه قالقار .

بو یله دوشه قالته عاقبت قانادرینه جدا کووه نه بیله جک برحاله کله رک
بی پروا پرواز ایدر کیدر .

ایشته او زمان والدینیه کندی بیننده تعاطی اولنان دلقرب آوازه لر
اجرای وداع خدمتی ایفا ایلش اولور .



اعنات

اعنات — سجع و یا قافیه ده بونلرک صحته دخی اولمیان
برحرفی التزام ایتکدر .

مثلا (کال) و (مثال) کله لرندن یاپیلان سجع و یا قافیه
صحت اوزره بولنور . فقط (کال) ه (هال) ترفیق ایدیلیرسه
(م) حرفی التزام ایدلش اولور . بو صنعت لفظیه (التزام)
و (لزوم مالا یلزم) عنوانلریله دخی یاد اولنور .

مثال :

« داخل حکومتیه خود بخود دخوله فرد آفریده جسارت ایده مزایکن
نصل کله بیلدیکز و مؤاخذه و جزادن نه وجه ایله قورتیله بیلیرسکز؟ » یوللو
خطاب و عتاب (۱) و یوزندن لمعان ایدن شعله مسروریتی ستر و اخفاده
بیچ و تاب (۲) ایلدکده ...
کامل پاشا

دیگر :

نستور و فلو ققت تحطئه نیتنه خیمه سنه کله رک ندامت علنیه سنی
کوردکلرنده معامله مؤاخذه یی لسان تسلیمه تبدیل (۱) و بآس وقتورینی
تعدیل (۲) ایلدیلر ایسه ده ... کذا

دیگر :

دنیا ده شرف انسانیت فیض معرفتدن عبارتدر ، یوقسه نصاب علمه
مالک (۱) و یا تحصیلنه سالک (۲) اولمیان عوامک هوامدن هیچ فرقی
اوله ماز . کال

دیگر :

بر واقعه در بو قلبه عائد
اولماز صانیرم بیانی زائد
مضمون حزینی اشتکادر
تأثیری مهیج بکادر
معذور طوتار بلا شناسان
یازامازدم اولیدی کتمی آسان
زائد کورن اهل دل دکدر
انسان قیلغنده آب و کدر
کیم دیردی کوکل کلیر بو حاله
امکان ویریور قضا محاله
واسعدی خیالک مسیری
اولماز ایدی بر یرک اسیری
هر عالمه التحاق ایدردی
اکلنجه سی چوقدی دردی یوقدی

ایواه دکشدی شمدی حالت
ایلر بو اسارته دلات
الله بیلیرکه بر زماندر
وردن کیجه کوندوز الامندر
بر آه کسلدی جسم مجروح
شایسته دینسه آه ذی زوج

ایاس بک

بویولده اولان سجع وقافیهلره (سجع مقید) و (قافیه مقیده) دینیلیر .

سجع مقید
قافیه مقیده

اغناط طبع وسمعه غایت خوش کلیر برکلفتدر . سوزک
جریان طبعیسنه خلل ویره رک معنائک لفظه تابع اولسنی اتاج
ایده بیله چکندن التزامنده احتیاطه رعایت ایدملیدر . افاده طبعیملک
دائرة سننده چقه جق اولدقدن صکره اغنائک نه اهمیتی قالیر ؟
اغنائسز اوله رق سویلنلمش بر شعر طبعی اغناط ایله یازلمش
بر نظم غیر طبعیدن البته بیک قات اغلادر .



طرد و عکس — بر مصراع ایکی سطرندن بری تقدیم
ویا تأخیر ایدیلنجه مصراع دیگر حاصل اوله جق صورتده
سویلیوب بونلردن بریت تشکیل اتمکدر .

جناب حق ذاتنه نظر آ بیلیمک ، صفاتنه نظر آ بیلیمه مک
امکانده اولمدیقنی ناطق اولان :

ممکن دکل خدایی بیلیمکده بیلیمه مکده [*]

مصراعنک بر شطری « ممکن دکل خدایی » ، دیگر شطری
« بیلیمکده بیلیمه مکده » اولوب شطر ثانیتمک تقدیمی ویا شطر
اولک تأخیری حالنده :

بیلیمکده بیلیمه مکده ممکن دکل خدایی

مصراعی ظهوره کله رک :

ممکن دکل خدایی بیلیمکده بیلیمه مکده
بیلیمکده بیلیمه مکده ممکن دکل خدایی

صورتنده بریت تشکیل ایتیش اولور . بیت آتی دخی طرد و عکسی
مشمولدر :

هنکام جوانیدر تحصیل هنر وقتی
تحصیل هنر وقتی هنکام جوانیدر

[*] بومصراع قائلی مجهولز اولان :

On né peut le comprendre, on ne peut l'ignorer

مصراعندن مقتبسدر .

حافظ شیرازینک بواسلو بده اولان :

ذوق چنان ندارد بی دوست زندگانی
بی دوست زندگانی ذوق چنان ندارد

بیکی ضرب مثل حکمنده در .

بالاده کی ایساتده کوردیکی وجه ایله طرد و عکس ایکی
شطردن برینک منتظماً تقدیم و یا تأخیری صورتیه میدانه
کتیریلیرسه آکا ساده جه (طرد و عکس) دینلیدیکی کی (طرد
و عکس تام) دخی دینیلیر . اما ضیا پاشانک :


طرد و عکس
تام

کله درگاهکه اکرام کوررلر کرما
کرما درگاهکه کله کررلر اکرام

بیتمده اولدینی کی تقدیم و تأخیر غیر منتظم بر صورتده اجرا
ایدیلیرسه آکا (طرد و عکس ناقص) نامی ویریلیر .

طرد و عکس
ناقص

برنوع تکرار دیمک اولان طرد و عکس مقبول طبع سلیم
اوله بیلیمک ایچون آنی وجوده کتیره جک مصراعک حقیقه
برجسته اولسی لازم کلیر .



رجوع — برنکتهیه مبنی کلام سابق نقض ایتمکدر .

رجوع اکثریا افاده ایدلمکده اولان فکره قوت و یا شدت
ویرمک مقصدیله اختیار اولنور . حسن اجرایه مقارن اولمق
شرطیله برصنعت مقبوله صاییلیر . عاکف پاشا قصیده مشهو-
ره سنده :

چشم امان ایله باقدیجه وجود عدمه
صحن جنت کورینور آدمه صیرای عدم

دیدکدن صکره بروجه آتی اجرای رجوع ایله مقصدی اولان
مدح عدمی تقویه ایتمشدر .

غلط ایتدم نه روا جنته تشبیه ایتمک
باشقه در نعمت آسایش مأوای عدم

طوته لم آنده ده اولمش نعم کونا کون
اویله محتاج تناولیدر آلائی عدم

نفعی دخی شیخ الاسلام محمدافندی وصفنده کی قصیده سنده

نامکی نظم بلندمله چیقاردم فلکه
ایده تا خازن اسرار قضا نقش ختام

خطابی تعقیب ایدن :

کیدهرک عرشه چیقارمق ده اولور، عرشه دکل
ایدرم غایت امکانه وارنجه اقدام

بیتند کوستردیکی رجوع ایله افاده ایتمکه اولدینی فکره شدت ویرمشدر .

ندیمک برسا-لیخانه حقنده کی توصیفندن اولان وزمانزک
ترویج ایلدیکی اصول نظمه نظراً برایکی مسامحه بی حاوی
بولنان شویتلری دخی رجوع مثاللرندندر :

حبذا کلزار بر فیض تماشای غریب
کیم بهشت هشت آنک برکوشه تنهاسیدر

آ کا تنها کوشه تعبیر ایتک ای کلک بیم
حق بوکیم غایت خطانک ذروه اعلا سیدر

هیچ تنها یر قالیری اول جلالنخانه ده
کیم جناب آصفک منزله و مأواسیدر


بیت آتی ده اویله در :

ارباب تشاعر چو غالب شاعر آزالدی
یوق اویله دکل شاعرک آنجق آدی قالدی

مخاورانده جریان ایدن «قباحت سنده . سنده دکل سنی
تشویق ایدنده» کی سوزلر هب رجوعه راجعدر .

رجوعک بر عبارتده بردن زیاده اولسی دیمک اولان تکرری
اکثریا حلاوتسز دوشر . هله اهمیتسر عد اولنه جق شیلرده
«مقبر مقبر دکل بر تر به، تر به دکل بر عبید ، عبید دکل بر کره»

کره دکل بر فضای بی انتها اولمی ایدی «عبارت مشهوره سی کی
کولنج اولغه لیاقت کوسترر .



حذف — سوزی نقطه سز حرفلردن متشکل کلمات ایله حذف
سویلمکدر .

اووجه ایله سویلنیلان سوزه (محذوف) اطلاق اولنور .
حذف کلفت محضه اولدیغندن منفور طبع سلیم اولور .
نقطه لی نقطه سز کافه حروف ایله دخی کوزل سوز سویلمکدن
عاجز اولان متشاعرلرک بر آره لق حذفیات وادیلرنده کریوه کیر
مهملات اولملرینه کولنور . ضیا پاشا کی مقتدر برشاعرک
(خرابات) ده مندرج اولان ایکی قصیده محذوفه سنده انتخابه
شایان اوچ بیت بولنه میور . بولرده بوله بیلدیکمز اولدجقه
طبیعی سویلنلمش بیت شودر :

عالم سحر حلام که اولور عصر مده
عالم سحرده هر ساحره آرام حرام

مثلاً :

کلسه حال هر مده ده روا آ کا کلال
حصر اولور مدحکه محصول حواسم مادام

در کله حاسد اولور لر سه محلد هر کس
کاوله ده مایه کوه مدحک الهام

کبی سوزلری نیچون سویلملی ؟

اسلاف ادبا بواسطه بدخ دخی ید طولی کو ستر مشار در .
مقامات صاحبی حریرینک (مقامه سمرقندیه) ده « الحمد لله
الممدوح الاسماء المحمود الآلاء الواسع العطاء المدعو لحسم اللاؤاء »
مقدمه سیله ایراد ایلدیکی خطبه آثار محذوفه نیک مشهور لر ننددر .
فیضی هندینک بر نسخه سی حمیدیه کتب خانه سنده موجود اولان
(سواطع الالهام) نامنده کی تفسیر شریفیه بر نسخه سی اوراده
محفوظ بولنان (موارد الکلم) عنوانی رساله سی دخی سراپا
نقطه سزدر . بر مکتوب مزده بو بایده ملاحظه آتیه بی در میان ایتش
ایدک :

— فیضی هندینک (سواطع الالهام) ی کبی (موارد
الکلم) ی ده معجز عد اولنه بیلیر ، فقط بونلرله اوغراشیله جق
زمان دکلدر . بن آندن (مترجم) ه درج اولنان پارچه لری نمونه
اولق اوزره یازمش ایدم . کویا ک قولایلرینی انتخاب ایتدیکم
حاله قاموسه باقه باقه یورلمش ایدم . بزم بضاعه من آنی حل
وترجه یه کافی دکل . او قوجه آدم لزوم کورمش ، اظهار
اعجاز ایتش . بز حیرتله تماشا ایدیورز ، فقط آنکله اشتغاله

لزوم کورمیورز ، چونکه دهام مهم مشاغلمز وار . مثلاً انسان
(سواطع الالهام) ه بدل (مفاتیح الغیب) البسه پک جوق
زیاده استفاده ایدر . فیضی مثلاً (نصاری) دیه جک یرده (رهط
روح الله) دیور . بوکافت نه ایچون ؟ نقطه تویماق ایچون !
بزیازیمزه نقطه تورز ، فقط اوچ کله ایله افاده اولنه جق معنایی
برکله ایله افاده ایدرز . دهام مناسب دگلی ؟ »

برمه قاله مزده دخی ینه بومبجده بیان ایتدیکم افکاره
شوقره ایله نهایت ویرمش ایدک .

— شونی ده علاوه ایدیم که حیران کالی اولدیغمز فیضی
اگر عصر مزده بولنوب ده کوندن کونه ترقی ایتدیکده اولان علوم
وفنون حاضره ایله اشتغال ایتسیدی یازده جفی شیر البته الده
برلنان آثار جاییله سندن زیاده استفاده مزی موجب اولوردی .
بلکه اوزمان بویله نقطه سز کتابلر یازمه وقت بیله بوله مازدی «
بوملاحظاتی ایراددن مقصدمز کنجلمزی حذف کبی
اضاعه اوقاتدن باشقه برشیئه یارامیه جق اولان شیرله اشتغالدن
تخذیردر . حذفه دائر بوقدر جق معلومات استحصالی آنره کفایت
ایدر .

(حذف) ه (تجرید) نامنی ویرنلر بوضعتی مشتمل اولان
آثاره (مجرد) دیرلر .



خیفاء

خیفاء — هر کله سی نقطه لی دیگر کله سی نقطه سز اوله رق سويلنیلن سوزدر .

(حذف) کبی مصنعات مردوده دن اولان خیفا ایچون بدیعیات فارسیده ده :

تیفت مدام زینت اسلام و پشت ملک
تخت مغد و بخت مدد جیش کامکار

کبی بعض امثله رکیکه ایراد اولنور . مقامات صاحبی حریرینک (مقامه مراغیه) ده « الکرم ثبت الله جیش سعودک یزین ولؤوم غرض الدهر جفن حسودک یشین » جمله لریله باشلایان مقاله سی خیفانک انبایغ عد اولنان مثالرندندر .

ترجه مثال بوله مدق . بولمنی آرزوده ایتیمورز ،



رقطاء


رقطاء — هر کله سنک بر حرفی نقطه لی ، دیگر حرفی نقطه سز اوله رق سويلنیلن سوزدر .

(حذف) و (خیفا) کبی مصنعات مردوده دن اولان رقطا ایچون بدیعیات فارسیده ده :

چون من از هجر بری رخ صنم توبه شکن
بسی آشوب کند بلبل خوش طبع جن

کبی بعض امثله رکیکه ایراد اولنور . مقامات صاحبی حریرینک (مقامه رقطا) ده « اخلاق سیدنا تحب و یعقوته یلب » جمله لریله باشلایان مقاله سی رقعانک اک بلیغ عد اولنان مثالرندندر .

ترجه مثال بوله مدق . بولمنی آرزوده ایتیمورز .



منقوط — کله لرینک کافه حروفی نقطه لی اوله رق سويلنیلن منقوط سوزدر .

(حذف) ایله (خیفا) و (رقطا) کبی مصنعات مردوده دن اولان منقوط ایچون بدیعیات فارسیده ده :

زلفزی زیب تختی زین جیشی
تزیی جز بخت زینت تخت

کبی بعض امثله رکیکه ایراد اولنور . عربی و ترکی مثال بوله مدق . بولمنی آرزوده ایتیمورز .




مقطع

مقطع — صرف حروف منفصله ایله سویلنیلن سوزدر .
(حذف) و (خیف) ایله (رقطا) و (منقوط) کی مصنوعات
مردوده دن اولان مقطع ایچون بدیعیات فارسیه ده :

زدر د وداغ دوری زرد وزارم
زروی ورای او آزر م دارم

کی بعض امثله ریکه ایراد اولنور .

سربی وترکی مثال بوله مدق . بولنی آرزوده ایتیمورز .



موصل

موصل — صرف حروف متصله ایله سویلنیلن سوزدر .
(حذف) و (خیف) و (ورقطا) ایله (منقوط) و (مقطع) کی
مصنوعات مردوده دن اولان موصل بعض بدیعیات فارسیه ده
حرفلرک ایکیشر ایکیشر ، اوچر اوچر ، دردر دردر و بتمامها
متصل اولارینه کوره درت قعم اعتبار اولنورق برنجی ، ایکنجی ،
اوچنجی قسملر ایچون برنجی بیتنک معناسنی پکده آکلایه .
مدیغمز شو رباعی مثال اولق اوزره کوسترلمشدرکه مصراع
اولی (مطع) قیلندندر :

ای دردل آزرده از رخ آذر
مائی بر هرگز خط تو چون چاکر
غیر شکن جعد کشت کاک قضا
مشکل بکشد بشکل چنبر عنبر

دردنجی قسم ایچون دخی مثال (مدرسه خاطره لری)
مندرجاتندن وشاعر مشهور سلمان ساوجینک آثارندن
اولان :

سستپشتپشتپشتپشت
بتپشتپشتپشتپشتپشت

بتپدرکه شویله اوقونور :

سست پیش پیش تب تن بست
بتپش پشت تن سست شکست

اوراده بوجه آتی بیان ملاحظه ایتش ایدک :

— بوجه ایله مصراعلری سراسر بتیشیک یازیلورق
چو جقلرک قوه ذکاسنی امتحان ایچون درمیان اولنور ترکیه
ایکی بیت مشهور وار ایهده آثار بعض حروف منفصله یی دخی
حای اولدقلری حالده قاعده املایه بتون بتون مغایر اولورق
موردت متصله ده یازدقلری جهتله بالاده کی بیته مقیس اوله ماز .

اکا قیاس اولنه جق بیت وزن دیکرده بولنقله برابر اولسه
اولسه شویله اوله بیلیر :

لیبیمشه ملکیمم
فلکجنتم سینم جنتم

انسان نه مقلد شیدر ! بوییتی معاصرین ارباب قلمدن سر-
لوحه یابدیغم بیته برکتابده بنمله برابر تصادف ایدن برذات
یارم ساعتیه قریب زمان صرفیله سویلمشدر . بویله حروف
متصله دن کلام منشور ترکیبده بیله کوجک اولدینی حالد کلام
موزون ، خصوصیه برمطلع خوشمضمون انشاسی دهامشکل
اولق طبیعی بولندینی جهته مقلد افندی به بر آفرین اولسون
ویرملیدر . بیت شویله اوقونور :

لیبیم شه ملک بی محتم
فلک جنتم سینم جنتم

معجم

معجم — هیچ بری مکرر اولماق اوزره عربی ویا فارسی
حروف هجانک کافه سنی حاوی اوله رق ایراد اولنان جمله در .
مصنعات مردوده نك اك بر باد لرندن بری ده بودر . بونك

ایچون مثال اوله رق بدیعیات فارسیده — معهود دالی ذال
اوقومق قاعده سنه استناداً (ندهد) ك دالی ذال اعتبار ایدمك
اوزره — شوبیت ایراد اولنور :

اثر وصف غم عشق خطت
ندهد حظ کسی جز بضلال

عربی و ترکی مثال بوله مدق . بولمقی آرزوده ایتیموروز .
جناب حق بویله شیدرله اوغراشان شاعر لره شعور احسان
بیورسون .

~~~~~

مستزاد — بحر هزج اوزانندن اولان « معقول مفاعیل  
مفاعیل فعولن » یا خود « مفعول مفاعیل مفاعیل » وزننده  
بولنان مصراعلره « مفعول فعولن » ویا « مفعول مفاعیل » جزء لرینه  
مساوی برپارچه ضم ایتك صورتیه میدانه کتیریلن نظمدر ،

اوپارچه لره ( زیاده ) نامی ویریلیر .

ر ی ا د م

مثال :



## لاله نك كونه عريض ايتديكى برنياز [\*]

ای کوب رخشان که بنم جسم و جام  
اولسون بکا آرایش باقی بو کالم  
سندن آلیور فیض  
ناقص قالیور فیض

منع ایله امان ! ایتمه دن اوراقی بی رنگ  
اولسون (ژولی) [\*\*] نك جبهه پاکی بکا اورنك  
غدار زمانی  
سوسون بی جای

ایلرسه اویوزدن بی رنگین و ضیادار  
آرتق اولورم بی شرف و شان ایله هر بار  
طالع اوله رقی یار  
شاهنشاه ازهار

( ذات النطاقین — یاخود — ابن الزبیر ) منظومه سندن  
ذات النطاقین لساندن اوغلنه خطاباً ایراد اولنان شو پارچه لر  
دخی مستزاد مثال لرندور :

سرد ایلدیکم سوزلری اس الحركات ایت  
زنهار عدول ایله ، صبر ایله ، ثبات ایت  
اوغلم ، بولن آگاه  
اجرین ویرر الله

## §

شاهانه یورر سین ، یوری ای مفخر مردان  
برشان ده بوصورتله قازان واریکن امکان  
مردایستدی میدان  
عاشق سکا بیک شان

[\*] (قورنه ی) دن مقتبس .

[\*\*] شاعرك معشوقه سی .

مستزاد طبع و سمعه خوش کلیر ، فقط زیاده سی فضله  
اولماق شرطیله .

عزت ملانك :

بلبل ؛ یتیشپر باغرمی خون ایتدی فغانك  
خنجر کبی دلدی یورکم تیغ زبانه  
ضبط ایله دهانك  
تأثیر لسانك  
و :

آه ایتسه نوله بلبل دل مشهدم اوزره  
چوق چکدی غم خارینی کلزار جهانك  
تاعشر اولنجیه  
بو باغ فنانك

یتلرنده کی ( تأثیر لسانك ) و ( بوباغ فنانك ) ضمیمه لری خشو  
گورینور .

الحاصل : مستزاد سویلیه جك شاعر اصحاب دقته «زیاده سی  
زیاده» دیدر مه مکّه چالشمیلیدر .

بعض بدیعیاتده مستزاد اوچ قسم اولمق اوزره کوستریلیور-  
سه ده عثمانلی شاعر لری آره سنده مشهور اولان بالاده تعریف  
اولنان صورت اولدیغندن آنکله اکتفا ایدلدی .



اعاده

اعاده — بیت متقدمك آخرنده واقع اولان کله بی بیت متأخرک اولنده تکرار ایتمکدر .

معاد

بواسلوب اوزره سویلینلین شعره (معاد) عنوانی ویریلیر . معادک مطلبی واریسه مطلعنده دخا کثریا اعاده اجرا اولنور . تکرار ایدیه جک کله به ادات لاحق اولمش بولندیفی صورتده ادات ایله برابر تکراری مستحسن ایسه ده اداتک ترکی دخا جائز اولور .

اعاده برصورت ماهرانده اجرا اولتماز ایسه مناسبتسز تکرار لر کبی طبیعتیه ملال کتیرر . بومبجشنده بوله بیلدیکمزاک کوزل مثال فضولینک شوغلیدر :

ای وجود کاملک اسرار حکمت مصدری  
مصدری ذاتک اولان اشیا صفاتک مظهری  
مظهری هر حکمتک سنسین که کلک قدرتک  
صفحه افلا که نقش ایتمش خطوط اختری  
اختری مـعود اولان اولدر که طبع پاککنک  
قابل فیض اوله نطقکدن صفای جوهری  
جوهری معیوب اولان ناقص بنم کیم متصل  
ساده در خطک خیالندن ضمیرم دفتری  
دقتر اعمالک خطی خطاندندر سیاه  
قان دوکر چشم خیال ایتدکجه هول محشری  
محشری اشکم ویرر سیلابه کر روز جزا  
اولسه مقبول درگاهک سرشکم کرهری

کوهریدر عشق بحرینک فضولی آب چشم  
لیک برکوهر که لطف حق آکادر مشتری

(ردالعجز علی الصدر) مبحثندن مستبان اوله جنی اوزره آنکله (اعاده) بیتنده فرق واردر .

سهل ممتنع — سویلنلمسی قولای کورندیکی حالده پک سهل ممتنع کوچ اولان سوزدر .

سهل ممتنعک الکیوک زینتی کلفتسز لکدر . غایت طبیعی وروان اولدیغندن آنی ایشیدن « بنده بویه سوزسویله بیلیرم » دیر . ایشته اوزمان آکاینه سهل ممتنع قیلندن اولان :

« ظن ایتکه شویله بویله برسوز »  
« کل سن دخی سویله بویله برسوز »

خطاب امتحانسی وارد اولور . چالیشیر چالیشیر ، کافقلی برسوز سویئر . بوصورتله سهل ممتنعک ضدینی میدانه کتیرمش اولور .

سهل ممتنعه منجذب اولمیه جق طبیعت یوقدر ، فقط آنی وحوده کتیره جک طبیعت آز بولنور .



عثمانی شاعر لری آره سنده سهل ممتنع سویلیه بیله جک  
قابلیتده بولنا نلردن بری مشهور نابیدر . از جمله شوبیتلری او  
قیلدن عد اولمقده در :

§ اولدی سرمایة حیرت بکا یم و امید  
بیله مم ایلیه جک کریه میدر خنده میدر

§ شهرتی مال ایله در معبد اسلامک ده  
جامع کهنه بی وقفه جماعت کلز

§ یوسف کی انواع محن چکمه موقوف  
آسان دکل اخوانه ولی النعم اولق

§ اولیای نعمک عادت درینه سیدر  
کندی اوضاعنی اتباعنه اسناد ایتک

§ یوق بی عرض معامله اهل زمانه ده  
کیمه عبادت ایتز ایدی جنت اوله سه

سهل ممتنع نظمه تخصیص ایدله ملیدر . نژده ده ایلاری  
بولنور .

عجمده شیخ سعدینک اکثر آثاری سهل ممتنع اولق  
اوزره تلقی ایدیلیور . حقیقت ! بر عثمانی بیله قوتلیجه فارسی  
تحصیل ایدنجه « برکستان ده بن یازسه می ؟ » کی واهمه لره دوشه

بیایر . حال بوکه اوکستان شمیدی به قدر بلغای ایران طرفندن  
دخی تنظیر ایدیلده مشدر .



ارصاد — مسجع و یامققی اولان کلامده — صورت ارصاد  
تسجیع و تقفیه سامعک معلومی اولدیغنه کوره — نهایت کلامک  
نهدن عبارت بولندیغنه لفظاً و یامعنی دلالت ایدیه جک برشی  
ایراد ایلمکدر .

لفظاً دلالتیه مثال :

نیجه بر خدمت مخلوق ایله مخدول اوله لم  
سائل حق اوله لم نائل مسئول اوله لم

آقه لم یاینه بر بحر حیت بوله لم  
صله همتنه ماکی موصول اوله لم

بژده صورت ویره لم کند مزه قابل ایسه  
کیره لم اهل صفا بزمنه مقبول اوله لم

کتیر ای ساقی یترا یلدک اشغال بزی  
بر زمان ده می بی غش ایله مشغول اوله لم



قاله دن خاک مذلتده همان ای عاصم  
عازم سوی ستماسای ستانبول اولهلم

مترجم قاموس

بوغزلك محصول عینتاب اولدیغنی اشراب ایتمکده اولان  
مقطعتدن ماعدا بیتلری مثلله تطبیق اولنه بیلیر :

بونو اولدن ایشتمه مش اولدیغنی حالده :

نیجه بر خدمت محذوق ایله محذول اولهلم

مصراعنی طوبیجه قافیهنک نه دن عبارت بولندیغنی آ کلایان  
برسامع ( سائل ) دن ( مسئول ) ه : ( صله ) دن ( موصول ) ه ،  
( قابل ) دن ( مقبول ) ه ، ( اشغال ) دن ( مشغول ) ه انتقال ایده بیلیر

سنبلزاده وهینک برفکر سخیفی حاوی اولان :

قابلیت اثرین محو ایدم قابل ایسه  
بزدخی جاهل مقبل کبی مقبول اولهلم

بیتیه بر مضمون خفیفی مشتمل بولنان :

طفل نازم یوری کیت مکتبه تنها یولده  
حرف آنار بلکه سکا برایکی بدلهجه حریف

خی بوقییلنددر .

بودرلو ارسادات — میحثنده ایضاح اولنه جغنی وجه ایله  
— لزوم طبیعی کورنمدکجه اجرایی محسناتدن عد اولنمیان  
( اشتقاق ) صنعتنی سونلرک آثارنده کثرت اوزره بولنور .

معنی دلالته مثال :

هانکی لاله چن ملاحظدرکه عاقبت زبول بولمدی وهانکی آفتاب فلک  
صباحترکه نهایت افول بولمدی ؟ . . . نیجه هلال درخشان اولورکه بدر  
اوله دن خسوف بولور و نیجه آفتاب تابان اولورکه اقدن ظاهر اوله دن  
کسوف بولور .

دیگر :

المن قیسه قیاس اتمه دل محزونک  
یوق ایدی عقلی نه دردی وار ایدی مجنونک

مثال اولده ( زبول ) و ( خسوف ) سجعلری معلومی اولان  
برسامع « هانکی آفتاب فلک صباحترکه » و « نیجه آفتاب تابان  
اولورکه » دینیلیر دینلمز بونلرک آلت طرفلری ( افول ) و ( کسوف )  
اوله جغنی آ کلار .

مثال ثانیده دخی ( محزونک ) قافیهنک معلومیتی اوزرینه  
« یوق ایدی عقلی نه دردی وار ایدی » دینلمسیله برابر بونی  
( مجنونک ) قافیهنی تعیب ایده جکی آ کلاشیلیر .



فضولینک (کوردیکک کوکم) ردیفی غزلنده کی :

دیار هجرده سیل ستمدن اولدی خراب  
فضائی عشقه آباد کوردیکک کوکم

بیتی دخی بوقییلندرکه (خراب) ک دلا تیله قافیه نک (آباد) اوله جنی  
ذهنه تبادر ایدر .

تسہیم

(تسہیم) نامیلہ دخی یاد اولنان ارساد ذهن سامعی معنای  
آتینک فہمنہ آمادہ قیلہ جنی، حتی بعض کرہ معنای آتی بی ذهن  
سامعہ سویلمہ دن القا ایدہ جکی جہتلہ صنایع مقبولہ دن عدا اولنور .



لف ونشر

لف ونشر — عبارده اول امرده ایکی یا خود دها زیادہ  
شیئی ذکر ایدہ رک بعدہ آنلردن برینہ عائد اولان شیلری  
ایراد ایلمکدر .

نثردن زیادہ نظمہ یا قیشان بوضعت — کہ بین الشعرا کثرت  
اوزره اجرا ایدیلن صنایع دندر — اول امرده و بعدہ ذکر  
اولنان شیلر بیندہ ترتیب تقابلی بہ رعایت اولنق ویا اولنماق  
صورتلرندن بریسیلہ وجودہ کلدیکندن ایکی قسمہ منقسم اولور .

برنجیسنہ (لف ونشر مرتب)، ایکنجیسنہ (لف ونشر مشوش) لف ونشر مرتب  
تعبیر اولنور . مثلاً «ابوبکر وعمر حضراتی صدق وعدل ایله لف ونشر مشوش  
شہرت بولمشلردر» دینسہ (صدق) ابوبکر ایله (عدل) عمر  
ایله تقابل ایدہ چکندن عبارده لف ونشر مرتب بولنہ جنی کی  
بالعکس «ابوبکر وعمر حضراتی عدل وصدق ایله شہرت  
بولمشلردر» دینسہ لف ونشر مشوش بولنور . کذاک «صدق،  
عدلی، شجاعتی صدیقی، فاروقی، حیدری آکدیسیور»  
عبارہ سندہ کی لف ونشر مرتب بونک «عدلی، شجاعتی، صدقی  
فاروقی، صدیقی، حیدری آکدیسیور» صورتہ تحویلیلہ لف  
ونشر مشوش اولور .

بوافادہ لردن آکلاشیلہ جغہ کورہ مرتب اولمیان لف ونشر  
معکوس اولسہ دہ، مخلوط بولنسہ دہ (مشوش) وصفی آلیر .  
بناءً علیہ لف ونشر دینیلن شی حقیقتدہ اوچ قسم اولدینی حالده  
عنوان جہتیلہ ایکی قسمہ منحصر قالیر .

بعض ادبا لف ونشرک برندہ ترتیب و معکوسہ رعایت اولنان،  
دیگرندہ هیچ برکونہ ترتیبہ رعایت اولنیلان ایکی قسمدن برنجیسنہ  
(معکوس الترتیب)، ایکنجیسنہ (مختلف الترتیب) عنواتی ویررلر .  
(لف ونشر مرتب) ہ مقابل ہوا یکی قسمدن ہر برینہ (لف ونشر  
غیر مرتب) دیملکہ اکتفا ایدنلردہ واردر .

معکوس الترتیب  
مختلف الترتیب  
لف ونشر غیر  
مرتب



لف و نشر مشوش نثرده بر مقصد مخصوصه مستند اولمدجقه  
حائز لطافت اوله ماز. نظمده دخی اکثریا وزن و قافیه الجاسیله  
اختیار اولنور. لف و نشر مرتب ایسه نظمده اولدینی کی  
نثرده دخی تزیناتدن معدود اولور. آشغیکی مثالده اول امرده  
( حرب و صلح ) ذکر اولنه رق بعده حرب عائد اولان ( آلت )  
ایله ( خشت خونمون ) و صلحه راجع بولنان ( اشارت ) ایله  
( شاخ شجر زیتون ) ایراد ایدلمشدر :

... ایشته منظره کز اولدینی وجه ایله حرب و صلحه آلت و اشارتدن  
کنایه برالمزده خشت خونمون و برالمزده شاخ شجر زیتون اولمغه ایکیسندن  
برینی انتخاب و قبول بیورکز ...  
کامل پاشا

ینه تله ساق ترجمه سندن اولان شوپارچه دخی بونک نظیریدر :

بنی بشر علی ماهو عالیہ واقف حقایق ( خیر و شر ) اولمد قلرندن درجه  
( خط و نفر تلرینه ) کوره برشیئک ( له و عایهنده ) حکم ایدرلر ایسه ده بوراده  
اوله اولیوب ...

بالاده کی مثالرده کوردیکی اوزره لف و نشر ایکیشرا یکیشر  
اولدینی کی اوچر اوچر و دردر دردر دخی اوله بیلیر .

### استطراد

صورت اخیرده اوله رق فردوسی طوسی طرفندن شاهنامه ده  
ایراد اولنان و اوتهدن بری شاعرلرک نظر تقدیرینی جلب ایتمش  
بولنان :

بروز نبرد آن یل ار جند  
بتیغ و بختنجر بکرز و کمند

برید و درید و شکست و بیست  
یلان را سر و سینه و پاودست

بیتلرنده اول امرده ( تیغ، خنجر، کرز، کمند ) ذکر اولنه رق  
بعده تیغه عائد اولان ( برید ) ایله ( سر )، خنجره مناسب بولنان  
( درید ) ایله ( سینه )، کره ز راجع اولان ( شکست ) ایله ( پا )،  
کننده ملایم بولنان ( بیست ) ایله ( دست ) ایراد ایدلمشدر .  
اتهی

لف و نشر مشوشک مقبول اولمی مألجه هیچ بر کونه  
قاریشقیلنی موجب اولمامسیله مشروطدر . هله سوء ایهام بونده  
اک زیاده احتراز ایدیله جک برشیدر . مثلاً :

کوله کی اتم اول ذلیله قیاس  
متساوی اولورمی تاج و مداس



و :

قاره طاشمی کرانه‌ها، زرمی  
هندک اوغلی — حسینیه بکر زرمی

بیتلرنده کی لف ونشر مرتب مداسک تاجدن ، حسینک هندک  
اوغلندن مقدم ایرادیه لف ونشر مشوش حاله کتیر یله جک  
اولسه میال ترتیب اولان ذهن وهله مداسک کوله یه ، تاجک  
ذلیله ، حسینک قاره طاشه ، هندک اوغلنک زره مقابل طوتلمش  
اولدیغنه ذاهب اولور . مقصود ایسه بونک نمامیله خلاقی اولمق  
اوزره کوله یی تاجه ، ذیلی مداسه ، هندک اوغلنی قاره طاشه ،  
حسینی زره تشبیه ایتمکدر .

اویولده سوء ایهامه قرین اوله جق لف ونشر مشوشلر  
صنایع مقبوله دن عد اولمقدن باشقه قطعاً مردود اولوز .

قائلی در خاطر ایده مدیکمز :

کورن اول غمزه مردمشکار وچشم شوخک دیر  
عجیدر ایتش آمیزش غزال و شیر بریده

بیتده کی لف ونشر مشوش ضرر سزدر .



تنسیق — صیره ایله ذکر اولنه جق شیر آشغیدن  
یوقاری یاخود یوقاریدن آشغی ترتیب اوزره ایراد ایلیمکدر .

ترتیب آشغیدن یوقاری اولدیغی حالده ( تنسیق ارتقائی ) ،  
یوقاریدن آشغی بولندیغی صورتده ( تنسیق انحطاطی ) دینیلیر .

تنسیق ارتقائی  
تنسیق انحطاطی

تنسیق ارتقائی یه مثال :

شیر خوارلر بشکینی ، چوچقلر اکندیکی یری ، کنجلر معیشتگاهنی ،  
اختیارلر گوشه فراغتی ، اولاد والده سنی ، پدر عائله سنی نه درلو حسیات  
ایله سورسه انسان وطنی اودرلو حسیات ایله سور .

کمال

تنسیق انحطاطی یه مثال :

پدرک ، برادرک بنم مکتبده او قود یغمز یازمه مصحف شریف حالا  
زدمزده محفوظدر .

بوایکی درلو تنسیقدن برینک دیکری مقامنده اجرایی  
بعضاً سوزه بیولم بر او یغونسزلق ایراث ایده جکی جهتله مقامک  
بونلردن هانکیسنه دها الویرشلی بولندیغندن غفلت اولناملیدر .

حضرت ابن الزبیر لسانندن اوله رق امام حسین افندمز  
خطاباً ایراد ایدلمش اولان تسلیمات آتیده اولاً ( نیس جان



بتول (، ثانیاً (فروغ قلب علی)، ثالثاً (حفید پیغمبر) ذکر  
اوله رق تنسیق ارتقائی به رعایت ایدلشدر .

السلام ای امیر آل رسول  
السلام ای انیس جان بتول

السلام ای نهفته نور جلی  
السلام ای فروغ قلب علی

السلام ای شهید غمپرور  
السلام ای حفید پیغمبر

بوراده بالفرض تنسیق انحطاطی کوزه دلش اولیدی خلاف  
مقام اوزره سوق کلام ایدلش اولوردی .

مثال آتیده وطنه مقابل کله جکی ایچون (مربع) ک ابتدا ،  
خارج وطن ایله تقابل ایده جکی ایچون (مثلث) ک بعده ذکر  
ایدلسی دخی انواع تنسیقدندر :

عقل «مربع باشقه در، مثلث باشقه» قضیه سنک حقیقتنه نه قوتده حکم  
ایلیورسه وجدانده «وطن باشقه در، خارج وطن باشقه» سوزینک  
صحتنه اوقوتده اعتماد ایدر .  
کمال



تغلیب — ایکی یاخود ده ازیاده شیدن برینی دیکرینه تغلیب  
ویادیکرلرینه غالب عد ایدرک اووجه ایله ایکسینی یاخود  
هپسینی برلکده تعیر ایتمکدر .

مثلاً (فضولی) بردانه اولدیغی حالد (فضولی) واقتدارجه  
آکا قریب اولان شاعرلر (یعنی (فضولی و امثالی) دینیه جک  
یرده (فضولیلر) دینیلیرکه فضولی سائرلرینه تغلیب ایدلش  
اولور . کاظم پاسانک برمرثیه سندن اولان شوبیتده کی (ایوبلر)  
تعیری بوکا نمائندر :

باخصوص اول شهر یار عالم توفیق کیم  
صبر بی پایا ننه ایوبلر حیران اولور

ضیاپاشانک نظم آتیبی دخی بوبابده بزه برایکی مثال  
کوسترمکده در :

ایرانده کلن هنرو رانک  
آرایش هربری جهانک

ایرانده ظهور ایدن افاضل  
دهرک فضلاسنه مقابل

ابتدی هنر آوران اعجام  
احیای علم دین اسلام



بیضاویلر      ز مخشیریلر  
شیرازیلرله      جو هریرلر

هپ اولدی اوخا کدن نمودار  
آنلردر ایدن علومی اظهار

ابوبکر و عمر ایله حسن و حسین حضراتنه (عمرین) و  
(حسنین)، آنایله بابایه (والدین) و (ابوین)، آیایله کونشه  
(قرین) اطلاق دخی تغلیب قیلندندر. جناب فاروق حضرت  
صدیقدن افضل اولماقله برابر آنک تغلیبی (عمرین) دیمک  
(ابوبکرین) دیمکدن اسهل اولدیغنه مینیدر. حسن مجتبانک  
حسین کربلایه تغلیبی دخی هم کندیسنک بیوک برادری  
اولمسندن هم ده (حسنین) دیمک (حسنین) دیمکدن اسهل  
بولنستنددر. (والده) ک (والده) یه، (اب) ک (ام) ه، (قر) ک  
(شمس) ه تغلیبی ایسه حقیقی اولسون اعتباری اولسون  
مذکرک مؤنثه غالب عد اولنستنددر. تغلیبک بودرلوسنه  
(متناسیندن برینک تغلیبی) تعیر اولنور.

تغلیب متکلم ایله مخاطب وغائبدن عبارت اولان اشخاص  
ثلاثه ییتنده دخی جریان ایدر.

متکلم مخاطب وغائبدن اقوی اولدیغندن ایکسسه تغلیب  
اولندیغنی حالده مخاطب یالکز غائبه نسبتله دها قوتلی بولندیغندن  
آنحق آکا تغلیب اولنور. غائب مخاطبه غائب، و مخاطب متکلمه  
تغلیب اولنه ماز.

متکلمک مخاطبه تغلیبیه مثال :

بن وسن - سن وبن - بن وسز - - سز وبن - بز وسن - سن وبز -  
بز وسز - سز وبز یازیورز.

متکلمک غائبه تغلیبیه مثال :

بن واو - او وبن - بن وآنلر - آنلر وبن - بز واو - بز وآنلر -  
آنلر وبز یازیورز.

مخاطبک غائبه تغلیبیه مثال :

سن واو - او وسن - سن وآنلر - آنلر وسن - سز واو - او  
وسز - سز وآنلر - آنلر وسز یازیورسکز.

اشخاص آره سنده جاری اولان بوتغلیب قاعده سینه نظراً  
کال بکک برمکتوبندن اولان شو عبارده ده (جهلی) مقامنده  
(جهلمز) دینلمک لازم کلیردی :

لا قدردی یی یالکز کندی اوزریکه آلنوبده مناسبتسز سوز سوتله  
ماهیات علوم یازمقده یالکز سنک کل، همیزک، طومیزک جهلی مانعدر.



اکمال — برعبارده ایله افاده اولن ان معنایی عبارته آخری  
ایرادیه اتمام ایتمکدر.

آشاغیده قوس ایچنده کوستریلن عبارلر اکال قیلندندر.  
هیچ برثروقی متصرف اولی کتم عدمدن برابر کتیرمه مشدر. دنیاده  
مال اطلاق اولنور نه وار ایسه اقدام ایله طوپلانیر، (سعی ایله وجوده  
کلیر) کال



انسان کندی سعیله یا شامیلدرکه زماننک قیمتنی بیلسون ، ( حیانتنک لذتنی طویسون ) .  
کذا

رحم ایت که غریب و دردمندم  
( بی مونس و یار و دستمندم )  
فضولی

مرد اولان کذبہ تنزل ایتز  
( ذلت کذبہ تحمل ایتز )  
نابی

آنی سن لطف ایله ایله بنده  
( عفو و اکرام ایله ایت شرمنده )  
وله

بحث ایتسه ایدر جهانی الزام  
( برسوزله ایدر فخامی افخام )  
شیخ غالب

آلدی سخن عزم راه قیلدی  
( هدهد کی قصد شاه قیلدی )  
وله

شیخ غالبک ( حشو ) مبحثده ایراد اولتان :

هنکام هر مده سویلشد  
پیر اولدینی دمه سویلشد

و :

واری هله سویلنمک سوز  
قالشمی مکر دینمک سوز

یتلرینک ایکنجی مصراعلری اکال قیلندن عد اولنه ماز .  
حشوی اکال صائق حشو ظن ایتنک کی دقتسزلکدن  
ایلری کلیر .

جناس — که ( تجنید ) نایله دخی یاد اولنور — ایکی  
لفظنک معنالری مختلف اولدینی حالده تلفظ و یا کتایبده  
یکدیگره مشابه اولمسیدر .

لفظین بیننده مشابہت کامل و یا ناقص اولتمدن خالی  
قالمیه جنی جهتله جناس اول امرده ( جناس تم ) و ( جناس  
غیر تام ) عنوانلریله ایکی قسمه آیریلیر .  
جناس تام  
جناس غیر تام

جناس تام ایکی لفظی تشکیل ایدن حروفنک نوع ، عدد ،  
ترتیب ، هیئت جهتلریله متفق اولمسنندن حصوله کلیر . بو اتفاقه  
« وجوه اربعه ده اتفاق » تعیر اولنورکه آنسز جناس تام تحقق  
ایتمز ، هیئت حرکه و سکوندن عبارتدر .

جناس تام ( بسیط ) و یا ( مرکب ) اولمق اوزره ایکی نوعدر .  
جناس تام بسیط  
جناس تام مرکب  
جناس تام بسیط  
جناس تام مرکب

باشقه بر قوت ویرر جنکاورانک ( قلب ) نه  
( قلب ) لشکر کاهده اولدقجه حضرت منجلی

دیگر :

ایدر اراقة ( دم ) حسرتکه چشمانم  
ترجم ایت نیجه ( دم ) در اسیر هجرانم

فضولینک :

کرچه ای دل یار ایچون ( یوز ) ویردی ( یوز ) محنت سکا [\*]  
ذره جه قطع محبت ایتنک رحمت سکا

[\*] بوراده « یوز ویردی » یوز کوستردی ، توجه ایتدی دیمکدر .  
( یوز ویرمک ) ماده سی شمدی بومعناده قرالایمور .



بیٹی دخی جناس تام بسیط مثالرندندر . سنبازاده وهینک :

ایله وقتکی ضایع دیمه قیش ( یاز ) اوقو ( یاز )

مصراع مشهور یله اسماعیل صفا اقتدینک :

بکارم هفته ده برنامه بو ( یاز )

یازه جقسه ک دیدیکم وجه ایله ( یاز )

بیٹی ده او جمله دندر .

جناس تام مرکبه برقاج مثال :

دست کوتاهمزی ایتمه مش الله رسا

منبع جودینی یوقسه منزله ( قاپارز )

یزه ویرسونمی خدا آب حیات توفیق

خضری بولسه ره ظلمتده کلاهن ( قاپارز )

عزت ملا

سویلرکن او سوزلری ( قیزاردی )

هم حظ ایدر آه هم ( قیزاردی )

صفا

فریادی آنک دکلی ( واهی )

بلبلده بیلیری آه و ( واهی )

وله

سودیکم باق بونه مهلاک ( یاره )

یا قیشیری بونی آچق ( یاره )

وله

بالذات بولندی معرکه لردن برینی مصور اوله رق قانونی

سلطان سلیمانک لسانندن صدور ایتدیکی روایت اولنان

وفردوسی طوسینک :

زسم ستوران دران پهن دشت

زمین شش شد و آسمان کشت هشت

ییتندن مقببس اولق اوزره یرک ، کوکک یدیشر طبقه اولمی

اعتبار مشهورینه کوره سویلنمش بولنان قطعه آتیه بوراده

اخطاره شایاندر :

اودکلو چیقدی توز یردن هوایه

سکزقات کوک اولوب یر ( آلتی ) قالدی

یریدن طولدی طول وعرضی ارضک

عدویه قاچه جق یر ( آلتی ) قالدی

( سیفی ) نامنده برشاعرك شو ییتده کی ( مویه ) و ( ناله )

جناسلری دخی بوقییلدندر :

دوندی جسم ضعیف پر ناله

مویه دن مویه ناله دن ناله

بوراده ( ناله ) لردن برنجی وایکنجیسی فریاد دیمک اولدیغی

حالده اوچنجیسی قلم تلی معناسنه کلن ( نال ) ایله ( ه ) اداتندن

مرکبدر . ( مویه ) لردن برنجیسی حافظ شیرازینک :

خنده و کریمه عشاق زجای دکرست

می سرایم بشب ووقت سحر می مویم

ییتنده بر مضارعی بولنان وسوزشله آغلامق معناسنه کلن

( موییدن ) مصدرندن اسمدرکه ینه مشارالیهک :



نماز شام غریبان چو کریمه آغازم  
 بمویهای غریبانه قصه پردازم  
 مطلعنده جمعی کوریلور . ایکنجیسی قیل دیمک اولان (موی)  
 ایله ینه (ه) اداتندن مرکبدر .

جناس مرکبده لفظین املاده متفق اولورلر ایسه آکا  
 (جناس متشابه) نامی ویریلیر ؛ بالاده کی مثاللرده اولدینی کی .  
 بالعکس املاده مختلف اولورلر ایسه آکا (جناس مفروق) تسمیه  
 اولنور . بوصورته جناس مرکب دخی ایکی نوع اولمش اولور .  
 جناس مفروقه مثال :

دیدیلر اولدی بر ایکن (ایکی شر)

چپقدیلر خارجه برر (ایکیشر)

قائلی مجهولمز اولان بیت آتی منفور برجناس مفروقی حاویدر :

رخساریکی ای دلبر (آینه) یه بکزتدم

وه وه نه خطا ایتدم (آینه) یه بکزتدم

جناس مفروقدده مرکبک تمامیه ایکی کله دن ترکیب ایتسی  
 شرطدر . بویله اولیوبده برکله ایله دیگر کله نک بعض اجزا -  
 سندن ترکیب ایدر ایسه آکا (جناس مرفو) نامی تخصیص اولنور .  
 مثال :

یوقکن کونشک اشی (سما) ده

براش کورینوردی شه (سما) ده

صفا

شوراسی ده اخطاره شایاندرکه (مجموعه معلم) ده بیان

جناس متشابه

جناس مفروق

جناس مرفو

اولندینی اوزره ماقبلنده حروف معزوله دن بری بولمق شرطیه  
 نون ایله بیتن کلمات مستثنی اوله رق علی العموم ایکی ساکن ایله  
 نهایت بولان کله لره الحاق اولنه حق (ایله) اداتنک تخفیفاً (له)  
 صورتنده تحریری جائز اولمدیغندن سنبزاده وهینک :

جاهله جاهله رفعتی کلیر عالمده

مصراعی کی عبارده لرده (جناس متشابه) متحقق اولماز . بویکی  
 (جاهله) دن هانکیسی (جاه) لفظنی محتوی اعتبار اولنورسه  
 آنک (جاه ایله) صورتنده یازلمسی واجب اولور . بناءً علیه  
 (جاه ایله) ایله (جاهله) بیننده جناس مفروق بولنور .

صیره سی کلش ایکن سویلیه لم که ینه (مجموعه معلم) ده بیان  
 اولندینی اوزره حروف مد ایله بینن کلماته لاحق اوله حق (ایله)  
 اداتنک تخفیفی جائز اولمدیغندن مشهور سرورینک تاریخ  
 آتیسنده تعمیه اوله رق کوستردیکی (یایله) املاسی قبول  
 اولنه ماز :

بایله یازدی قلم ثبت ایدیچک تاریخن

قشله ده ایتدی بنا والده سلطان حمام

بونک هر حالده (با ایله) صورتنده یازلمسی واجبدر . ایکی  
 صورتله یازیه بیلیر شیلر واردر اما بونلر آذر دن دکلددر .  
 اسلاف شعرانک بو بایده کی مسامحه لری نظر استحسان ایله  
 کور یله مه مک طبعیدر .  
 کله لم جناس غیر تامه :



بونده جناس تامك شرط حصولی اولان « وجوه اربعه ده اتفاق » بولمیب وجوه اربعه دن برنده اختلاف بولور .  
لفظین متجانسین یالکز نوع حروف جهتیله مختلف اولورلر ایسه آکا (جناس لاحق) دینیلیر . بونده اختلافك اولده ، وسطده ، آخرده بولمنسنه کوره اوچ قسم اولور .

جناس لاحق

اولده بولندیغنه مثال :

پدر یكزك طریق ادب و تربیه سنه ( سالك ) وهوا وهوسه غلبه ایله .  
نفسكزه ( مالك ) اولمیسكز . کامل پاشا

دیگر :

كلامك فائده سی بشریتك نوعیتیه ( قائم ) و بناءً علیه برکوزل سرز  
ناطقیه برابر ( دائم ) اولور . کمال

دیگر :

تبیانی یوق بوعالمك آکا کیم اعتماد ایدر  
( فرح ) کلیر ( ترح ) کیدر ترح کلیر فرح کیدر

وسطده بولندیغنه مثال :

بر بلده ده وار ( نمکن ) ایله  
کسب شرف ایت ( ترکن ) ایله

دیگر :

دل کیمسه یه ایلز ( تملق )  
اول خلق ایله ایتمه مش ( تخلق )

آخرده بولندیغنه مثال :

طرحلر ایچنده کی متعدد ایرماقلر بر بری آردنجه جریان و دوران  
ایده رك بعضیسی کمال سرعتله دائر و بعضیسی یاواش یاواش طولاشه  
طولاشه صانکه تارك و فارغ اوله مدیغی منبع قدیمی سمتنه ( سائل )  
و ( سائر ) اولوب ... کامل پاشا

لفظین متجانسین یالکز عدد حروف جهتیله مختلف اولورلر ایسه آکا ( جناس ناقص ) دینیلیر . بودخی اختلافك  
اولده ، وسطده ، آخرده بولمنسنه کوره اوچ قسم اولور .

اولده بولندیغنه مثال :

هر کیمده که طرز انشایه استطاعة ما اوله خنجر سر تیز حسد و ستیز  
ایله جریج ال ( خلد ) و غایت غوایت ایله « الاعداء من عاداك بالحسد » جچیمنده  
( مخلص ) اولور . . . اوقچی زاده

دیگر :

بر مسئله ده عقل و نقل تعارض ایدنجه حجت بالغه قدرت اولان  
عقلك حکمی ( اول ) و نقل آنکه ( مؤول ) اولدیفیچون علمای شریعت  
اشتغال معقولات ایله مکلف اولدیغی . . . کمال

دیگر :

بو محبت اساس ( ایمان ) در  
باغیان برطاقم ( لثیان ) در

دیگر :

اوغلم ای مایه دار حس ( حسن )  
سنی بندن کوزل بیلیرسن ( سن )



وسطه بولندیغنه مثال :

کرستردیکم - مراجعتی کورمه نا بجا  
( الجا ) ی فرط قافه ایله ایتدم ( التجا )

صفا

آخرده بولندیغنه مثال :

بزه ای ( باد ) ( بادی ) پریشان اولورسه کده  
طوقن کاهی او زلف تاروماره هرچه بادا باد

سنبلزاده وهبی

مثال اخیرده اولدینی کی آخرده زائد حرف واحد اولور  
ایسه آکثریا ( جناس مطرف ) دینیلیر . بردن زیاده اولدینی  
صورته آکا دخی اکثریا ( جناس مذیل ) تعییر اولتور ؛ ( بلا  
— بلاغت ) ( صلا — صلابت ) ( نوا — نواذب ) کی .

لفظین متجانسین یالکیز ترتیب جهتیله مختلف اولورلرایسه  
آکا ( جناس قلب ) دینیلیر . قلبک تام و یا ناقص اریسنه کوره  
جناس قلب ایکی قسمه آیریلیر . تام اولور ایسه ( قلب کل ) ، ناقص  
اولور ایسه ( قلب بعض ) نامنی آلیر .

قلب کله مثال :

اوکنه ابر سیاهی چکه رک  
ایتدی پنهان ( کلف ) بدری ( فلك )

جناس قلب

قلب کل

قلب بعض

قلب بعضه مثال :

نیجه ظالم لر ایلش پامال  
ایتمز ( اهمال ) ایدرسه ده ( امهال )

دیگر :

آلهی دکدر سوزم اقتضار  
تسلییه ( مادر ) ایچون بر ( مدار )

جنایت کتابتندده بولندیغمز صیره ده سویلدیکمز شو  
مصراعده دخی قلب بعض موجوددر :

( جانی ) لر ایچنده قالدی ( ناجی )

لفظین متجانسین یالکیز هیئت جهتیله مختلف اولورلرایسه  
آکا ( جناس محرف ) دینیلیر .  
مثال :

شهرک ایچنده شهرتی آرتار جالندک  
اوصاف ( ورد ) عارضی ( ورد ) زبان اولور

لا ادری

جناس خصوصنده حرف مشدد حرف مخفف حکمنده در .  
بناءً علیه « جاهل یامفرط و یا مفرط اولور » قول مشهورنده  
جناس محرف متحققدر .

( جناس خط ) و یا ( جناس خطی ) تعییر اولنان جناس — که  
آکا ( جناس تصحیف ) و ( جناس مصحف ) دخی دینیلیر —  
جناس خط  
جناس تصحیف  
جناس مصحف



نقطه اختلافدن و یا کتابتده متشابه اولان ایکی حرفدن برینک  
نقطه‌لی ، دیگرینک نقطه‌سز بولمئسندن عبارتدر .

برایکی مثال :

بونه احسان آلهیدرکه دوچار اولدیغمز چار موجه اضطرارک  
اوزرینه بر (بری) (بزی) مسکن و مأواستده ضرورت و احتیاجدن  
(بری) ایلدی ! کامل پاشا

خلفی مستعد ایش (یوریدی)  
مکه وادیلرین دومان (یوریدی)

(تسخیر) عیون ایدر نگاهک  
(تسخیر) درون ایدر نگاهک

چکمه بیهوده زحمت ای مطرب  
بو (تغنی) دکل (تغنی) در

دیرسهک اولهیم کالی (حائز)  
تضایع زمانی کورمه (جائز)

فضولینک بیت آتیسنده کی (رحمت) ایله (زحمت) دخی  
بویله‌در :

ای فضولی اولدک افغان ایتدک رحمت سکا  
رحم قیلدک خلقه افغانکه زحمت ویرمدک

تفعینک ظاهر افندی نامنده برذات حقنده کی شوقطعه‌سندن  
دخی جناس خطی ظاهر اولمقده‌در :

بزه ظاهر افندی کلب دیش  
النفاتی یوسوزده ظاهردر  
مالکی مذهبییم زیرا  
اعتقادجه کلب ظاهردر

جناسک دها بعض انواعی بولنه بیلیرسه‌ده ذاتاً پک‌ده جدی  
صورتده اوغراشیله‌جق برشی اولمدیغندن بوقدرینک ارانه‌سیله  
اکتفا‌نسب کورلدی .

محتاج ایضاح اولمدیغی اوزره سوز حدذاتنده کوزل اولمقدن  
صکره جناس آکا کوزلک ویره‌مز . مع هذا حسن ذاتی  
حائز اولان برکلام ایچون حسن عرضی عد اولنور . هله  
طبیعیلک دینیلن مزیت جلیله هیچ بروقت تجنیساته فدا  
ایدله‌ملیدر .

اشتقاق — بر ماده اصلیه ایله آندن مأخوذ اولان بر اشتقاق  
و یا دها زیاده کله‌بی یاخود بر ماده اصلیه‌دن مأخوذ اولان ایکی  
و یا دها زیاده کله‌بی عبارده جمع ایتمکدر .  
برقاچ مثال :



قیمت (شعر) ی ایدن ہمت (شاعر) کبی پست  
شاعرک مسبکنت جائزہ جو یا نہ سیدر

(حق) لونی حق سزی ادمان ایلہ تقریق ایدہ لم  
طور تلاش ایتہ افندی ایشی (تحقیق) ایدہ لم

حقك البتہ قولى ثابت اولر  
طفل (ساکت) دایل (مسکت) اولر

بن کہ صبارہیم (دیم) او یلہ  
(دیسہل) (سویلہ) (سویلہ) شویلہ

دل فرقتدہ ذاتاً (محزون)  
سنده برقات دها (تجزین) ایتہ

نہ صایار سین بکا (مشاغل) کی  
او یلہ شیلرلہ (اشتغال) ایدہ مم

ایلمش مولی (تجمل) دن (جمال) ک بی نیاز

(قول) اصحاب (تقول) لایق اصفا دکل

شکر کیم ایتدک (تملل) (ملت) اسلام ایلہ

پوکون (غابن) اولان (مغبین) اولور یوم (تغابن) دہ

(ارصاد) مبحثدہ ایما اولندیفی اوزرہ صنعت اشتقاق  
اجراسی لزوم طبیعیہ مستند اواق شرطیلہ مقبول اولور .

(شبه اشتقاق) دینیلن و حقیقتدہ بر ماده دن مشتق اولمیان  
ایکی کلمه نك تلفظ و یا کتابتدہ یکدیگرہ بکثرہ مسندن عبارت  
بولنان صنعت — کہ :

قالیری باصرہ خالی خیال خالیدن

مصراعندہ کی (خیال) و (خال) کی کلمہ لر بیتندہ تحقق ایدر —  
اکثریا ادبا نزدندہ (اشتقاق) کی جناسہ ملحق عدا و لمقدہ در .  
باقینک ینہ (ارصاد) مبحثدہ ایراد اولنان :

المن (قیس) ه (قیاس) ایتہ دل محزونک  
یوق ایدی عقلی تہ دردی وار ایدی مجنونک  
بیتی دخی شبه اشتقاق مثالر ننددر . و قیلہ بیت آتی ی آکا تقلیداً  
یازمش ایدک :

(قیس) ه دکلدر خطراتم (مقیس)  
محبس شاهین بلاد سرم

مراعات نظیر — کہ (تناسب) (توفیق) (ائتلاف) (تلفیق) مراعات نظیر

قاملر یلہ دخی یاد اولنور — تضاد صورتندہ اولمیه رق معنی  
جهتیلہ متناسب اولان ایکی و یا دها ز یادہ شیئی عبارتدہ جمع  
ایتمکدر .



(جمعیت) دخی آنک نام دیگر یدر. بولندی عبارتیه (جمعیتی) دینیلیر.

طبیعت شاعرانه تناسبه عاشق اولدیغندن کندی محصولاتنک  
بوزیور دلفریب ایله مزین اولسنی انهماک درجه سنده آرزو  
ایدر. بناءً علیه مراعات نظیر اک طبیعی صنایعدن اوله رقی آثار  
ادبیه ده، خصوصیه اشعارده کثرت اوزره بوانور.

برخیلی مثال:

اک بیوک جهانگیرلردن اولان اسکندر رومی دیوژنک (آیاغنه)  
کیتدیکی و فاتح سلطان محمد ملا کورائینک دائماً (النی) اوپدیکی نمونه عبرت  
اوله حق وقایعدندر. کمال پاشا

ینه او عصر ایچنده ایدی که اورو یاده لوتر پرو تستانلق نامنه (بر)  
مذهب جدید آچهرق اصحاب (تثلیث) (ایکی) به (تقسیم) ایتش ایدی.  
کذا

ارکان اربعه نامیه مشهر اولان و دولتک قوای معنویه سی حکمنده  
بولان درت ذاتک یرنجیسی مملکتده ارتشا و مداهنه نک موجودی صاییلان  
شمسی پاشا ایسه ایکنجیسی ده (صدیق برعزم)، (عمری برتوفیق)، (عزانی)  
یرفدا کاراتی)، (حیدری برجلادت) ایله ۱۰۰۵ تاریخنده و محمدناک  
زماننده اکری ملحه کبراسنک قازانلسنه سبب مستقل اولان مرحوم  
خواجه س. الدین اید. کذا

آلدانه (شاعر) سوزی البته (بالان) در

فضولی

باقی قالان بو (قبه) ده برخوش (صدا) ایش

باقی

حسرت (عید) ایله (ماه نو) ی دنیا کورزه در  
وله

(زنجر) دن بوشاتمش (دیوانه) در صانیرلر  
وله

شجاعت عرض ایدرکن مرد (قبطی) (سرقت) ن سویلر  
راغب پاشا

امید (نشوه) در بزه هپ (دردسر) ویرن  
وله

ایدرمی (ساز) سینهم دکمه بر (مضرب) دن (فریاد)  
وله

مثال (بحر) دروزکده صاقلا یوب (کهر) ک  
هنر تمالغه میل ایتمه وار ایسه هنرک

سید وهی

رونمادر (نشئه) سنده هپ تفاوت عالمک  
(ساق) صنعک ولی (جام) جهان پیراسی بر

حکمت بک

بعضاً مثلاً بیتده تناسب تکرر ایدر. از جمله باقینک:

دامن شاهد معنایه بری دست اوره ماز  
چوق اولور کرچه سرفکری کر بیانه چکر

بیتده (دامن) (کریبان) ایله، (دست) دخی (سر) ایله متناسبدر.  
شیخ الاسلام یحیی افندیکنک شو بیقی بونک نظیر یدر:

(بحر) ایسه کده (قطره) ناچیز کوستر کندیکی  
کوکله کیرای کوکل اول (غیجه) نک (شبنم) کبی



تناسبك تداخل ايتديكى اولور . مثلا موصلی اسعدك  
مشهور اولان :

ایام انبساط ایله در انت حیات  
طوفان غمده آدمه لازمی عمر نوح

بیتمده (ایام) ایله (حیات) و (عمر) ، (طوفان) ایله ده (نوح) ،  
(نوح) ایله ده کذلک (عمر) ، (آدم) ایله دخی کذلک (نوح)  
متناسبدر .

تشابه اطراف

بعض ادبانك (تشابه اطراف) نامیه یاد ایلدکلی صنعت  
— که سوزی ابتداسیه متناسب بر صورتده اتهایدیر ایتمکدن  
عبارتدر — مراعات نظیر قیلندن عد اولنور .  
مثال :

... فقط برده ( او نقاب ظلمانینک ماوراسنه تعلیق نظر اولنورسه )  
نازنین دلربای تمدن نظر فریب افکار اوله جق برزینت وسلطنت ایله  
عرض دیدار ایتکه باشلارکه بدایع پسند اولان کولکلر ایچون ( حین  
اندانه مفتون اولماق احتمالک خارجیده در ) . کمال

ایهام تناسب

(ایهام تناسب) دینیلن ومعنای غیر مقصوده کوره بینلرنده  
مناسبت اولان لفظلرک جمعندن عبارت بولنان صنعت دخی  
مراعات نظیره ملحقدر .

مثلا فضولینک :

صو ویرر هر صبحدم کوز یاشی تیغ آهممه  
کیم دوکم قاتق سپهرک صالنه مهرین ماهمه

مطلعنده قصد اولنان معناسی ( محبت ) اولان ( مهر ) لفظی غیر  
مقصود بولنان ( کونش ) معناسنه کوره ( صبحدم ) و ( سپهر ) و ( ماه )  
ایله متناسب دوشدیکندن ایهام تناسب تحقق ایتشدیر . مشارالیهک  
یوقاریده بالمتاسبه ایراد اولنان برغلندن اولان :

مهر صالمزسین بکا رحم ایلزسین بونجه کیم  
سایه تک سودای زلفک پایمال ایلر بنی

بیتمده کی (مهر) لفظنک (سایه) ایله مناسبتی ده او یولده در . (جامی)  
نامنده برشاعرك اولان بیت آتی ده آنلره بکزر :

مهرم که اولدی عالمه روشن کونش کی  
بر ذره کلز ای مه نا مهر باق سکا

عا کف پاشانک :

هر کسک قسمتی یوقدن کلیر اما بیلز  
یری وار عالمه من ایلنه سلوای عدم

بیتمده دخی ایهام تناسب موجوددر ، زیرا بوراده قصد اولنان  
معناسی ( منت ) اولان ( من ) لفظی غیر مقصود بولنان ( قدرت  
حلواسی ) معناسنه کوره ( سلوی ) ایله متناسبدر .

~~~~~

وصل ، فصل — وصل عطفدن ، فصل ترك عطفدن وصل ، فصل

عبارتدر .

وصل ایله فصل کبیره ، ترکیبیلر ، جمله لری بنده جریان ایدر .
وصل عطف و تشریک ادر اتندن بریله اجرا اولنور . بو
ادواتک ترکیله ده فصل حاصل اولور . بونلردن (و) اداتک
صورت استعمالی خیلی زماندن بری مباحث مهمه صیره سنه
کچمش اولدیفندن ارل امرده (مجموعه معلم) ک التبحر نسخه سنی
اشغال ایدن قاله و اویه ناک اصلی اولان بند منصلک بوجه آتی
درجه لزوم کورندی :

و

عربیده ، فارسیده اولدینی کی لسانمزده دخی ادات عطف
اوله رق مستعمل اولان (و) جمع اچوندور . مفردلری ، ترکیبیلری ،
جمله لری بر بری اوزرینه عطف ایدر .
(عطف) لغتجه (اماله) دیمکدر . معطوفی ، معطوف علیه اماله
ایتدیکی اچون واوه (عاطفه) دنیلیر .

عربیده « واو مطلقاً جمع اچوندور » دینلمسی و اوک معطوف
ایله معطوف علیه بیننده ترتیبی ایجاب ایتمه مسنددر . مثلاً « جاء
زید و عمرو » دینلده بو آدم لری مجرد کلدکلری بیان ایدلمش
اولور ، هانکی سنک اول ویا صکره کلدیکنی افاده مقصود اولماز .
لسانمزده ایسه واو اکثریا جمع ایله برابر ترتیه دلالت ایدر .
مثلاً « محمد ثانی و سلیم اول اک بیوک جهانگیرلردن ایدیلر » دیمک
محمد ثانیکن زماناً سلیم اوله تقدمنی کوستره چکی جهته « سلیم

اول و محمد ثانی اک بیوک جهانگیرلردن ایدیلر » دیمکه ترجیح
اولنور . ایکنجی صورتده واو یالکنز محمد ثانی ایله سلیم اولی
اک بیوک جهانگیرلردن اولق خصوصنده جمع ایدر . پنجی
صورتده ایسه آنلری بو خصوصده جمع ایتدکن باشقه
بینلرنده کی ترتیب زمانی نی دخی کوسترمش اولور .
عربیده واو عاطفه دائماً مفتوح اوقونور .
مثال :

بالعز و الشرف .

فارسیده ایکی درلو استعمال اولنور : حروف مددن برینی
ویا های رسمیه یی تعقیب ایدر سه بررایه کوره مضموم ، رای
دیگره کوره مفتوح اوقونور : ضم ایله تلفظی غالبدر .
امثله :

بالا وزیر — ابرو و زلف — بندکی و اخلاص — دیده و دل .
سائر حرفلردن برینی تعقیب ایدر سه کندیبی اوقونماز ،
یالکنز ماقبلتی مضموم اوقودر :
امثله :

زیر و بالا — زلف و ابرو — اخلاص و بندکی — دل و دیده .

اخطار

عربی (ولکن) دن بوزمه اولان (ولیکن) ک واوی دائماً

مفتوح اوقونور . (ولیکن) دن مخفف اولان (ولیک) ایله (ولی)
دخی بویله در . انتهى

واو یالکز حروف مددن (ی) حرفنی تعقیب ایتدیکی وقت
یرینه کوره ایکی صورت جائز اولور ، یعنی هم آیر یجه تلفظ
اولنه بیلیر هم ده ماقبلنی مضموم اوقوده بیلیر .
مثال :

جهان را (بلندی و بستی) تویی [*]
ندام چه هر چه هستی تویی

فردوسی

دیگر :

بنای مدرسه از جنس (عالی و سافل)
خراب گشت و خرابات همچنان معمور

امیدی طهرانی

لسانمزده واو عاطفه عربک و بعضی عجمک استعمالنه اقتفاء
فتح ایله قوللاندینی کی عجمک واوی ضم ایله تلفظ ایتک و یا
ماقبلنک ضمیمه اکتفا ایلمکدن عبارت اولان ایکی درلو استعمالنه
اقتفاء دخی قوللانیلیر .

دیمک اولیورکه بز بواداتی اوج صورتله استعمال ایدیورز .
واو مفتوحه بی عربی و یافارسیدن ، ضم ایله اوقونان و یا ماقبلنی
مضموم اوقودان واوی فارسیدن آلمشز .

[*] بویله یاری اهل لسانک تشدید ایله ده اوقودقلری اولور .

بونلردن فتح و یا ضم ایله اوقونانه — ماقبلندن فصل اولندیغی
ایچون — (واو مفصوله) ، ماقبلنی مضموم اوقوداته — ماقبلنه
وصل اولندیغی ایچون — (واو موصوله) تعیر اولنور .
کرك واو مفصوله نك ، كرك واو موصوله نك لسانمزده
مواضع استعمالی تعیین ایدلک لازم کلیور . بناءً علیه ایضاحات
آتییه بی اعطایه مجبور بولئیورز :

حروف مددن ، حروف املادن یریه و یا های رسمیه
ایله بیتن هر درلو کلماتدن صکره واو مفصوله کلیر .

امثله :

بكا وسكا — صو وانمك — یالی وكوشك — كلدی وکیتدی
— بنجره وقایق — صحرا وجیل — عدو وخیل — والی واهالی
— دانا وینا — کیسو ورخسار — شادی وناشادی — صحرا
ودکیز — دریا وکیلر — کورلی وعریده — کدی وپلنک .

اخطار

نژده (شادی وناشادی) قیلندن اولان عطفلرده واو همان
دائماً مفصوله صورتنده تلفظ اولنورسه ده نظمده بالاده کوستریلن
شیوه ایرانه اقتفاء ماقبلنک ضمیمه اکتفا دخی اولنه بیلیر .

انتهی

حروف مذکورده دن ماعدا حروفلر ایله بیتن کلماتدن صکره
یرینه کوره واو مفصوله و یا واو موصوله کتیر یله بیلیر . بونلردن

هانکیسنگ نروده ایراد ایدیه جکی بیانمک ایچون معطوف ایله
معطوف علیه دقت ایدمک لازم کلیر .

معطوف، معطوف علیه تعیر ایتدی کمز کله لرده — که واو
بونلرک آره سنده بولنه جقدر — آلتی احتمال واردر :

برنجیسی ایکسی ده عربی — ایکنجیسی ایکسی ده فارسی
— اوچنجیسی بری عربی ، دیکری فارسی — دردنجیسی
بری عربی ، دیکری ترکی — بشنجیسی بری فارسی ، دیکری
ترکی — آلتنجیسی ایکسی ده ترکی اولمق احتمالیدر .

برنجی ، ایکنجی ، اوچنجی احتماللره کوره واو موصوله
کتیر یلیر .

امثله :

حدل واحسان — آب وتاب — امنیت وآسایش .
ادبیات ایله (تاریخ وسیر)

سنبلزاده وهبی

ترازوسی (مهرومه) آسمان

عزت ملا

(عقل ودانش) بونی جزم ایتسرنمی

نابی

دردنجی ، بشنجی ، آلتنجی احتماللره کوره واو موصوله
کتیر یلیر .

امثله :

درایت وچالشقالتی — پدر واوغل — قاش وکوز ،

قاضی اوله (دعواچی ومحضر) دخی شاهد

ضیا پاشا

اوچنجی احتمالده معطوفک عربی ویا فارسی اولسی ایله
معطوف علیهاک عربی ویا فارسی اولسی بیننده فرق اولدینی
کبی دردنجی ، بشنجی احتماللرده دخی کرک معطوفک ، کرک
معطوف علیهاک عربی ویا فارسی اولسی بیننده فرق یوقدر .

امثله :

آسایش وامنیت — چالشقالتی ودرایت — اوغل وپدر .

لسانمزده استعمال ایدلمکده اولان (قومیسون) (قومیسر)
کبی بعض کلمات اجنبیه دخی بو یابده کلمات ترکیه حکمنده در ،
یعنی بونلردن بری معطوف ویا معطوف علیه اولدینی زمان —
مقارنی نصل کله اولورسه اولسون — واو موصوله کتیریایر .

رای عاجزانه مزه کوره لسانمزده واو موصوله نیک دائماً
فتح ایله استعمالی انبدر . شوقدر وارکه بعضاً نظمده واوک
حرکه سی اماله ایدمک لازم کانجه — فتحه تک اماله سندن
ظهوره کله جک هجته ضمه تک اماله سندن حاصل اوله جق ثقلت
ترجیح اولنه رق — اسلوب فارسی یه اتباعاً ضم ایله اوقونور .
مثال :

ایده منضم ینه اولکی کیبی کشور رومه
چکوب صاغه صوله شمشیر بران سراندازی
شمالاً نخجوان وکنجه (وتفلیس) وشرواتی
جنوباً شهرزور و بصره (وبغداد) واهوازی

نفعی

واو موصوله نك ماقبله ویردیکی ضمه دخی نظمده بعضا
اماله ایدیلیر . ایشته نفعینك :

شمالاً نخجوان وکنجه وتفلیس وشرواتی
جنوباً شهرزور و بصره و بغداد واهوازی

ییتنده کی (نخجوان) ایله (کنجه) ، (شهرزور) ایله (بصره)
آره سنده واقع موصوله لرك ماقبلارییه ویردکاری ضمه اویولده
اوقونور .

ضیاپاشانك :

جمال و جمال وعشق اله اولدی برزمان

مصراعنده کی (جمال) ایله (عشق) آره سنده واقع موصوله نك
ضمه سی اماله ایدلمکده اولدیغندن بویاید برمال اولیور .
حال بوکه (جمال) ایله (عشق) ییتنده واقع موصوله نك ضمه سی
اماله ایدلیور . بناءً علیه مصراع نظمده موصوله نك اماله لی
اماله سز استعمالنه شاهد طوتیله بیلیر . دقت اولنسه بیت نفعینك
دخی بوقیلدن اولدیغنی اکلاشیلیر .

روحی بغدادینك ، فضولینك ، ناینك :

§ اول زاهدك آغلار (بروکوک) حاله یارین
§ بو بز مده قالمشز (سن و بن)
§ آغلار (ظالم و آج و عریان)

مصراعلری کی ضیاپاشانك :

سندندر آلهی ینه بو (مکروبو) فتنه

مصراعنی دخی موصوله نك استعمالنه دائر اتخاذا ایتدی کمز قاعده یه
موافق بوله میز ، چونکه قاعده مزه کوره ایکی کلمه ترکیه ییتنده
موصوله بولنه ماز . حال بوکه روحینك ، فضولینك مصراعلرنده
(یر) ایله (کوک) ، (سن) ایله (بن) آره سنه موصوله کتیرلمشدر .
ینه قاعده مزه کوره برکله عربیه ایله برکله ترکیه ییتنده موصوله
بولنه ماز . حال بوکه مصراع نابیده (ظالم) ایله (آج) ، (آج) ایله
(عریان) آره سنده کذلک موصوله کتیرلمشدر . (مکر) ایله (بو)
آره سنه موصوله کتیرمک بوقیلدندر ، چونکه (مکر) عربی
اولدیغنی حالده (بو) ترکیدر . نئلی قدیمك :

نه آ کلادك بوسماع و بونایدن صوفی

مصراعنده کی (بوسماع و بونای) دخی (بومکر و بوقتنه) یه بکزر .
بوايضاحاتدن اکلاشیلیرکه (جان و کوکل — آج و بی علاج
— تک و تنها) کی ذاتاً لسان ادیجه مقبول اولمیان کهنه تعییراتك
موصوله ایله استعمالی طوغری دکلدیر . (بای) لفظنك ترکی
اولمسنه کوره ضیاپاشانك :

چون بای وکدا خاکه برابر کیره جکدر

مصراعنده دخی بوهجنت موجوددر .

شوراسنه دقت اولنمیدرکه - دردنجی ، بشنجی ، آلتنجی
احتمالار مستثنی اوله رق - واوک بالاده کوسترین مواضعه
مفصوله ویا موصوله صورتنده ایرادی اساساً تلفظک سهولت
وعذوبتنه مستند بولندیغندن ، یعنی هانکی صورت لسانه ثقلت
ویرمیورسه اوترجیح اولنه جغندن قاعده موصوله صورتنده
تلفظی لازم کلن واوک بعضاً مفصوله صورتنده اوقونمسی
اولی کوریلر .

مثال :

بطریق الاملا یازمغه تنزل بیورر ایسه کن (تشکر ودعا) ایلرم .

ادهم پرتو پاشا

بغضاً دخی مفصوله صورتنده تلفظی واجب اولور .

مثال :

ملل متمدنه دن اولین پایه ترقیده اولانلرک بیه عوامندن لا اقل نصق
اوقویوب یازمق بیلیر . حال بوکه ملنلرک بیکده بری نامنی (تحریر و بلکه)
قراشدن عاجزدر .

(شرعاً و نظاماً) (طوعاً و کرهاً) (لساناً و قلماً) (مالاً و بدناً)
کی لسانمزده مستعمل اولان تعیرات عربیه ده کی واولر نژده
دائماً مفصوله صورتنده اوقونورسه ده نظمده موصوله صورتنده
دخی ایرادی تجویز اولنور .

مثال :

(خلقاً و خلقاً) مشایهین رسول الله سن
غنیة کلشنرای مصطفاسین یا حسین
کدخدا زاده عارف

قابل انکار دکلدرکه عبارده مفصوله اولسون موصوله
اولسون برقاج واوک تعاقبی لسانمزه ثقلت ویرر . مثلاً کمال بک
• برذهن متفکر اویله عرش اعلائی الوهیته قدر ایصال ایدیش
• بحالک عمومیت اعتباریله حس و تقدیر و تعریف و تصویرینه
• تره دن مقتدر اولسون ؟ « عبارده سنده (حس) (تقدیر) (تعریف)
(تصویر) کله لرینک آره لرنده بر برینی تعقیب ایدن واولرنه درلو
اعتبار ایدیلیرسه ایدلسون لسانه ثقیل کلیر . اک خفیفی (حس)
ایله (تقدیر) ، (تعریف) ایله (تصویر) بینلرنده کی واولری
موصوله ، (تقدیر) ایله (تعریف) بیننده کی واولی مفصوله
صورتنده اوقوه قدر . حال بوکه بونده ده اوقدر سهولت و عذوبت
اولمدینی آشکاردر .

بوسوز مشارالیهک کلمات قدیمه سنندن معدوددر . مؤخرأ
وجوده کتیردیکی آثار جیده آره سنده بویله اوچ واولی برعباریه
تصادف اولنه نماز صائیرر .

تفعینک :

فیض استعداد ذاتن کورکیم ایتمش تا ازل
جذبه سی خورشید و ماه و آسمانی مولوی

بیتندہ ایکی واولک تعاقبندن بیله بر درجه یه قدر ثقلت حس
اولنیور . حال بوکه :

جذبہ سی خورشیدی ، ماهی ، آسمانی مولوی

دینلیو یرنجہ او ثقاتدن اثر قالمیور . هله :

شمالاً الخجوان وکنجه وقلبس وشروانی
جنوباً شهر زور و بصره و بغداد واهوازی

بیتنی حامل اولدینی واولر نه قدر ثقیل ایدیور ! حال بوکه :

شمالاً الخجوانی ، کنجه یی ، قفلیسی ، شروانی
جنوباً شهر زوری ، بصره یی ، بغدادی ، اهوازی

صورتنه قونلیو یرنجہ پک لطیف اولیور . او ثقلت واولرک
اجتماعندن ، بولطافت ینه انلرک اندفاعندن حصوله کایور .

ضیا پاشا :

سفیانہ ، جعدہ یه ، شمره ، ابن ملجمه

مصر اعنی یا کیلوبده :

سفیان وجعدہ و شمره و ابن ملجمه

صورتندہ یازمش اولیدی بکنیلیرمی ایدی ؟ مع هذا :

یا خواب و یا خیال و یا خود برفسانه در

مصر اعنی واولرک نیچون اسقاطیله :

یا خواب ، یا خیال ، یا خود برفسانه در [*]

صورتندہ یازمامش اولدینی بیله مز .

بورایه قدر ویردیکمز ایضاحات کله لری عطف ایدن و اوہ
عانددر . بر آزده ترکیلری ، جمله لری عطف ایدن و اودن بحث
ایدمل :

ترکیلری ، جمله لری مسجع اولسون اولسون عطف ایدن
واو مفصولة صورتندہ کلیر .
برایکی مثال :

... بنی نوعمز اوچ درت بیک سنه دن بری بونجه (باران بلا
وخونابه استیلا) طوفانلرینه اوغرامش ایکن (اسرار طبعی ادراک وخفایای
معرفتی استدراک) صرف ایتدیکی اقدامات سایه سنده اویله بر مرتبه اعتلا یه
واصل اولمشدرکه تصویری عقللره حیرت ویرر .
کال

آچلادی غنجه طوماری و معلوم اولدی مضمونی

فضولی

اوق دکدی و یاره حاصل اولدی

شیخ غالب

کل کچدی و نو بهار کچدی

وله

[*] (یا خود) تعبیر فارسی سنده کی (یا) نک قصری تجویز اولناملیدر .
پاشا بو خصوصده نفی کبی :

برق اوران دستکده تیغ پر کهر میدر یا خود

طرزنده شعر سویلین اسلافه پیرو اولمش دتمک اولور .

واولرك تعاقبتدن حاصل اوله جق ثقلتك اندفاعی بولرك
ممکن اولدینی قدر تقلیل استعمالنه توقف ایدر . لزوم قطعی
کورلمدکجه واولك تکریرندن اجتناب ایدلملیدر .
دقت اولنسه آکلاشیلیرکه برعبارده واول نه قدر آز اولورسه
اوقدر ساده اولور . لسانمرك اصل لطافتی ایسه ساده لك ایچنده
بولور .

اوتهدن بری معنایی اوقدر نظر اعتباره آلیوب لطافتی
طمطراق الفاظده آرایان ارباب قلم طرفدن برطاقم لزومستر
تکلفاته بوغلمش اولان لسانمرك بوتکلفاتدن تجریدیه ساده
لكنك، لطافتنك اظهاری زمانی چوقدن کلمشدر .
برسوز نه قدر طبیعی سویلنیر ، نه قدر طبیعی یازیلیرسه
اودرجه ساده ، اودرجه لطیف اولور . فصاحت ، بلاغت دینیلن
شیلرك طبیعیلمکده آرانلمسی لازم کلیر . سوزه تکلف قارشیدینی
کی فصاحت ، بلاغت آرهدن چیقار . ضیا پاشانك :

چیتدجه لسان طبعیتندن

البته دوشر فصاحتندن

سوزی پك طوغریدر .

تکلف ایله فصاحت ، بلاغت هیچ بروقتده برلشمه مش
اولدینی حالدده بوتلری تکلفده آرامق غریب اولمازمی ؟
لسانمرك طبیعیلمکنی محافظه ایچون دقت اولنه جق شیلردن
بری ده یوقاریده کوسترادیکی اوزره واولك تقلیل استعمالیدر .

بزم واوله احتیاجم اوقدر آزددرکه برمحروم ایچنده ولو بردانه
اولسون ولو عاطفه بولنماق شرطیه برجلد یازه بیلیر . شو حالده
واولك استعمالنی ایستدیکمز قدر آزالده بیلیرز .

فرانسزلرك (پونکتو آسیون) دیدکلری (اصول تنقیط) ی
لسانمرك شیوه تحریرینه تطبیقاً قبول ایتلی یز ، چونکه بو اصول
افاده نك انتظامنه ، ساده لکنه زیاده سیله یاردیم ایدیور . بوراسی
آزچوق یازی ایله اشتغال ایدنلرجه مصدق اولمق لازم کلیر .

برزماندن بری بو اصول استعماله باشلامش اولان محروملر مزه
یونی قبول ایتدکلرندن طولانی تعریض ایدنلرك، مقلد بلکده
مبتدع نظریله باقاندلرك سوزلرینه باقلماز . فصل باقلسون که
روایت کوره میلاددن ایکی عصر اول اسکندریه علماسی طرفندن
قوللانلمغه باشلامش ، مؤخرأ تلاحق افکارایله نقصانی اکمال
ایدلمش اولان بو اصولی علمای اسلام دخی استعمال ایتشاردر ؟
حالا المزده بولنان قرآن کریم نسخه لرنده کورمکده اولدیغمز
(سجاوند) تعیر اولنان اشارات نه در ؟ اصول تنقیطدن باشقه
برشیمیدر ؟

ایضاحدن مستغیدرکه انسان تکلم ایدرکن مرانی تصور
ایتدیکی وجه ایله افاده ایده بیلیمک ایچون آره صیره سوزی
کسمکه لزوم کورر . بوکسینتیلر مختلفدر . بعضاً آز ، بعضاً
چو قجه اولور . جمله اولورکه ختامنده بر نفس آلنه جق قدر
طوریلور . یرکلیرکه سوز برقاج نفس آلنه جق قدر ودها زیاده

کسیلیر . هر نه صورتله اولورسه اولسون بویکیفته (وقف)
دینیلیر .

(سامی) بك افدينك (اصول تنقيط و ترتيب) عنوانلی اثرنده
دیدیکی کبی — یازی سوزك تصویر اولدیغندن — آندهده بو
کسینتیلره رعایت ایدمك لازم کلیر. برمتکلم سوز سویلرکن برینه کوره
وقفه نه قدر رعایت ایدرسه مرامنی اودرجه آچیق و مؤثر اوله رق
افاده ایدر. كذلك بر محرر یازی یازارکن وقف اوله جق یرلری
نه قدر مکمل کویسترسه یازیسنی تصویر ایتکده اولدیغنی سوز
اودرجه اویدر مش اولور. بناءً غلیه هرلسانده اولدیغنی کبی
عثمانلیجه ده دخی اصول تنقيطك مناسب وجه ایله قبولی ضرورت
حکمنی آلیر .

بعض ارباب قلمك بواصولی قبولده متعصبانه تردد
کویسترشلی ناجادر. بوبابده مقنع بر دلیل قبول آرانیه جق
اولورسه بالاده بیان اولدیغنی اوزره وقتیه علمامز طرفندن
قرآن کریم نسخه لرینه (سجاوند) دینیلان اشاراتك وضعنه
ضرورت مس ایتش اولسی وهنوز زیورایدی مطهرون اولان
مصاحف شریفه نك بواشارتی حاوی بولمنسی کافیدر ظن ایدرز .

استطراد

ائمة علم قرائتدن (ابوحفص محمد بن طیفور السجاوندی)
طرفندن تعیین اولندیغنه کوره آیات کریمیه وضع اولنان اشارات
شونلردر :

م — ط — ج — ز — ص — لا .

م — وقف لازم اشارتیدر که طورلمدیغنی حالده معنائك تغیر
ایده جکی یره وضع اولنور .

ط — وقف مطلق اشارتیدر که طورلمق مدار حسن بیان
اولان یره وضع اولنور .

ج — وقف جائز اشارتیدر که وصل وفصلنده بأس اولمیان
یره وضع اولنور .

ز — وقف مجوز لوجه اشارتیدر که برجهتله وصلی ، دیگر
جهتله فصلی مناسب اولان یره وضع اولنور .

ص — مرخص لضرورة اشارتیدر که مابعدی ماقبلندن مستغنی
ارلمدیغنی حالده سوزك اوزامسندن طولایی نفسك انقضاءجی جهتیله
طورلمغه مجبوری کوریان یره وضع اولنور .

لا — لاوقف علیه اشارتیدر که طورباق جائز اولمیان یره وضع اولنور .
اشارات قرآنیه آره سنده بعضاً (ك) دخی کوریلور. بو (كذلك)
اشارتیدر که بر اشارتک صیره ایله ایکی دفعه وضعی لازم کانهجه تکراردن
احتراراً ایکنجی مرتبه ده وضع اولنور .
انتهی

شوايضاحاتی اعطادن بقصد من اصول تنقيطك لسانمزده
دخی استعمالی الزم اولدیغنی وقبول اولنماسنی التزام ایدنلرک
فکری هرجهتله واهی بولندیغنی اثباتدر .

لسانمزك ساده لکنی محافظه ، لطافتی اظهار ایچون تقلیل استعمالنه
لزوم کورمکده اولدیغمز واره بدل (ویرکول) دیدکلری (۱) اشارتی
قوللانه بیایرز . شو قدر واره بونی (۲) صورتنه تمویل ایدرز ، چونکه

اورو یا خطری صولدن ضاغه یازلدینی حالدده بزم خطمزم بالعکس
 صاغدن صوله یاز یلیور . بز ویرکولی عیناً قبول ایدده جک اولسه ق
 کله یه ، عباریه یوزینی چویره جک یرده آرقه سنی چویرمش اوله .
 جغندن باشقه قلممزمک یوریشنه دخی موافق کلز .
 سامی بک افتدی (اصول تنقیط و ترتیب) ده ویرکوله (فاصله) عنواتی
 ویرمش . ذهنی افتدی (المنتخب) ده (سکته) دینلمسنی تنسیب ایتمش .
 بواسملردن هر برینک ویرکولک کوردیکی خدمته مناسبتی اولدیغندن
 هانکیسنی اختیار ایدلسه اولور . بز شمذیلک (فاصله) تعیرینی اختیار
 ایدیورز .

سامی بک افتدینک شایان تدقیق اولان مذکور اثرنده
 فاصله ایله اشارات سائرده دائر خیلی ایضاحات ویرلمشدر .
 یرینه کوره واوه بدل فاصله استعمالنه قرار ویرلدکن صکره
 بونلردن هانکیسنک نره ده ایرادی انسب اوله جنی جهتی قالیر . بوراسنک
 تعیننی سلیقه نک ایشیدر . شو قدر وارکه بر آدم یازی یازارکن واو ایله
 فاصله دن برینی ترجیح ایدده بیلیمک ایچون شوایکی شیئه دقت ایتلیدر :
 — سلاست .

— وضوح .

لفظه عائد اولان سلاست ایله معنایه متعلق بولنان وضوح
 سوزک ایکی بیوک مدار مزیتی اولدیغندن بونلره هر یرده رعایت
 اولنمق ، یعنی سهولتله اوقونه میه جق ، سهولتله آکلاشیله میه جق
 سوز یازلماق لازم کلدیکی کبی واو یا خود فاصله وضعنده دخی
 بورالری کوزه دلمک اقتضا ایدر . چونکه واو بعضاً سلاستی ،
 فاصله ده بعضاً وضوحی اخلاص ایدده بیلیر . مثلاً فردوسینک :

بروزنبرد آن یل ارچند
 بتیغ و بختجر بکرز وکنند
 برید ودرید و شکست و بیست
 یلان راسر وسینه و پاودست

بیتلرینی ترجمه ده «مخاربه کونی او پهلوان غالب قیلیج وخنجر
 وکرز وکنند ایله سائر پهلوانلرک باشلرینی وکو کسلرینی و آیاقلرینی
 واللرینی کسیدی ویرتدی و قیردی و باغلادی» دیه جک اولسه ق
 سلاستی برسوز سویلمش اولمیز . بوده شو اوفاجق عبارده ده
 طقوز واوک اجتماعدن نشأت ایدر .

بالاده کی افادادن آکلاشلدینی اوزره واو نه قدر آزا استعمال
 اولنورسه شیوه لسان عثمانی یه اودرجه رعایت ایدلمش اولور .
 بناء علیه نثرده ممکن اولدینی قدر ولو ایکی واوک اولسون تعاقبنه
 میدان ویرله مک لازم کلیر . اما نظمده بعضاً برقاج واوک
 تعاقبی ضروره تجویز اولنور . مثال :

مربی مسلمان ویهود وکبر وترسادر

اوج واوی حاوی بولنان بومصرای نثره تحویل ایدده جک^{نفعی}
 اولسه ق واو ایرادینه قطعاً لزوم کورمیوب «مسلمانک، یهودک،
 کبرک، ترسانک مر یسیدر» دیرز .

برزماندن بری بعض ارباب قلم فرانسز جهده اکثریت اوزره
 جاری اولان اصوله توفیقاً معطوف بردن زیاده اولنجه اولکنده
 ویا اولکیلرده فاصله ایله اکتفا ایلد کلری حالدده معطوف اخیر
 واو ایله ایراد ایتیمکه باشلامشدر . مثال :

مشارالیهک مزیت ادبیانه سی ایسه عاکف پاشادن ، رشید پاشادن
 وحتی ضیا پاشا مزحومدن ده عالیدر .
 مجموعه ابوالضیا

بوصورت لسانمژده بر قاعده مطرده حکمنده طوتیله ماز ،
چونکه معطوف اخیرك بویله واو ایله ایرادینه لزوم کورلدیکی
پك آزددر ، حتی دقت اولنسه بالاده کی عبارده ده (وحتی) ده کی
واوك لزومسز اولدیغی آکلاشیلیر .

بوندن طولاییدرکه اك بیوك ادیبلر من معطوف اخیرك او یله
واو ایله ایرادینی التزام ایتیمورلر ، اکثریا آنده ده فاصله ایله
اکتفا ایدیورلر . مثال :

ایکنجیسی ده (صدیق برعزم ، عمری برتوفیق ، عثمانی بر فدا کاراق ،
حیدری بر جلادت ایله) ۱۰۰۵ تاریخنده و محمدناک زماننده اکر
ملحه کبراسنک قازنسنه سبب مستقل اولان مرحوم خواجه سعدالدین
ایدی .

بوراده وحیدری بر جلادت ایله ، دیمک طبیعی اوله میه جنی
جرئی ملاحظه ایله تسایم اولنور ظن ایدرز .

اخطار

معطوف اولان (سائر) و (سائر) کله لرینک هر حالده او
ایله ایرادی واجبدر . مثلاً ادبیات ، حکمیات و سائر ، دینیلیر ،
« ادبیات ، حکمیات ، سائر » دینیلر من . انتها

(جزمی) نك برده شو عبارت سنه باقه لم :

عارضله ماجرای و جزمینک سن و حائی تعریف ایده رک قصیده بی
نوعیه عرض ایتدیلر . نوعی ایسه نهایت درجه ده دلداده لیاقت ،
فوق الغایه اهل پرور بر ذات ایدی .

بوراده فاصله ایله « ماجرای ، جزمینک سن و حائی »
دینلمیوب ده واو ایله « ماجرای و جزمینک سن و حائی » دینلمی

-- کذلک فاصله ایله « نهایت درجه ده دلداده لیاقت ، فوق الغایه
اهل پرور » دینیلوب ده واو ایله « نهایت درجه ده دلداده لیاقت
و فوق الغایه اهل پرور » دینلمه می نه دندر ؟ یوقاری ده سویلدکلر -
منی او نونامش ایسه کز بوسؤانه پك قولای جواب ویره بیلیر سکر .
نه دیمش ایدک ؟ عبارده ده واو ایله فاصله دن برینی ترجیح ایده
بیلیمک ایچون لفظه عائد اولان سلاست ایله معنایه متعلق بولنان
وضوحه دقت ایدمک لازم کله جکی سویلمه مشمی ایدک ؟
بونک ده سببی بعضاً واوك سلاستی ، بعضاً ده فاصله نك وضوحی
اخلال ایده بیله جکی اولدیغی کوسترمه مشمی ایدک ؟ ایشته « ماجرای
و جزمینک سن و حائی » ده واو : « نهایت درجه ده دلداده لیاقت ، فوق الغایه
اهل پرور » ده دخی فاصله ایرادی بونکته لره بنیدر .

دقت اولنسون ! (ماجرای) دن صکره فاصله ، (لیاقت) دن
صکره واو کتیر لسه برنجیسنده وضوحه ، ایکنجیسنده سلاسته
خلل کز می ؟

ایشته بامحل فاصله نك وضوحی ، کذلک بامحل واوك سلاستی آن
چوق اخلال ایده بیله جکی بومثال ایله ثابت اولور .

بورالری دقایق لساندن معدوددر . افاده ده وضوحی ، سلاستی
اخلال ایتمه مک ایچون حسن طبیعت لازم . یوقسه دائماً کورلدیکی اوزره
او یله طبیعتسز لر بولنور که تمهیدی وضوح ، منافرتی سلاست ظن ایدرلر .
انسان حسن طبیعتله حسن تحصیل جمع ایتلیدر که کوزل سوز

سویلمکه مقتدر اوله بیاسون، حسن طبیعت خداداد برسرمايه
درکه تحصیل ایله نما بولور »
اتهای بند

ذهنی افندی ویرکوله (سکته) دینلمسنی (المقتضب) کصرف
قسمنده شو عبارده تنسب ایشدر :

— بونلردن ماعداندا واستفهام و نقل و تمثیل و تفصیل و فضل
و توقف علامتی اولمق اوزره شواشارتی استعماله دخی لزوم واردر :
(! : ،) شوکا : (نقطتین) وشوکا () (قلامتین) وشوکا »
(نممتین) دیمیدرکه اولکیسی ایکی طرناق کسنتیسی وایکنجیسی ایکی
طرناق نشانی دیمکدر . شوکاده (سکته) ونقطه لیسنه (منقوطه)
دیمیدر .

ایشته بوصورتله مشار الیه دخی اصول تنقیطک قبولی ترویج
بیوریور .

واودن صکره عطف و تشریک ادواتندن (دخی) و آنک
مخفی اولان (ده) ایله اجرا ایدیلن وصللر شایان دقتدر . مثلاً
« کتابتده اولدینی کی خطابتده دخی (یاخود) خطابتده ده مهارتی
وارایدی » عباره سنده وصل اوجب اولدینی خالده « کتابتده
اولدینی کی خطابتده مهارتی یوق ایدی » عباره سنده جائز اولماز ،
چونکه بونده « خطابتده دخی (یاخود) ده » دینیله جک اولسه
مبحوث عنه اولان ذاتک بوشیلرک ایکینسده ده مهارتی اولدینی
کوسترلمش اولور . مقصود ایسه آنک کتابتده اولان مهارتی
خطابتده اولدینی افاده در .

اتها



(اصطلاحات ادبیه) نك فهرسی :

صحیفه	صحیفه	صحیفه
۳ افاده مخصوصه	۸۲ خروج	۱۱۱ ذو قافیتین
۵ اخطار	۸۲ مزید	۱۱۱ متقرن
۶ سحر حلال	۸۲ نأثره	۱۱۲ محجوب
۸ استخدام	۸۳ ملاحظه مخصوصه	۱۱۲ ذوالقوائ
۱۰ حسن تعلیل	۸۴ ردیف	۱۱۳ حاجب
۱۴ شبه حسن تعلیل	۸۶ مردف	۱۱۳ قافیه اصلیه
۱۴ ائتلاف	۸۷ حرکات قافیه	۱۱۳ قافیه ملحقه
۱۴ لفظک معنی ایله ائتلافی	۸۷ اشباع	۱۱۳ حروف املا
۱۵ جزالت ورق	۸۹ توجیه	۱۱۳ حروف مستخلفه
۲۶ لفظک وزن ایله ائتلافی	۹۰ مجری	۱۱۳ حروف مد
۲۸ لفظک وزن ایله کمال ائتلافی	۹۱ نفاذ	۱۱۳ حروف معزوله
۳۳ لفظک لفظ ایله ائتلافی	۹۲ انواع روی	۱۱۴ استخلاف
۳۴ معنائک وزن ایله ائتلافی	۹۲ روی مقید	۱۱۴ عزل
۳۵ معنائک معنی ایله ائتلافی	۹۳ روی مطلق	۱۱۸ یاء معروفه
۳۶ حشو	۹۳ تقطیع اعتبار یله قافیه	۱۱۸ یاء مجهوله
۳۶ حشو مفسد	انواعی	۱۲۲ شعر
۳۹ حشو غیر مفسد	۹۳ قافیه مترادفه	۱۲۲ نظم — نثر
۴۰ حشو قبیح	۹۳ قافیه متواتره	۱۲۴ استطراد
۵۱ حشو ملیح	۹۴ قافیه متدارکه	۱۲۹ بلاغت
۵۳ حشو متوسط	۹۴ قافیه متراکبه	۱۳۰ کلامده بلاغت
۵۶ تجاهل عارف	۹۵ قافیه متکاوسه	۱۳۰ متکلمده بلاغت
۶۳ تکلم صامت یاخود تکلم	۹۵ عیوب ملقبه قافیه	۱۳۰ مقتضای حال — مقتضای
روح	۹۶ سناد	مقام — اعتبار مناسب
۶۵ قافیه	۹۶ اقوا	۱۴۰ ذوق
۷۱ حروف قافیه	۹۶ اکفا	۱۴۴ ذوق سلیم
۷۱ روی	۹۸ ایطاء	۱۴۴ سلامت ذوق
۷۶ تأسیس	۱۰۰ ایطاء جلی	۱۴۴ سلامت حس
۷۶ قافیه مؤسسه	۱۰۳ قافیه شایکان	۱۵۰ شعرك مرقص، مطرب
۷۸ دخیل	۱۰۳ ایطاء خفی	مقبول، مسموع، متروک
۷۸ ردیف	۱۰۴ عیوب غیر ملقبه قافیه	قسملرینه تقسیم
۸۰ قید	۱۰۹ قافیه معموله	۱۵۰ تنظیم شعرده دأثر بعض
۸۱ وصل	۱۱۰ قافیه غیر معموله	ملاحظات

صمیمه	صمیمه	صمیمه
۱۵۲ مصراع	۱۹۰ مسدس متكرر	۲۳۰ ت. ویم
۱۵۲ مصراع آزاده	۱۹۰ مسدس مزدوج	۲۳۰ لف ونشر
۱۵۳ مصراع برجسته	۱۹۱ مسطح	۲۳۱ لف ونشر مرتب
۱۵۴ بیت	۱۹۲ ترجیع بند	۲۳۱ لف ونشر مشوش
۱۵۵ بیت القصید	۱۹۲ ترکیب بند	۲۳۱ معکوس الترتیب
۱۵۵ بیت الغزل	۱۹۲ ترجیعخانه	۲۳۱ مختلف الترتیب
۱۵۵ شه بیت	۱۹۲ ترکیبخانه	۲۳۱ لف ونشر غیر مرتب
۱۵۷ تصریع	۱۹۲ واسطه	۲۳۳ استطراد
۱۵۷ مصرع	۱۹۲ بند	۲۳۵ تنسیق
۱۵۸ فرد — مفرد	۱۹۴ ترجیع	۲۳۵ تنسیق ارتقائی — تنسیق
۱۵۸ مطلع	۱۹۶ تخمیس	انحطاطی
۱۵۹ ذات المطالع	۱۹۸ تسدیس	۲۳۷ تفلیب
۱۵۹ ذو المطالع	۲۰۰ تهریل	۲۳۹ اكمال
۱۶۰ حسن مطلع	۲۰۲ توصیف	۲۴۱ جناس
۱۶۱ مقطع	۲۰۶ اشعار — التزام مالا یلزم	۲۴۱ جناس تام — جناس غیر تام
۱۶۱ حسن مقطع	۲۰۸ سجع مقید — قافیه مقید	۲۴۱ جناس تام — یط — جناس
۱۶۱ قصیده	۲۰۸ طرد و عکس	تام مرکب
۱۶۲ کریز — کریز کاه	۲۱۰ طرد و عکس تام	۲۴۴ جناس متشابه
۱۶۳ تاج	۲۱۰ طرد و عکس ناقص	۲۴۴ جناس مرفو
۱۶۶ غزل	۲۱۱ رجوع	۲۴۶ جناس لاحق
۱۷۴ يك آهك	۲۱۳ حذف	۲۴۷ جناس ناقص
۱۷۴ يك آواز	۲۱۵ تجرید — مجرد	۲۴۸ جناس قلب
۱۷۹ قطعه	۲۱۶ خیفنا	۲۴۸ قلب كل — قلب بعض
۱۸۱ نظم	۲۱۶ رقطا	۲۴۹ جناس محرف
۱۸۱ رباعی	۲۱۷ منقوط	۲۴۹ جناس خط — جناس
۱۸۲ رباعی مصرع	۲۱۸ مقطع	تصحیف — جناس مصحف
۱۸۴ ترانه — دوبیت	۲۱۸ موصل	۲۵۱ اشتقاق
۱۸۵ مثنوی	۲۲۰ معجم	۲۵۳ شبه اشتقاق
۱۸۶ سربع	۲۲۱ مستزاد	۲۵۳ مراعات نظیر
۱۸۸ تخمس	۲۳۱ زیاده	۲۵۶ تشابه اطراف
۱۸۸ تخمس متكرر	۲۲۴ اعاده — معاد	۲۵۶ ایهام تناسب
۱۸۸ تخمس مزدوج	۲۲۵ سهل متمتع	۲۵۷ فصل ، فصل و
۱۹۰ مسدس	۲۲۷ ارساد	۲۵۸ و
	انها	

